



Tlamachtitlin tlen
mitsmachtia **Biblia**



“Niman desde tikonetl katka tikixmati on iYektlajkuilol Dios
yejuan uelis mitstlamachilistis niman mitsuikas itech on temakixtilistli”

(2 TIMOTEO 3:15).



Yejuin amatlajkuilojli xnonemaka. Noxeloua ipan nochi tlaltikpaktli, tepaleuiya manasikamati Biblia niman nochiua ika tomin tlen kitemakaj tlaltikpakchanejkej ika nochi inyojlo.
Tla tikneki tiktemakas tomintsin, xkalaki ipan donate.jw.org.

Textos tlen uajlauej ipan Tlajkuiloltin ika hebreo onokixtijkej itech *Traducción del Nuevo Mundo de las Santas Escrituras* (ika inglés, 2013), niman onotlajtolkuep ika náhuatl de Guerrero. Niman textos tlen uajlauej ipan Tlajkuiloltin ika griego, onokixtijkej itech *Biblia In Yeuicui Iyectlajtoltzin Dios ican Náhuatl de Guerrero*; san ika, onojkuilo ken aman noijkuiloua náhuatl. Ijkuak tikitas ijkuilujtok *TNM* kijtosneki onokixti itech *Traducción del Nuevo Mundo de las Santas Escrituras*. Miyek itech tlen ompa uajnestiuj onoyektlali ken kokonej nimantsin makasikamatikan.


Tlamachtitlin tlen mitsmachtia Biblia
Lessons You Can Learn From the Bible
Impresión de febrero de 2022

Nahuatl (Guerrero) (*lfb-NHG*)

© 2017
Watch Tower Bible and Tract Society
of Pennsylvania
Akin kichijchiuaj
Watchtower Bible and Tract Society of
New York, Inc., Wallkill, New York, U.S.A.







Tlamachtiltin tlen
mitsmachtia **Biblia**

Yejuin amoxtli itlatki



Tokniuan akin timechtlasojtlaj:

Akin tikueyichiuaj Jehová tiktlasojtlaj iTlajtol, Biblia. Tejuamej kuajli tikmatstokej ika itech tiknextiaj tlen yemelak opanok yeuejkau, tlajtolyekanalistin tlen kema techpaleuiyaj ipan tonemilis niman noiiki techititia ika Jehová yemelak kintlasojtla tlaltikpakchanejkej (Salmo 119:105; Lucas 1:3; 1 Juan 4:19). Tiknekij ika nochi toyojlo tikipaleuissej oksekimej makixmatikan tlen melak kualtsin temachtia iTlajtol toTajtsin. Ika yejon, melak techyolpaktia timechixpantiliskej yejuin amoxtli itoka “Tlamachtiltin tlen mitsmachtia Biblia”. Xtechkauilkan matimechijlikan achijtsin itech yejuin amoxtli.

Ijkuak onoiykuilo yejuin amoxtli, ononemili ipan kokonej. San ika, noiiki uelis melak kinpaleuis akin iuejueyimej makixmatikan okseki itech Biblia. Pampa Biblia onochijchiuj ika nochimej matechpaleui, kuajli tikmatstokej ika tla tomachtiaj yejuin tlamachtiltin, techpaleuis yemelak matiyolpakikan.

Pampa onokixti itech Biblia, yejuin amoxtli peua techpouilia itech kenon opeujkej nemij tlaltikpakchanejkej niman tlen sakin opanok. Ika xouijtika tlajtoltin, otikyejyekojkej titemachiltiskej tlen onochiuj ipan Biblia niman otokojtilijkej tiktlaliskej ijkon ken opanotia.

Yejuin amoxtli, xsan techpouilia tlen Biblia kijtousa opanok. Tlaixkopinaltin niman tlen ijkuiliujtok, kichiuas matikitakan ken yemelak opanok niman matikmachilikan tlen okimachilijkej akin noteneuaj ipan Biblia.

Yejuin amoxtli techpaleuis matikitakan ika Biblia tlajtousa itech akin okitlakamatkej Jehová niman akin xokichijkej. Noiiki techititis tlenon uelis tomachtiskej itech innemilis (Romanos 15:4; 1 Corintios 10:6). Yejuin amoxtli xeliujtok ika 14 secciones. Ipeujyan yejuin secciones, ika achijtsin tlajtoltin techijlia seki tlamachtiltin tlen uelis tomachtiskej.



Tla tejava tikiñpiya mokoneuan, san sekan xpouakan se tlamachtijli niman xtlajtakan itech tlaixkopinaltin tlen kipiya. Sakin, xpouakan tlaixeloltin itech Biblia kampa onokixti tlamachtijli. Xkinpaleui mokoneuan makitakan kenon tlen Biblia kijtousa niman tlen tlamachtia yejuin amoxtli, notlajtolnamikij. Noijki uelis ijkin tikchiusas ijkuak tikmachtis se akin iueyi niman ijkon uelis kitas tlenon tlamachtia Biblia.

Melak tiknekij ika yejuin amoxtli makinpaleui nochimej, pipitikej niman akin iuejueyimej, akin kipiya kuajli inyojlo, makixmatikan iTlajtol toTajtsin niman makichiuakan ipan innemilis tlen ompa uelij. Yejuin kichiusas ika yejuamej noijki, san sekan imiuan ichanejkauan Jehová, makiueyichiuakan.

Nemokniuan,

Grupo akin Kinyekana iTeixpantijkauan Jehová

Tlen kipiya

	PÁGINA		
1	ToTajtsin otlachijchiuj	6	
	1 ToTajtsin okichijchiuj iluikak niman tlaltikpaktli	8	
	2 ToTajtsin kichijchiua kachtopa tlakatl niman siuatl	10	
2	Tlajtoua itech Adán hasta Apachiuilistli	12	
	3 Adán iuan Eva xokitlakamatkej toTajtsin	14	
	4 Melak teijtlako chikauak tikualanis	16	
	5 Akajli tlen Noé okichijchiuj	18	
	6 Chikueyimej makisaj	20	
3	Tlajtoua itech Apachiuilistli hasta Jacob	22	
	7 Torre tlen onochijchiuj ipan Babel	24	
	8 Abrahán iuan Sara okitlakamatkej toTajtsin	26	
	9 ¡Aman kema kipiay se inkoneuj!	28	
	10 Xkilnamiki isiuauj Lot	30	
	11 Notlatlata itlaneltokil Abrahán	32	
	12 Jacob kiselia herencia	34	
	13 Jacob niman Esaú noyolseuiyaj	36	
4	Tlajtoua itech José hasta mar Rojo	38	
	14 Se tlakeuajli akin okitlakamat toTajtsin	40	
	15 Jehová xkeman okilkauj José	42	
	16 ¿Akinon katka Job?	44	
	17 Moisés okitlapejpeni kiueyichiuas Jehová	46	
	18 Uitskojtli tlen tlikuita	48	
	19 Kachtopa yeyi tlajyouilistin	50	
	20 Okseki chikuasen tlajyouilistin	52	
	21 Ika majtlaktli tlajyouilistli	54	
	22 Milagro ipan mar Rojo	56	
5	Ipan tlauiaktli	58	
	23 Onotlajtolkaujkej iuan Jehová	60	
	24 Xokichijkej ken onotlajtolkaujkej	62	
	25 Tabernáculo kampa kiueyichiuaj toTajtsin	64	
	26 12 ichtakatlachixkej	66	
	27 Okixnamijkej Jehová	68	
	28 Tlajtoua ipoloko Balaam	70	
6	Tlajtoua itech Jueces	72	
	29 Jehová okitlapejpeni Josué	74	
	30 Rahab okimiyán ichtakatlachixkej	76	
	31 Josué niman gabaonitas	78	
	32 Se yenkuik tlayekanketl niman omemej siuamej yolchikaujkej	80	
	33 Rut niman Noemí	82	
	34 Gedeón okintlan madianitas	84	
	35 Ana okitlajtlan ipan teoyotl se ikoneuj	86	
	36 Itlajtolkaualis Jefté	88	
	37 Jehová okinots Samuel	90	
	38 Jehová okichij ika Sansón makojtik	92	
7	David niman Saúl	94	
	39 Kachtopa tekiuaj ipan Israel	96	
	40 David niman Goliat	98	
	41 David niman Saúl	100	
	42 Jonatán katka yolchikauak niman yolmelaujki	102	
	43 Itlajtlakol tekiuaj David	104	
8	Tlajtoua itech Salomón hasta Elías	106	
	44 Se teopan tlen okichijchiuilijkej Jehová	108	
	45 Se tekiuajyotl tlajkoxeliui	110	
	46 Jehová okiteititi ika yejua toTajtsin akin melauak	112	
	47 Jehová okiyolchikauj Elías	114	
	48 Oyoliuj ikoneuj se siuakauajli	116	
	49 Okitlajtlakolmakakej se xkuajli siuatl	118	
	50 Jehová okimakixti Jehosafat	120	

9

Tlajtoua itech Eliseo hasta Josías 122

51 Se tlaixnamijketl niman se ichpokatsin	124
52 Jehová kipiya caballos niman carros ika tlitl	126
53 Iyolchikaualis Jehoiadá	128
54 Jehová okijyoui Jonás	130
55 Se iiluikaktekitkauj Jehová okimakixti Ezequías	132
56 Josías okitlasojtlak iTlanauatil toTajtsin	134

10

Tlajtoua itech Jeremías hasta Nehemías 136

57 Jehová okititlan Jeremías matenojnotsati	138
58 Okixoxotonijkej Jerusalén	140
59 Nauimej telpokamej akin okitlakamatkej Jehová	142
60 Se Tekiuajyotl tlen xkeman popoliuis	144
61 Yeuamej xonotlakuanketskej	146
62 Se tekiuajyotl kentla se ueyi kojtl	148
63 Tlen ijkuiliujtika ipan tepantli	150
64 Daniel okontlajkalkej kampa leones	152
65 Ester okimakixti ikalpan	154
66 Esdras otemacht i iTlanauatil toTajtsin	156
67 Itepanuan Jerusalén	158

11

Juan Teapolaktijketl niman Jesús 160

68 Elisabet okipix se ikoneuj	162
69 Iluikaktekitketl Gabriel okitlajpaloto María	164
70 Iluikaktekitkej okiteijlikej ika Jesús otlakat	166
71 Jehová okitlajpix Jesús	168
72 Telpokatsin Jesús	170
73 Juan okiteijli ika uajlaskia Mesías	172

12

Itenojnotsalis Jesús 174

74 Jesús onochiuj Mesías	176
75 Diablo okitlatatak Jesús	178
76 Jesús okichipauj teopan	180
77 Se siuatl akin nemiya kampa pozo	182
78 Jesús otenojnots itech Tekiuajyotl	184
79 Jesús okichiuj miyek milagros	186
80 Jesús okintlapejpeni 12 itlatitlankauan	188
81 Tlamachtijli ipan Tepetl	190
82 Jesús okinmacht i inomachtijkauan kenon kichiuaskej teoyotl	192
83 Jesús melak miyekej okintlakualti	194
84 Jesús onejnen ixko atl	196
85 Jesús otepahti ipan sábad	198
86 Jesús okiyoliti Lázaro	200

13

Sa ika tlami semana ijkuak Jesús onen ipan tlatikpaktli 202

87 Jesús okipanolti sa iyeka Pascua	204
88 Okajsikej Jesús	206
89 Pedro okijto ika xkixmatiya Jesús	208
90 Jesús omik kampa <i>Gólgota</i>	210
91 Jesús oyoliuj	212
92 Jesús ouajnonexti imixpan michtlamajkej	214
93 Jesús oksejpa onoku ep iluikak	216

14

Miyekej kineltokaj Cristo 218

94 Inomachtijkauan Cristo okiselijkej espíritu santo	220
95 Xtlaj okintelti	222
96 Jesús okitlapejpeni Saulo	224
97 Cornelio okiseli espíritu santo	226
98 Nomiye kiliaj akin kichiuaj ken Cristo	228
99 Se tlapixketl itech cárcel kimachtiaj tlen melauak	230
100 Pablo niman Timoteo	232
101 Pablo okuikakej Roma	234
102 Tlatlachalistin tlen okitak Juan	236
103 "Mauajla moTekiuajyo"	238



1

Biblia peua technojnotsa itech kenon onochijchiuj nochi tlen tikitaj, techijlia nochi tlen melak kuałtsin okichijchiuj Jehová ipan iluikak niman tłaltikpaktli. Tła tikiñpiya mokoneuan xkinpaleui makitakan ika tlen miyek onochijchiuj melak temojkatłachialti. Xkimititi ika Jehová okinchiujchiuj tłaltikpakchanejkej melak ueyixtokej xijkon ken yolcamej pampa ueli tłajtouaj, tlanemiliaj, kichijchiuaj yenkuikej tlemach, nokuikatiaj niman kinotsaj toTajtsin. Xkinpaleui melak makitlasojkaitakan ikojtilis niman itlamachilis Jehová, kenon yejua melak techtlasojtla tisesentemej niman noijki tlen okichijchiuj.



TLAMACHTILTIN TLEN NONEKI XMATI

- Jehová niman ikoneuj okichijchiujkej tlaltikpaktli niman ijkon ipan matichantikan.
- Jehová okitlali familia ijkuak okichijchiuj tlakatl iuan siuatl, niman okichij ika mauelikan makinpiyakan inkoneuan.
- Jehová kineki ika tlaltikpakchanejkej manemikan nochipa, san sekan niman ika inyojlo.



1 ToTajtsin okichijchiuj iluikak niman tlaltikpaktli

ToTajtsin Jehová yejua akin otechijchiuj. Yejua okichijchiuj nochi tlen tikitaj niman tlen xtikitaj. Ijkuak xikichijchiuaya tlen tikitaj, okinchijchiuj melak miyekej iluikaktekitkej. ¿Tikmati akinomej yejon iluikaktekitkej? Yejuamej itekipanojkauan toTajtsin niman tlachiaj ijkon ken yejua. Tejuamej xuelij tikimitaj, ijkon ken xtikitaj Jehová. Kachtopa iluikaktekitketl akin Jehová okichijchiuj onochiuj itlapaleuijkauj. Yejua okipaleui Jehová ijkuak okinchijchiuj sitlalimej, planetas niman nochi okseki tlemach. Se itech yejuin planetas, tlaltikpaktli, ipan tichantij niman melak kualtsin.

Ijkuakon Jehová okiyektlali tlaltikpaktli, ijkon yolkamej niman tlaltikpakchanejkej ueliskiaj ipan chantiskiaj. Okichijchiuj ika itlauil tonaltsintli mapetlani ipan tlaltikpaktli. Yejua okinchijchiuj tepemej, atentin niman mar.

“Ijkuak xtlaj onkatka toTajtsin okinchijchiuj iluikamej niman tlaltikpaktli” (Génesis 1:1).

¿Tlenon opanok sakin? Jehová okijto: “Nikchijchiuas sakatl, xiujtli niman kojtin”. Melak miyek tlakilyomej, kijli niman xochimej opeuj noskaltiaj. Jehová noijki okinchijchiuj nochimej yolkamej: akin patlanij, apanouaj, manejnemij niman notechiuilanaj. Okinchijchiuj yolkamej pipitikej, ken kimichimej, niman uejueyimej, ken elefantes. ¿Katlejua yolkatsin tikuelita?

Kuakon, Jehová okijli kachtopa iluikaktekitketl: “Matikchijchiuakan tlakatl”. Tlaltikpakchanejkej xijkon yeskiaj ken yolkamej. Ueliskiaj kichijchiuaskiaj yenkuikej tlemach, tlajtoskiaj, uetskaskiaj niman



kinotsaskiaj toTajtsin.
Kitlajpiyaskiaj tlaltikpaktli
niman yolkamej. ¿Tikmati
akinson kachtopa tlakatl?
Matikitakan.

Tlajtoltlistin: ¿Akinon Jehová?
¿Tlenon okichijchiuj Jehová?

Génesis 1:1-26; Proverbios 8:30, 31;
Jeremías 10:12; Colosenses 1:15-17.

2 ToTajtsin kichijchiua kachtopa tlakatl niman siuatl

Jehová okichijchiuj se kualtsin xochitlalpan, okitlali kampa itoka katka Edén. Yejuin xochitlalpan tentoya ika xochimej, kojtin niman yolkamej. Sakin, toTajtsin okichijchiuj kachtopa tlakatl, Adán, ika tlajli niman okiyekailpits. ¿Tikmati tlenon opanok? ¡Tlakatl oyoliuj! Jehová okijli Adán makitlajpiya xochitlalpan niman makintlalili intoka nochimej yolkamej.

Jehová okimakak Adán se ueyi tlanauatijli. Yejua okijli: “Itech nochi kojtin uelis tijkuas itlakilyo, san itech se maka tijkuas, pampa melak tlasojti. Tla tijkua itlakilyo, timikis”.

Sakin Jehová okijto: “Nikchijchiuilis akin makipaleui Adán”. Kuakon, okichijchiuj ika Adán melak makochi niman ika se iyelchikijchiuj okichijchiuili isiuauj. Itoka katka Eva. Adán iuan Eva onochijkej



kachtopa familia. ¿Kenon onomachili Adán ijkuak okitak isiuauj? Ika pakilistli, okijto: “¡Xkita tlen toTajtsin okichijchiuj ika noyelchikiuj! ¡Aman kema! Yejua ijkon ken nejua”.

Jehová okimijli Adán iuan Eva makinpiyakan inkoneuan niman ijkon makitemiltikan tlaltikpaktli. Yejua kinekiya mapakikan ijkuak tekitiskiaj san sekan, nochi tlaltikpaktli kikuepaskiaj se kualtsin xochitlalpan, ijkon ken ipan Edén. San ika, xijkon opanok. ¿Tleka? Tiueliskej ipan okse tlamachtijli.

Tlajtoltlistin: ¿Tlenon tekitl Jehová okimakak Adán? ¿Tlenon inpan nochiuaskia Adán iuan Eva tla kikuaskiaj kojtlakilyotl tlen toTajtsin okijto maka makikuakan? Génesis 1:27-31; 2:7-9, 15-23; Salmo 115:16; Mateo 19:4-6.

“On yejuan okintlalij ijkuak kemach nochi [opeuj], okintlalij tlakatl niman siuat!” (Mateo 19:4).





2

¿Tleka Jehová okinpopolo tlaltikpakchanejkej ika se apachiuilistli? Ijkuak opeuj nemij tlaltikpakchanejkej opeuj se ueyi tlauejli, kentla se tlauisokijli yeskia, tlen xkuajli opeuj kixnamiki tlen kuajli. Sekimej, ken Adán, Eva niman inkoneuj Caín, okitlapejpenijkej tlen xkuajli. Oksekimej ken Abel niman Noé okitlapejpenijkej tlen kuajli. Niman pampa miyekej onochiujkej melak xkuakualtin, Jehová okinpopolo. Ipan yejuin sección, tiktaskej ika Jehová kita tlenon tiktlapejpeniaj tikchiusaskej niman ika yejua xkeman kikauilis ika tlen xkuajli makitlani tlen kuajli.



TLAMACHTILTIN TLEN NONEKI XMATI

- Tejuamej noneki tiyolyemankej yeskej, maka titlauelejkej ken Diablo niman akin kinyekana.
- Tla tijkakij toTajtsin niman tiktlakamatij, ijkon ken Noé, tinemiskej nochipa ika pakilistli.
- Jehová nochi kita. Ijkuak yakaj kichiuá tlen kuajli, kiyolpaktia, san ika, tla yakaj kichiuá tlen xkuajli, kiyolkokoua.

3 Adán iuan Eva xokitlakamatkej toTajtsin

Se tonajli, ijkuak Eva iselti nemiya, se kouatl okinots. Yejua okijli: “¿Yemelak ika toTajtsin xmechkauilia nenkikuaskej itech nochi kojtin?”. Eva okinankili: “Uelis tijkuaskej itech nochi kojtin, san itech se ka. Tla tijkuaj itlakilyo yejon kojtlí, timikiskej”. Kouatl okijli: “Xnenmikiskej. Tlen kema, tla nenkikuaj, nemochiuaskej ken toTajtsin”. ¿Yemelak katka tlen okijto? Ka, se tlakajkayaualistli katka. San ika, Eva okineltokak. Pampa miyekpa okitak kojtlakilyotl melak okinek kikuas. Kuakon okikua, niman okimakak Adán. Maski Adán kuajli kimatstoya ika tla xkitlakamatijaj toTajtsin mikiskiaj, yejua okikua.

Ijkuak itlapoyaujtoya, Jehová okiminnots Adán iuan Eva. Okintlajtolli tleka xokitlakamatkej. Eva okitlajtlakolti kouatl niman Adán, Eva. Pampa Adán iuan Eva xokitlakamatkej Jehová, okinkixti itech xochitlalpan. Niman pampa Jehová xok kinekiya manokuepakan okintlali iluikaktekitkej niman se espada tlen tlikuitika ikalakiayan xochitlalpan.

Jehová okijto ika kitlajtlakolmakaskia akin okikajkayauj Eva.

Xkatka se kouatl akin iuan otlajto.

Jehová xokichiuaj ika kouamej matlajtokan. Katka se xkuajli iluikaktekitketl akin okichiuaj. Ijkon ouel okikajkayauj Eva. Yejon iluikaktekitketl itoka Satanás noso Diablo. Ika tlayekapan Jehová kipopolos, ijkon xok yakaj kichiuas tlen xkuajli pampa xok kinkajkayauas.

Tlajtoltilistin: ¿Tleka Eva okikua kojtlakilyotl?

¿Tlenon ipan onochiuaj Adán iuan Eva ijkuak xok okitlakamatkej Jehová?

¿Akinon Satanás noso Diablo?

Génesis 3:1-24; Juan 8:44; 1 Juan 3:8; Apocalipsis 12:9.






“On diablo desde [opeuj], in taltikpaktli temiktijketl. Xkeman kijtous on tlen melauak, pampa xkipia ipan iyojlo on tlen melauak” (Juan 8:44).

4 Melak teijtlako chikauak tikualanis

Sakin ijkuak Adán iuan Eva okiskej itech xochitlalpan Edén, okinpixkej miyekej inkoneuan. Kachtopa inkoneuj, Caín, tokaketl katka, niman ika ome inkoneuj, Abel, yejua kintlajpiaya borregos.

Se tonajli, Caín iuan Abel okimakakej uentli Jehová. ¿Tikmati tlenon se uentli? Yejon kentla se tetlayokolijli tlen tikmakaj toTajtsin. Jehová melak okipakti uentli tlen Abel okimakak, san ika, xokipakti tlen okimakak Caín. Yejon okichiuuj ika Caín melak makualani. Jehová okijli ika tla xkiteltiaya itlauel kichiuaskia tlen xkuajli. San ika, Caín xokikakisnek.

Caín okijli Abel: “Tiauej ipan tepetl”. Ijkuak ompa inselti nemiay, Caín okiuisok niman okimikti ikniuj. ¿Tlenon





kichiuaskia Jehová? Yejua okitlajtlakolmakak Caín, okititlan uejka itech ichanejkauan. Xok keman ueliskia nokuepas.

¿Tlenon techmachtia yejuin? Ika tejuamej uelis tikmachiliskej ika tikualanij tla xnochiua ijkon ken tiknekij. San ika, tla xueli tikteltiaj totlauel noso tla oksekimej kitaj ika melak tikualantokej, noneki matopatlanan niman matoteltikan, ijkon xtokautiliskej matechyekana tlen tikmachiliaj.

Pampa Abel melak okitlasojtlak Jehová niman okichiuj tlen kuajli, Jehová nochipa kilnamikis. ToTajtsin kiyolitis Abel ijkuak kikuepas tlaltikpaktli se xochitlalpan.

“Achtopa iuan xmoyoltlaliti, niman kemaj oksejpa xuiya ne itech on tlaixpan niman xtemaka mouen” (Mateo 5:24).

Tlajtoltlistin: ¿Kenon intoka katka kachtopa omemej inkoneuan Adán iuan Eva?
¿Tleka Caín okimikti ikniuj?

Génesis 4:1-12; Hebreos 11:4; 1 Juan 3:11, 12.

5 Akajli tlen Noé okichijchiuj

Sakin, tlaltikpakchanejkej onomiyekilijkej ipan tlaltikpaktli. Miyekkej xkuakualtin katkaj. Hasta sekimej iluikaktekitkej onochiujkej xkuakualtin. Yejuamej okikaujkej iluikak kampa chantiyaj niman ouajtemokej. ¿Tikmati tleka okichijkej? Ijkon ueliskiaj nochiuaskej ken tlakamej niman nonamiktiskej iuan siuamej.

Iluikaktekitkej inuan insiuauan okinpixkej inkoneuan, akin melak kojtikey niman tlauelejkej katkaj. Yejuamej melak tetlajyouiltiyaj. Jehová xok kinkauiliskia ijkon makichiuakan. Kuakon yejua okijto kinpopolos akin xkuakualtin ika se apachiuilistli.

San ika, nemiya se tlakatl akin xijkon katka. Yejua okitlasojtlak Jehová. Itoka katka Noé. Yejua kipiaya isiuauj niman yeyi ikoneuan: Sem, Cam niman Jafet akin ikipiyaj insiuauan. Jehová okijli Noé makichijchiua se ueyi akajli kampa yejua niman ichanejkauan makisaskiaj itech Apachiuilistli. Yejuin akajli yeskia kentla se caja melak ueyi tlen yaskia ixko atl. Jehová noijki okijli Noé makinkalakti miyekej yolkamej ijtik akajli, ijkon noijki makisaskiaj.

Noé nimantsin opeuj kichijchiua akajli imiuan ichanejkauan. Ouekaujkej kanaj 50 xiuitl. Okichijkej ken Jehová okinnauati. Itech nochi yejon xiuitl kech ouejkaujkej, Noé okiteijli ika uajlaskia se apachiuilistli. San ika, nion se xokikakisnek.

Oyejkok tonajli ijkuak okalajkej ijtik akajli. Tikitaskkej tlenon opanok.

Tlajtoltilistin: ¿Tleka Jehová okuajkuik se apachiuilistli?
¿Tlenon okinnauati Jehová makichiu Noé?

Génesis 6:1-22; Mateo 24:37-41; 2 Pedro 2:5; Judas 6.

“Ijkuak nejua yejuan oninochiu Tlakatl niuajlas, on tlakamej ijkon kichiuaskej ken okichijkej ipan on tonaltin ijkuak nemiya Noé” (Mateo 24:37).





6 Chikueyimej makisaj

Noé, ichanejkauan niman yolcamej okalajkej ijtik akajli. Jehová okitsak puerta niman opeuj kiyau. Pampa melak chikauak okiyauj, akajli onokauj ixko atl. Ika yolik, nochi tlaltikpaktli oten ika atl. Kiyauak itech akajli tlaltikpakchanejkej xkuakualtin omijkej. San ika, Noé niman ichanejkauan xtlaj inpan onochiuj. ¿Tiknemilia kenon melak opajkej ika okitlakamatkej Jehová?

Melak chikauak okiyauj 40 tonajli niman 40 yeuajli, sakín onotelti. Ika yolik atl opeuj temoua. Sakín, akajli osaliuj ipan tepemej. San ika, Noé iuan ichanejkauan xnimantsin ouel okiskej itech akajli pampa nochiuiyan onkatka atl.

Yolik otemotia atl. Noé iuan ichanejkauan kanaj ouejkaujkej ijtik akajli ipantsin se xiuitl. Kuakon, Jehová okimijli ika ueliskiaj kisaskiaj, nesiya kentla se yenkuik tlaltikpaktli. Melak okitlasojkamachilijkej Jehová ika okinmakixti niman okititijkej ika se uentli.

Jehová okiyolpakti yejon uentli. Yejua okijto ika xok keman kipopoloskia tlen onka ipan tlaltikpaktli ika se apachiulistli. Pampa imiuan onotlajtolkauj, okichiuj ika ipan iluikak manesi kachtopa akosamalotl. ¿Kemantika yotikitak se?

Kuakon, Jehová okijli Noé iuan ichanejkauan makinpiyakan inkoneuan niman makitemiltikan tlaltikpaktli.

Tlajtoltlistin: ¿Tlenon opanok sakín ijkuak Jehová okitsak akajli?
¿Tlenon noneki matikilnamikikan ijkuak tikitaské se akosamalotl?
Génesis 7:1-9:17.

“Noé okalak ipan barco. Niman yejuamej xokichiuilijkej cuenta on tlen nochijtikatka, yej hasta ijkuak opeu kiaui niman on atl nochimej okinmiktij” (Mateo 24:38, 39).





3

Biblia kinteneua achijsitsintin tlaltikpakchanejkej akin okitekichiuilijkej toTajtsin ijkuak yopanoka Apachiuilistli. Semej itech yejuamej katka Abrahán, akin okixmatkej ken akin iuan onouikak Jehová. ¿Tleka Jehová okitokayoti ken akin iuan onouikak? Tla tikipiya mokoneuan, xkinpaleui makitakan ika Jehová najmana inpampa niman ika kineki kinpaleuis. Ijkon ken Abrahán niman oksekimej akin oyolmelaujkanenkej, ken Lot niman Jacob, tejuamej kuajli tikmatstokej ika uelis tiktlajtlaniliskej Jehová matehpaleui niman ika kichiuas nochi tlen yokijto.



TLAMACHTILTIN TLEN NONEKI XMATI


- Matikchiuakan nochi tlen Jehová techtlajtlanilia, maski matechtekiyomaka.
- Xonka tlen melak ueyi kijtosneki ken touikaskej iuan toTajtsin.
- Jehová kita ika melak noneki matitetlapopoluikan niman matoyolseuikan nimantsin.

7 Torre tlen onochijchiuj ipan Babel

Ijkuak yopanoka Apachiulistli, ikoneuan Noé iuan insiuauan okinpixkej miyekej inkoneuan. Inchanejkauan onomiyekilijkej niman ochantitoj miyekan ijkon ken Jehová okiminauatijka.

San ika, sekimej xokitlakamatkej Jehová. Yejuamej okijtokej: “Matikchijchiuakan se ueyikalpan niman ompa matokauakan. Matikchijchiuakan se torre melak uejkapan tlen maajsi iluikak. Kuakon nochimej techixmatiskej”.


“On yejuan noueyilia, maski xkinekis noknelis, niman on yejuan noknelia, kiueyiliskej” (Lucas 18:14).



Jehová xokuelitak tlen kichiujtoyaj, ika yejon okintelti. ¿Tikmati kenon okichiu? Nimantsin yejua okichiu ika maka sa noiiki tlajtolin matlajtokeran. Pampa xok nasikamatijaj, okiteltijkej tlen kichijchiujtoyaj. Yejon ueyikalpan onoixmat ken Babel, tlen kijtosneki “xnasikamatilo”. Tlaltikpakchanejkej opeuj kisaj niman ochantitoj ipan nochi tlaltikpaktli. San ika, ok kichiujtoyaj tlen xkuajli kampa oyajkej. ¿Nemiskia yakaj akin kitlasojtlaskia Jehová? Tikitaskej ipan okse tlamachtijli.

Tlajtoltilistin: ¿Tlenon okichiukej tlaltikpakchanejkej akin nemiya Babel?
¿Kenon okintelti Jehová?

Génesis 11:1-9.



8 Abrahán iuan Sara okitlakamatkej toTajtsin

Nisiuj itech Babel onkatka se ueyikalpan itoka katka Ur, ompa xkiueyichiuayaj Jehová, kinueyichiuayaj miyekej tajtsitsintin. San ika, nemiya se tlakatl ipan Ur akin san Jehová kiueyichiuaya. Itoka katka Abrahán.

Jehová okijli Abrahán: “Xkaua mochan iuan mochanejkauan niman xuiya kampa nimitsititis”. Noijki okijli: “Timochiuas se ueyikalpan, niman nikinmakas tlen kuajli miyekej taltikpakchanejkej ipan nochi taltikpaktli mopampa”.

Abrahán xkimatiya kanon kititlantoya Jehová, san ika, tlaneltokaya itech. Abrahán; isiuauj, Sara; Taré akin itaj niman isobrinno Lot okitlakamatkej Jehová ijkuak okiyektlalijkej tlen kipiayaj niman opeuj yauej uejka.



Abrahán kipiaya 75 xiuitl ijkuak yejua niman ichanejkauan oajsikej kampa toTajtsin kinekiya. Itoka katka Canaán. Ompa toTajtsin okinots Abrahán niman okijli: “Nochi yejuin tlajli tlen tikita moyeualiyán, nikinmakas mokoneuan”. San ika, Abrahán iuan Sara melak iuejueyimej katkaj niman xkiplayaj nion se inkoneuj. ¿Kenon kichiuaskia Jehová tlen yokijtoka?

Tlajtoltlistin: ¿Tlenon okitlajtlanili Jehová makichiuá Abrahán?
¿Tlenon Jehová okijli Abrahán kichiuaskia ipampa?

Génesis 11:29-12:9; Hechos 7:2-4; Gálatas 3:6; Hebreos 11:8.

“Ipampa on itlaneltok, Abraham okitlakamat Dios [...] para yas ne tetlalpan kampa okitlalij ipan ipromesa kimakas ken herencia. Yejua okis ne kampa chantiya niman oyaj, maski xkimatiya kanon yaya” (Hebreos 11:8).





9 ¡Aman kema kipiayaj se inkoneuj!

Abrahán iuan Sara ikipiayaj miyek xiuitl ika ononamiktijkaj. Yejuamej okikaujteujkej se kuajli ikal tlen kipiayaj Ur niman aman san nokajkaltiyaj. San ika, Sara xokualan pampa tlaneltokaya itech Jehová.

Sara melak kinekiya kipiayas ikoneuj, yejua okijli Abrahán: “Tla notekipanojkauj Agar kipiaskia ikoneuj, kentla nokoneuj yeskia”. Sakin, Agar okipix se ikoneuj. Okitokayotijkej Ismael.

Miyek xiuitl sakin, ijkuak Abrahán kipiaya 99 xiuitl niman Sara 89, yeyimej tlakamej okintlajpalotoj. Abrahán okinnots manoseuikan niman matlakuakan itsintlan se kojtlí. ¿Tikmati akinomej katkaj? ¿Katkaj iluikaktekitkej! Yejuamej okijlikej Abrahán: “Xiuitl tlen uajlauj, ken ipan yejuin tonajli, tejua iuan mosiuauj nenkipiyaskej nemokoneuj”. Sara uajtlakaktoya kalijtik. Ijkuak okikak yejon, ipan iyojlo ouetskak niman otlanemili: “¿Yemelak uelis nikpiyas nokoneuj maski melak inilamajtsin?”.

Ipan okse xiuitl, Sara okipix ikonetsin ijkon ken iiluikaktekitkauj Jehová okijtoka. Abrahán okitokayoti Isaac, tlen kijtosneki “uetskani”.

“Ipampa on itlaneltok, Sara okiselij on chikaualistli para onochiu nantli [...] pampa okineltokak ika Dios kichiuas ken okitlalij ipan ipromesa” (Hebreos 11:11).

Ijkuak Isaac kipiaya kanaj makuijli xiuitl, Sara okitak ika Ismael kipiypinauhtiaya. Yejua kinekiya kitlajpiyas ikoneuj, kuakon okitlajtlanilito Abrahán uejka makintitlani Agar iuan Ismael. Kachtopa, Abrahán xokinek kichiuas. San ika, Jehová okijli Abrahán: “Xkaki Sara. Nejua niktalajpiyas Ismael. San ika, nochi tlen yonikijto, ipampa Isaac nochiuas”.

Tlajtoltilistin: ¿Tlenon okichiuj Sara ijkuak okinkak iluikaktekitkej akin okinotskej Abrahán?
¿Kenon Jehová okitlajpix Isaac?

Génesis 16:1-4, 15, 16; 17:25-27; 18:1-15; 21:1-14;
Hebreos 11:11.





10 **Xkilnamiki isiuauj Lot**

Lot chantiya Canaán, iuan itío Abrahán. Inyolkauan xok ueliyaj san sekan nemiskej pampa melak yonomiyekilikaj. Kuakon, Abrahán okijli Lot: “Xok uelis san sekan tinemiskej. Nimitstlajtlanilia xtlapejpeni kanon tikneki tias niman nejua oksekan nias”. ¿Xmelak ika Abrahán yolkuajli katka?

Lot okitak tlajli nisiuj ueyikalpan Sodoma tlen melak kualtsin katka. Melak onkatka atl niman tlaxoxojkan. Kuakon okitlapejpeni ompa onchantis niman okinuikak ichanejkauan.

Akin chantiyaj Sodoma niman ueyikalpan Gomorra tlen nisiuj onkatka, melak xkuakualtin katkaj. Ika yejon, toTajtsin okijto kinxoxotonis. San ika, toTajtsin kinekiya kimakixtis Lot niman ichanejkauan, ika yejon okintitlan ome iluikaktekitkej makimijlitij: “¡Xmotlasiuitikan! ¡Xkisakan itech yejuin ueyikalpan! ¡Jehová kixoxotonis!”.

Lot xnimantsin okis, ok uejkauiya. Ika yejon, iluikaktekitkej okajsikej ipan ima Lot, isiuauj iuan ichpochuan niman okinkixtijkej nimantsin itech ueyikalpan. Okimijlikej: “¡Xcholokan! ¡Ijkon xnenmiskej niman maka xontlachiakan tlakuitlapan! Tla nemontlachiay tlakuitlapan nenmiskej”.

Ijkuak oajsikej ipan ueyikalpan itoka Zóar, Jehová okichiuaj mauetsiki tlitl niman azufre ipan Sodoma niman Gomorra.

“Xkelnamikikan tlinon ipan onochiu isiuau Lot” (Lucas 17:32).

Yejon ome ueyikalpamej opopoliujkej. Isiuauj Lot xokitlakamat Jehová, oontlachix tlakuitlapan niman onokuep teistatl. San ika, Lot niman ichpochuan omakiskej pampa okitlakamatkej Jehová. Melak onoyolkokojkej ika inchanejkauj xotetlakamat. San ika, pakiyaj pampa okitlakamatkej itlanauatiluan Jehová.

Tlajtoltlistin: ¿Tleka toTajtsin okinpopolo ueyikalpamej Sodoma niman Gomorra?
¿Tleka isiuauj Lot onokuep teistatl?

Génesis 13:1-13; 19:1-26; Lucas 17:28, 29, 32; 2 Pedro 2:6-9.



11 Notlatlata itlaneltokil Abrahán

Abrahán okimachti ikoneuj Isaac makitlasojtla Jehová niman makineltoka nochi tlen kijtousa. San ika, ijkuak Isaac kipiaya kanaj 25 xiuitl, Jehová okitlajtlanili Abrahán makichiua itlaj tlen melak ouijtika. ¿Tlenon katka?

ToTajtsin okijli Abrahán: “Nimitstlajtlanilia, xkuika mosentekoneuj niman xnechuentlalili ipan se tepetl tlen nokaua Moria”. Abrahán xkimatiya tleka Jehová okitlajtlanili yejon. Maski ijkon, yejua otetlakamat.

Uajmostla ika kualkan, Abrahán okinuikak Isaac niman ome itlakeualuan ipan tepetl tlen nokaua Moria. Yeyi tonajli sakin, ouel okitakej tepemej. Abrahán okimijli itlakeualuan makinchiakan, pampa yejua iuan Isaac ontlauentlaliskiaj. Abrahán okitkik cuchillo niman ikoneuj okimamalti tlikojtli. Isaac okitlajtolti itaj: “¿Kanon nemi yolki tlen tikuentlaliskej?”. Abrahán okinankili: “Nokoneuj, Jehová techmakas”.

Ijkuak oajsikej ipan tepetl, okichijchiujkej se tlaixpan. Kuakon Abrahán okimasalo niman okikxisalo Isaac. Sakin okitlejkolti kampa kiuentlaliskia.

Abrahán okajsik cuchillo. Kuakon, iiluikaktekitkauj Jehová okuajtsajtsili itech iluikak: “¿Abrahán! ¡Maka itlaj tikchiuilis mokoneuj! Aman nikmatstika ika tikpiya motlaneltokil



itech toTajtsin pampa otiknek tikuentlalis mokoneuj”. Kuakon, Abrahán okitak se borrego tlen saliujoya kampa tlakoyoj. Yejua nimantsin okimakauj Isaac niman okiuentlali borrego.

Itech yejon tonajli ika tlayekapan, Jehová okitokayoti Abrahán ken akin iuan nouika. ¿Tikmati tleka? Abrahán okichij nochi tlen Jehová okitlajtlanili maski xkasikamatiya tleka kitlajtlaniliaya yejon.

Jehová oksejpa okijli Abrahán: “Nimitsteochiuas niman nikinmiyekilis mokoneuan”. Yejuin kijtosnekiya ika ipampa ichanejkauan Abrahán, Jehová kinteochiuaskia nochimej akin kipiayaj kuajli inyojlo.

Tlajtoltlistin: ¿Kenon okiteititi Abrahán ika kineltokaya Jehová?
¿Tlenon okijto Jehová kichiuaskia ipampa Abrahán?

Génesis 22:1-18; Hebreos 11:17-19; Santiago 2:21-23.



“Dios sanoyej okintlajsojtlak on tlatikpaktlakamej hasta okitemakak isenteKonetsin para nochi on akin kineltokas xpoliuis, yej kipias yenkuik nemilistli para nochipa” (Juan 3:16).



12 Jacob kiselia herencia

Isaac kipiaya 40 xiuitl ijkuak ononamikti iuan Rebeca. Isaac melak kitlasojtlaya. Sakin, okipixkej ome inkoneuan kouatsitsintin.

Akin yakatstiu j okitokayotijkej Esaú niman akin ompa kontokaya, Jacob. Esaú melak kuelitaya kistinemis ipan tepetl niman ueliya kinmajsiya yolkamej. San ika, Jacob kuelitaya nemis ichan.

Ipan yejon tonaltin, tekoneuj akin yakatstiaya kiseliaya tlaltin niman tomin xijkon ken ikniuan ijkuak mikiya intaj. Yejon katka se herencia. Itech ichanejkauan Isaac, yejuin herencia, noijki kijtosnekiya ika kiseliskiaj tlen Jehová okijlika Abrahán kimakaskia. Esaú xkitlasojkaitaya tlen yonoijtoka nochiuaskia, san ika, Jacob kimatstoya ika melak ueyi kijtosnekiya.

Se tonajli, Esaú oajsik ichan niman melak siaujtoya ika osetonalo okiyejyeko kinmajsis yolkamej. Yejua okijneuk uelik tlakuajli tlen Jacob kichijchiujtoya niman okijli: “¡Melak napismiki! ¡Xnechmaka achijtsin tlen otikchijchiuj, yejon tlen chichiliujtok!”. Jacob okijli: “Maski, san ika, kachtopa xnechijli ika uelis nikpiyas moherencia”. Esaú okinankili: “¡Xnechajmana noherencia! ¡Uelis timokauilis! Nejua san nikneki nitlakuas”. ¿Tiknemilia ika Esaú tlamachilise ijkuak ijkon okichij? Ka, Esaú otetlayokoli tlen melak tlasojtiya san ipampa se tlakuajli.



Ijkuak Isaac iueuentsin katka, oajsik tonajli ijkuak nonekiya kiteochiuas ikoneuj akin yakatstiuuj. San ika, Rebeca okipaleui Jacob, ikoneuj akin pitentsin, makiseli tlateochiualistli. Ijkuak Esaú okimat, melak okualan niman okijto kimiktis. Isaac iuan Rebeca kinekiyaj kitlajpiyaskej Jacob, kuakon okijlikej: “Xuiya niman xmokaua kampa Labán, ikniuj monan, hasta ijkuak manoyolseui Esaú”. Jacob okinkak itajuan niman ocholoj, ijkon onomakixti.

Tlajtoltlistin: ¿Tleka Esaú niman Jacob xsa noijski katkaj?

¿Tleka Esaú xokiseli tlateochiualistli niman Jacob kema?

Génesis 25:20-34; 27:1-28:5; Hebreos 12:16, 17.

“¿Tlinon ika kipaleuis se tlakatl tla yejua kinoyaxkatis nochi tlen onkaj ipan in tlaltikpaktli niman kipolos ialma? [...] Pampa xitlaj onkaj yejuan se tlakatl uelis ika kitlaxtlauas ialma” (Marcos 8:36, 37).



13 Jacob niman Esaú noyolseuiyaj

Jehová okijli Jacob ika kitlajpiyaskia ijkon ken okintlajpix Abrahán iuan Isaac. Jacob onochanti kampa itoka katka Harán, ompa ononamikti, okipix miyekej ikoneuan niman miyek tlemach.

Sakin, Jehová okijli Jacob: “Xmokuropa mokalpan”. Kuakon Jacob niman ichanejkauan opeuj nokuepaj. Ipan ojtli sekimej itlakeualuan Jacob okijlikej: “Mokniuj Esaú iuajlatika niman kinuajuika 400 tlakamej”. Jacob nomojtiaya tla Esaú itlaj kinchiuiliskia yejua iuan ichanejkauan. Ika yejon, okitlajtlanili Jehová: “Nimitstlajtlanilia xnechmakixti itech nokniuj”. Uajmostla Jacob okititlanili Esaú se tetlayokolijli: miyek borregos, chivos, uakaxtin, camellos niman polokomej.

Ika yeuajli ijkuak Jacob iselti onokauj, ;okitak se iluikaktekitketl! Iluikaktekitketl opeuj iuan noxixikoua. Yejuamej onoxixikojkej hasta ijkuak otlanes. Maski okikokojkej, Jacob xonosiaujkauj. Iluikaktekitketl okijli: “Xnechkautili maniuiya”. San ika, Jacob okijli: “Ka. Tla xtinechteochiua, xnimitskautilis”.

Kuakon iluikaktekitketl okiteochiuj Jacob, aman yejua kimatiya ika Jehová xkikautiliskia Esaú itlaj makichiui.

“Xkintlajsojtlakan on nemotlauelikniuan [...]. Xchiuakan oración para on yejuan mechchiuilij on tlen xkuajli [...]. Ijkon xchiuakan para nesis ika nentekoneuan itech on nemoTajtsin iluikakchanej” (Mateo 5:44, 45).



Yejon kualkan, Jacob oontlachix uejka niman okitak Esaú niman 400 tlakamej. Jacob oyaj iyekapan ichanejkauan niman onotlakuankets chikometipan ixpan ikniuj. Esaú onotlalo niman okikechnapalo Jacob. Omemej opeuj chokaj niman onoyolseuijkej. ¿Kenon tiknemilia onomachili Jehová itech ken Jacob okiyektlali tlauejli?

Sakin, Esaú onokuep ichan niman Jacob noijki oyaj ichan. Jacob okipix 12 ikoneuan: Rubén, Simeón, Leví, Judá, Dan, Neftalí, Gad, Aser, Isacar, Zabulón, José niman Benjamín. Jehová kimakixtiskia ikalpan itechkopa José, semej itech ikoneuan Jacob. ¿Tikmati kenon okichiuj? Matikitakan.

Tlajtoltlistin: ¿Tleka Jacob okiseli tlateochialistli? ¿Kenon Jacob onoyolseui iuan ikniuj?
Génesis 28:13-15; 31:3, 17, 18; 32:1-29; 33:1-18; 35:23-26.





4

Ipan yejuin sección titlajtoskej itech José, Job, Moisés niman israelitas. Nochimej yejuamej Satanás melak okintlajyouilti. Sekimej okinchiuilijkej tlen xkinamiki, okintsajkej, okintekitiltijkej ken tlakeualtin niman okijyouijkej mamikikan inchanejkauan. Maski ijkon, Jehová miyek ken okintlajpix. Tla tikinpiya mokoneuan, xkinpaleui makasikamatikan kenon yejuamej xokipolojkej intlaneltokil maski otlajyouijkej.

Jehová okitekitilti majtlaktli tlajyouilistin, ijkon okiteititi ika melak kojtik xijkon ken intajtsitsinuan egipcios. Kuajli xteititi kenon yeuejkauí Jehová okitlajpix ikalpan niman kenon kichiua aman.



TLAMACHTILTIN TLEN NONEKI XMATI

- José okixnamik auilnemilistli pampa kitlasojtlaya Jehová.
- Maski Job melak otlajyoui, xokikauili ika yejuin makixelo itech Jehová.
- Maski san kanon nemiya, Moisés xkeman okilkauj ika kitekichiuiiayaya toTajtsin.

14 Se tlakeuajli akin okitlakamat toTajtsin

Se itech ikoneuan Jacob akin pipitikej, katka José. Ikniuan akin iuejueyimej okitakej ika intaj melak kitlasojtlaya. ¿Kenon tiknemilia onomachilijkej? Okinexikolitakej niman okitlauelitakej José. Se tonajli, okipix seki temiktli tlen xkeman kitemikiya niman okimijli ikniuan. Yejuamej okinemilijkej ika yejon temiktli kijtosnekiyaj ika se tonajli notlakuantelketsaskiaj ixpan. Ika yejon, ¿melak okitlauelitakej!

Se tonajli, ikniuan José kintlajpixtoyaj borregos nisiuj ueyikalpan Siquem. Jacob okititlan José makitati tlenon kichiujtoyaj. Ijkuak uejka okontakej José, opeuj noijliaj: “Nikan uajlauj akin temikini. ¿Matikmiktikan!”. Kuakon okajsikej niman okontlajkalkej ijtik

se pozo. San ika, Judá okijto: “¿Maka nenkimiktiskej! Matiknemakakan ken se tlakeuajli”. Kuakon okinemakakej José ika 20 plata tomin itech tlasemankej madianitas akin yayaj Egipto.

Ikniuan okipolaktijkej itlaken ijtik iyesyo se chivo, okititlanilijkej intaj niman okijlikej: “Yejuin tlakentli, ¿xiyaxka mokoneuj?”. Jacob okinemili ika se yolki tlen tekuanik okimikti José. Yejua melak onoyolkoko. Xakaj ueliya kiyolseuiaya.

Ijkuak oajsikej Egipto, Potifar se akin ueyixtoya okikouj José ken itlakeual. San ika, Jehová nemiya iuan José. Potifar okitak ika José melak kuajli tekitiya niman ika ueliskia itech tlaneltokas. Xouejkauj José okitlalijkej makitlajpiya nochi tlen iyaxka Potifar.

Isiuauj Potifar okitak ika José kojtik niman kualtsin katka. Mojmostla kijliaya José iuan manoteka. ¿Tlenon kichiuaskia José?





Xokikak, yejua okijli: “¡Ka! Yejon xkuajli. Noteko notech tlaneltoka, niman tejua tiisuiuj. Tla mouan ninoteka, ¡nitlajtlakos ixpan toTajtsin!”.

Se tonajli isiuuj Potifar okinek kichiualtis José iuan manoteka. Yejua okajsik ipan itlaken, san ika, José ocholaj. Ijkuak Potifar onokuep ichan, yejua okikajkayauj, okijli ika José kinekiya kichiualtis iuan manoteka. Potifar melak okualan niman okitsauk José. San ika, Jehová xokilkauj.

Tlajtoltilistin: ¿Tlenon okichiuilijkej ikniuan José?
¿Tleka okitsajkej José?

Génesis 37:1-36; 39:1-23; Hechos 7:9.

“Yejua ika xmoyolyemanilikan ixpan Dios yejuan kipia nochi poder, niman mechmakas tetlakaitalistli ipan on tonajli yejuan okitlapejpenij” (1 Pedro 5:6).





15 Jehová xkeman okilkauj José

Ijkuak José tsauktoya, Faraón, tekiuaj itech Egipto, okipix seki temiktli niman xakaj ueliya kitomiliaya. Se itekipanojkauj faraón okijli ika José ueliskia kitomiliskia tlenon kijtosnekiya tlen okitemik. Faraón nimantsin otlanauati makanatij.

Faraón okitlajtolti: “¿Uelis tinechtomilis tlen oniktemik?”. José okijli: “Egipto kipiayas miyek tlakuajli chikome xiuitl, sakín uajlaskej chikome xiuitl kampa onias apistli. Xtlapejpeni yakaj akin tlamachilise makisentlali tlakuajli niman ijkon mokalpan xmikis ika apistli”. Faraón okinankili: “¡Tejua nimitstlapejpenia! ¡Tejua akin ika ome tiueyixtos Egipto!”. ¿Kenon okimat José tlenon kijtosnekiyaj tlen okitemik Faraón? Jehová okipaleui.

José okisentlali tlakuajli chikome xiuitl. Sakín, nochiuiyan opeuj apistli ijkon ken yokijtoka. Nochiuiyan kuajtlakouiliayaj ika tlakuajli. Itaj José akin itoka katka Jacob okitekakili ika ipan Egipto onkatka tlakuajli, ika yejon, okintitlan majtlaktli ikoneuan makikouatij.

Ikoneuan Jacob oyajkej itech José, yejua nimantsin okimixmat. San ika, yejuamej xokixmatkej. Onotlakuanketskej ixpan ijkon ken okitemik ijkuak telpochtli katka. José kinekiya kimatis tla ikniuan ok tetlauelitayaj. Kuakon yejua okimijli: “Nemejuamej san onenmixtakatlachiakoj. Nenkinekij nenkimatiskej kenon uelis nenkixoxotoniskej topaís”. Yejuamej okijtokej: “¡Ka! Tejuamej 12 tikniujtin akin tichantij Canaán. Se yomik, niman akin xokoyotl nemi iuan totaj”. José okimijli: “Xnechuajuikilikan nemokniuj akin

xokoyotl, ijkon nejua nimechneltokas”.
Kuakon yejuamej onokuepkej ichan intaj.

Ijkuak ichanejkauan Jacob okitlamijkej tlakuajli, oksejpa okintitlan ikoneuan Egipto. Aman okuikakej imikniuj Benjamín akin xokoyotl. Pampa kinekiya kintlatlatas ikniuan, José okiyan icopa tlachijchiujtli ika plata ijtik icostal Benjamín kampa kitkiya xinachtli niman okijto ika kinekiyaj kichtekiliskej. Ijkuak itekipanojkauan José okinextijkej copa ijtik icostal Benjamín, ikniuan melak omojkatlachixkej. Okitlajtlanilijkej José makintlajtlakolmaka yejuamej maka Benjamín.

Ijkon okimat José ika ikniuan yonopatlakaj. José xok ouel okitelti tlen kimachiliaya, opeuj choka niman okimijli: “Nejua niJosé. ¿Ok yoltika notaj?”. Ikniuan melak otlamojkaitakej. Yejua okimijli: “Maka xmotlajtlakoltikan ika tlen oninexchiuilijkej. ToTajtsin yejua akin onechajtitlan nikan niman ijkon manimechmakixti. Aman xmotlasiuitikan xkuajuikakan notaj”.

Ikniuan onokuepkej inchan okijlitoj itaj tlen kuajli opanok niman okuikakej Egipto. Maski yopanoka miyek xiuitl, José niman itaj oksejpa onosentlalijkej.

Tlajtoltlistin: ¿Kenon Jehová okipaleui José?
¿Kenon okiteititi José ika yokintlapopoluika ikniuan?

Génesis 40:1-45:28; 46:1-7, 26-34; Salmo 105:17-19; Hechos 7:9-15.

“Pero tla on oksekimej xnenkintlapojpoluiliaj on tlen xkuajli mechchiuliaj, nemoTajtsin no xmechtlapojpoluillis on tlen xkuajli onenkichijkej” (Mateo 6:15).



16 ¿Akinon katka Job?

Ipan ueyikalpan Uz, onen se tlakatl akin kiueyichiuaya Jehová. Itoka katka Job. Yejua kipiaya miyek tlemach tlen patioj niman ifamilia ueyi katka. Yolkuajli katka niman kinpaleuiaya akin xtlaj kipiayaj, siuamej kaualtsitsintin niman kokonej akin iknotsitsintin. Job kichiuaya tlen kuajli, ¿tiknemilia ika ipampa yejuin xkeman kipyaskia tlaueltin?

Job xkimatiya, san ika, Satanás kitstoya. Jehová okijli Satanás: “¿Yotikitak notekipanojkauj Job? Xnemi okse ken yejua ipan tlaltikpaktli, nechkaki niman kichiuaya tlen melajki”. Satanás okinankili: “Kema, Job mitstlakamati. Tejua tiktlajpiya niman tikteochiua. Tikmaka tlaltin niman yolkamej. Xkuili nochi niman xok mitsueyichiuas”. Jehová okijli: “Uelis tiktlatlata. San ika, maka tikmiktis”. ¿Tleka Jehová okikauili Satanás makitlatlata Job? Yejua kimatstoya ika Job xkitlalkauiskia.

Satanás miyek ken okitlatlatak Job. Kachtopa, okintitlan akin kimixmatiyaj ken sabeos, makichtekilitij ipolokouan niman iuakaxuan. Kuakon, tlitl okinmikti nochi iborregos Job. Oksekimej akin kimixmatiyaj ken caldeos okichtekilijkej icamellos. Noijki okinmiktijkej itekipanojkauan akin kintlajpixtoyaj iyolkauan. Sakin opanok tlen melak xkuajli. Nochimej ikoneuan omijkej pampa inpan ouets kajli

kampa tlakuajtoyaj.

Job melak onoyolkoko, san ika, xokikauj ika kiueyichiuaya Jehová.

Satanás kinekiya ika Job ok melak matlajyoui, ika yejon, okichiuaj ika ipan nochi itlalnakayo



**“Nemejuamej
nenkakinij kenijki
Job okixikoj on
tlajyouilistli ikan
yolseuilistli niman
kenijki toTeko
okitiochiu ika
on tlen kuajli
ijkuak yotlajyouij”
(Santiago 5:11).**

makisikan tsotsomej. Job melak kikokouaya. Yejua xkimatiya tleka kixnamiktoya nochi yejuin. Maski ijkon, Job xokikauj ika kiueyichiuá Jehová. ToTajtsin okitak yejon niman okiyolpakti tlen okichiu Job.

Satanás okintitlan yeji tlakamej makitlatlatakan Job. Yejuamej okijlikej: “Tejua otitlajtlako niman tikneki tikiyanas, toTajtsin aman mitstlajtlakolmaka”. Job okijto: “Xonikchiuj tlen xkuajli”. San ika, sakín okinemili ika Jehová kitlajyouiltijtoya iuan okijto ika xkichiuilijtoya tlen melajki.

Se telpochtli itoka katka Elihú kuajli tlakaktoya. Kuakon okijto: “Nochi tlen onenkijtokej xkuajli. Jehová melak ueyixtok xijkon ken tiknemiliaj. Yejua xkeman kichiuá tlen xkuajli. Yejua nochi kitstika niman kinpaleuiya tlaltikpakchanejkej ijkuak kipiayaj ajmantli”.

Kuakon Jehová okinots Job. Yejua okijli: “¿Kanon tinemiya ijkuak onikchijchiuj iluikak niman tlaltikpaktli? ¿Tleka tikijtoua ika xnimelajki? San titlajtoua, nion xtikmati tlenon panotika”. Job okiseli ika onopopolo niman okijto: “Oninopopolo. Onikteakalijka motech, san ika, aman melauak nimitsixmati. Xtlaj onka tlen xueli tikchiua. Xnechtlapopolui ipampa tlen onikijto”.

Ijkuak otlankej tlatlatalistin, Jehová okipajti Job niman okimakak melak miyek xijkon ken kipiaya kachtopa. Job onen melak miyek xiuitl niman oyolpak. Jehová okiteochiu pampa okitlakamat maski okixnamik tlen melak ouijtika. ¿Tikchiuas ken Job niman ok tikueyichiuas Jehová maski san tlenon tikixnamikis?

Tlajtohtilistin: ¿Kenon Satanás okitlatlatak Job?
¿Kenon Jehová okiteochiu Job?

**Job 1:1-3:26; 4:7; 32:1-5; 34:5, 21; 35:2; 36:15, 26;
38:1-7; 40:8; 42:1-17.**



17 Moisés okitlapejpeni kiueyichiuas Jehová

Ipan Egipto, ichanejkauan Jacob okimixmatkej kentla israelitas. Sakin ijkuak yomijkaj Jacob niman José, se yenkuik faraón opeuj tekiuajti. Yejua nomojtiaya ika israelitas nochiujtoyaj melak kojtikey xijkon ken egipcios. Ika yejon, Faraón okichiuaj ika israelitas matekitikan ken tlakeualtin. Okinchiualti makichijchiuakan miyek xantli niman melak kintekimiktiaya. Maski israelitas melak kintekimiktiayaj, nomiyekiliayaj. Pampa Faraón xokuelitak yejon, otlanauati makinmiktikan nochimej tlakakonetsitsintin. ¿Tiknemilia kenon melak nomojtiayaj israelitas?

Se siuatl israelita itoka katka Jokébed okipix se tlakakonetsintli melak kualtsin. Pampa kinekiya kitlajpiyas, okitlali ijtik se chikijtli niman okiyan ipan atentli Nilo kampa onkatka miyek akatl. Míriam, ikniuj yejuin konetsintli nemiya nisiuj, ijkon kitaskia tlenon panoskia.

Ichpoch faraón onaltiko ipan atentli niman okitak chikijtli. Ijtit okinexti se konetsintli akin



chokaya niman okikneli. Míriam okitlajtolti: “¿Tikneki maniktejemoti se siuatl akin mamitsiskaltili?”. Ijkuak ichpoch faraón okijto ika kema, Míriam okuajuikak inan. Ichpoch faraón okijli Jokébed: “Xkuika yejuin konetsintli, xnechiskaltili, nimitstlaxtlauilis”.

Ijkuak konetl onoskalti, Jokébed okuikili ichpoch faraón, yejua okitokayoti Moisés niman okiskalti kentla ikoneuj. Moisés onoskalti ken ikoneuj faraón niman ueliskia kipiayas nochi tlen kinekiskia. San ika, xkeman okilkauj Jehová. Moisés kimatiya ika xkatka egipcio, katka israelita. Niman okitlapejpeni kitekichiuilis Jehová.

Ijkuak kipiaya 40 xiuitl, Moisés okitlapejpeni kipaleuis ikalpan. Se tonajli okitak se egipcio kiuisokiya se tlakeuajli israelita. Ijkuak okitak yejon, Moisés okimikti egipcio ijkuak chikauak okiuisok. Niman okixalpacho. Ijkuak Faraón okimat, okiyejyeko kimiktis Moisés san ika yejua ocholaj uejka, oyaj Madián. Ompa Jehová okitlajpax.

Tlajtoltlistin: ¿Tlenon kinchiuiliayaj israelitas ipan Egipto? ¿Tleka Moisés ocholaj itech Egipto?

Génesis 49:33; Éxodo 1:1-14, 22; 2:1-15; Hechos 7:17-29; Hebreos 11:23-27.

**“Ipampa itlaneltok Moisés
[...] xonokalaktij nemis
ken tekoneu itech ichpoch
on yejuan rey ne Egipto.
Yej okitlapejpenij tlajyous
ne inuan on ikoneuan Dios”
(Hebreos 11:24, 25).**



18 Uitskojtlí tlen tlikuitika

Moisés ochantik Madián 40 xiuitl. Ompa ononamikti niman okípíx ikoneuan. Se tonajli, ijkuak kitlajpiaya iborregos nisiuj tepetl Sinaí, okítak itlaj tlen okimojkatlachialti. Se uitskojtlí tlikuitika, san ika, ¡xtlatlaya! Ijkuak Moisés ononisiui, niman ijkon kuajli kítas, okíkak se tlajtojli tlen okis ijtik uitskojtlí tlen okijto: “¡Moisés! Maka sa xmonisiui. Xmokixtili mokakuan pampa tiijkatok ípan tlajli chipauak”. Jehová akín kinotstoya ika se iluikaktekítetl.

Moisés onomojti kuakon onoxayakatlapacho. Tlajtojli okijto: “Yonítak kenon tlajyouiyaj israelítas. Nikinmakixtis intech egipcios niman nínuiikas kampa tlakualkan. Tejua tikyekanas nokalpan niman tijkixtis itech Egipto”. ¿Tíknemíliá kenon Moisés melak otlamojkaitak?

Moisés okítlajtolti: “¿Tlenon níkiytos tla kalpan nechtlajtoltia akínon onechtítlan?”. ToTajtsín okínankíli: “Xkímíjli ika Jehová, íTajtsín Abrahán, íTajtsín Isaac, niman íTajtsín Jacob omitstítlan”. Moisés okíjli: “¿Níman tla kalpan xnechkakí?”. Jehová okítiti ika kípaíleuiskía. Okíjli makítlajkali ítlakouj ípan tlajli. Kuakon, ¡ítlakouj onokuep kouatl! Ijkuak Moisés okíkítski kouatl ípan íkúítlapil, oksejpa onokuep tlakotl. Jehová okíjli: “Íjkuak tíkchiuas yejuín mílagro, tíkteítitis ika onímítstítlan”.

Moisés okijto: “Nejúá xuéli kuajli nítlajtóa”. Jehová okíjli: “Nejúá nímitsíjlis tlenon tíkiytos, niman níktítlanis mokníuj Aarón mamítpaleuí”. Aman ika kímatstoya ika Jehová kípaíleuiskía, onokuep Egipto niman okuíkák ísíuauj niman ikoneuan.

Tlajtoltilístin: ¿Tlenon okítak Moisés ijkuak kitlajpiaya iborregos?
¿Tlenon okíjli Jehová makíchiua Moisés?

Éxodo 3:1-4:20; Hechos 7:30-36.

“Maka sa xkomatstíakan tlinon nenkiytoskej noso keníjki nenkiytoskej, pampa íjkuak ajsis on hora para nentlajtoskej, Díos mechkakas tlinon nenkiytoskej” (Mateo 10:19).





19 Kachtopa yeyi tlajyouilistin

Egipcios okinchiualtijkej israelitas matekitikan ken tlakeualtin. Jehová okititlan Moisés niman Aarón makijlitij Faraón: “Xkauili nokalpan mauiya, ijkon uelis nechueyichiuas ipan tlatluaktli”. Pampa noueyimatiya Faraón okijli: “Xnechajmana tlen Jehová kijtous niman xnikinkauilis mauiyas israelitas”. Kuakon Faraón okinchiualti melak chikauak matekitikan. Jehová itlaj kimachtiskia Faraón. ¿Tikmati kenon okichiuuj? Okititlan majtlaktli tlajyouilistin ipan Egipto. Jehová okijli Moisés: “Faraón xnechkaki. Ika kualkan yas kampa atentli Nilo. Xuiya niman xkijli ika pampa xokikauili mauiya nokalpan, atl tlen onka ipan nochi atentli Nilo nokuepas yestli”. Moisés okitlakamat niman okitato Faraón. Kuakon Faraón okitak ijkuak Aarón okiuitek Nilo ika itlakouj niman atentli onokuep yestli. Atentli opeuj molonia, atl xok ouel yakaj okonik niman michimej omijkej. San ika, Faraón ok xkinekiya kinkauilis israelitas mauiyas.



**“Nikinmachiltis nokojtilis
niman nochikaualis, niman noneki
kimatiskej ika nejua notoka Jehová”
(Jeremías 16:21).**

Opanok chikome tonajli, Jehová oksejpa okititlan Moisés makijliti Faraón: “Tla xtijkauilia nokalpan mauiya, Egipto temis ika temomej”. Aarón okajkok itlakouj niman temomej nochiuiyan onosemoyaujkej. Kinnexitiyaj ijtik kaltin, tlapechtin niman ipan tlen tlakuayaj. ¿Temomej nemiyaj nochiuiyan! Faraón okijli Moisés makitlajtlanili Jehová makitelti tlajyouilistli. Faraón okijto ika kinkauiliskia israelitas mauiyán. Kuakon Jehová okitelti tlajyouilistli, niman egipcios opeuj kisentlaliaj temomej tlen yomijkaj, miyek okinnechikojkej. Melak otlamoloniak. San ika, oksejpa, Faraón xokikauili kalpan mauiya.

Kuakon Jehová okijli Moisés: “Aarón makiuiteki tlajli ika itlakouj niman tlapoktli nokuepas jejenes noso sayolintsitsintin tlen tekuaj”. Nimantsin nochiuiyan onosemoyaujkej jejenes. Sekimej egipcios okijlikej Faraón: “Yejuin tlajyouilistli ualeua itech inTajtsin”. San ika, Faraón xokinkauili israelitas mauiyán.

Tlajtoltilistin: ¿Katlajua katkaj kachtopa yeyi tlajyouilistin?
¿Tleka toTajtsin okintitlan yejuin tlajyouilistin?

Éxodo 5:1-18; 7:8-8:19; Nehemías 9:9, 10.



20 Okseki chikuasen tlajyouilistin

Moisés niman Aarón okijlitoj Faraón tlen toTajtsin okimijli: “Tla xtijkauilia mauiya nokalpan, nimitstitlanilis ipan mopaís uejueyimej sayolimej”. Melak miyekej sayolimej okalajkej ijtik inkaluan egipcios: akin kipiayaj tomin niman akin xkipiayaj. Nochiuiyan nemiyaj sayolimej, san ika, ipan Gosén kampa nemiyaj israelitas, xnemiyaj. Yejuin ika nawi tlajyouilistli niman okseki tlen sakin opanokej san egipcios okintlajyouiltijkej. Faraón okitlajtlanili Moisés: “Xtlajtlanili Jehová makinkixti yejuin sayolimej. Kuakon mokalpan uelis yas”. San ika, ijkuak Jehová okinkixti, Faraón xokichiuj ken okijtoka. ¿Kemantika nopatlaskia Faraón?

Jehová okijto: “Tla Faraón xkikauilia mauiya nokalpan, inyolkauan egipcios kualoskej niman mikiskej”. Uajmostla yolkamej opeuj mikij. San ika, inyolkauan israelitas xomijkej. Maski ijkon Faraón onoueyimat, xokinek komintitlanis.

“Niman nemejuamej oksejpa nenkitaskej ika xsa noijki yakaj akin melajki itech akin xkuajli, se akin kitekichiuilia toTajtsin itech se akin xkitekichiuilia” (Malaquías 3:18).

Kuakon Jehová okinauati Moisés mauiya kampa Faraón niman makixini tlikonextli ipan ajakatl. Tlikonextli onokuep tlalpoktli ipan ajakatl niman oxiniko inpan egipcios. Tlalpoktli okichiuj ika egipcios niman inyolkauan makipiyakan tsotsomej tlen temalkisaj. Maski ijkon, Faraón xokinkauili israelitas mauiyan.



Jehová oksejpa okititlan Moisés makijliti Faraón: “¿Ok xtijkauilia nokalpan makisa? Mostla nikchiuas matesiui”. Uajmostla, Jehová okititlan tesiujtli, tlitl niman okichiu matlakomoni. Xkeman ijkon kiyauiya Egipto. Okijtlako nochi kojtin niman tlen okitokakej, san ika, xtlaj opanok Gosén. Faraón okijto: “¿Xtlajtlanili Jehová makitelti! Kuakon uelis nenyaskej”. San ika, ijkuak onotelti kiyaujtli niman tesiujtli, Faraón xokichiu tlen okijto.

Kuakon Moisés okijto: “Aman chapolimej kikuaskej nochi tlen okikauj tesiujtli”. Melak miyekej chapolimej okikaujkej nochi tlen onokauj itech tlen okitokakej niman kojtin. Faraón okijli: “Xtlajtlanili Jehová makinkixti chapolimej”. San ika, maski Jehová okinkixti chapolimej, Faraón ok onoueyimat.

Jehová okijli Moisés: “Xkajkokui moma iluikak”. Nimantsin otlayouatiak. Yeyi tonajli, egipcios xtlaj ouel okitakej. San israelitas kipiayaj tlauijli kampa nemiyaj.

Faraón okijli Moisés: “Tejua niman mokalpan uelis nenyaskej. San nemoyolkauan nenkikaujteuaskej”. Moisés okinankili: “Kipiya ika tikinuikaskej toyolkauan pampa tikinuentlaliliskej toTajtsin”. Faraón okualankatsajtsik: “¿Xkisa! Tla oksejpa nimitsita, nimitsmiktis”.

Tlajtohtlistin: ¿Katlajua okseki tlajyouilistin okintitlan Jehová?
 ¿Tleka xsa noijki katkaj kachtopa yeyi tlajyouilistin?

Éxodo 8:20-10:29.

21 Ika majtlaktli tlajyouilistli

Moisés okijli Faraón ika xok kiyejyekoskia oksejpa kitas, san ika, ijkuak iyaskia okijli: “Ipan tlajkoyeuajli, nochimej kachtopa tekoneuan itech Egipto, ken ikoneuj faraón hasta inkoneuan tlakeualtin, mikiskej”.

Jehová okimijli israelitas: “Xyektlalikan tlakuajli tlen san ipan yejon tonajli nenkichijchiuskej. Xmiktikan se borrego noso se chivo tlen makipiya se xiuitl niman iyeyso xtlalilikan iyeualiyán nemopuerta. Xtliuatsakan nakatl, xkuakan ika pan tlen xonakok. Xkakitokan nemotlaken, nemokakuan niman xtlamachiatokan. Yejuin yeuajli nimechmakixtis”. ¿Tiknemilia kenon melak opajkej israelitas?

Ipan tlajkoyeuajli, iiluikaktekitkauj Jehová oyaj ipan nochi kaltin tlen onkatkaj Egipto. Ipan puerta kampa xkiapiya yestli akin kachtopa tekoneuj omik. San ika, iluikaktekitketl okinpanaui kaltin tlen kipiayaj yestli. Ipan nochi ifamilias egipcios, akin miyek tomin kipiayaj niman akin xkiapiayaj, omik se inkoneuj. San ika, xomik ikoneuj nion se israelita.

Noijki ikoneuj faraón omik. Faraón xok okixiko. Nimantsin okimijli Moisés iuan Aarón: “¡Xkisakan!

“Nejua onimitstlaliy tirrey, san para niuelis nikpantlantis nopoder itechkopa on milagros yejuan mopan nikchius. Niman ijkin nochimej kimatiskej akin nejua imanyan nochi in tlatikpaktli” (Romanos 9:17).





¡Xuiyan niman xueyichiuakan nemoTajtsin!
¡Xkinuikakan nemoyolkauan niman xuiyan!”.

Yejon yeuajli ometstonak, israelitas ouajkiskej Egipto, xexeliujtoyaj ken familias niman uejueyimej familias. Nemiyaj 600,000 israelitas tlakamej, noijki miyekej siamej niman kokonej. Imiuan okiskej miyekej akin xkatkaj israelitas, yejuamej noijki kiueyichiuaskiaj Jehová. ¡Aman kema, israelitas omakiskej!

Nochi xiujtin, sa noijki tlakuajli kichijchiuaskiaj ken okichijchiujkaj ijkuak omakiskej niman ijkon kilnamikiskiaj kenon Jehová okinmakixti. Okitokayotijkej Pascua.

Tlajtoltilistin: ¿Katlajua katka ika majtlaktli tlajyouilistli?

¿Tlenon ononek kichiuaskej israelitas niman ijkon makisaskej itech yejon tlajyouilistli?

Éxodo 11:1-12:42; 13:3-10.

22 Milagro ipan mar Rojo

Ijkuak Faraón okikak ika israelitas yokiskaj itech Egipto, onoyolkuep ika okinkauili mauian. Kuakon okinnauati isoldados: “¡Xkinyektlalikan nochi carros tlen ika titlaixnamikij, niman matikimasitij! ¡Xtikinkauiliskiaj mauian!”. Yejua iuan isoldados opeuj kintlaueletokaj israelitas.

Jehová kiyekantoya ikalpan ika se moxtli ika tonajli niman tliitl ika yeuajli. Yejua okinuikak itech mar Rojo niman okimijli ompa manokajkaltikan.

Sakin israelitas okitakej ika Faraón niman isoldados kintlaueletokayaj. Xueliskiaj choloskiaj. Imixpan kipiayaj mar Rojo niman inkuitlapan uajlayaj egipcios. Kuakon opeuj kitsajtsiliaj Moisés: “¡Timikiskej! Xtitechkixtiskia itech Egipto”. San ika, Moisés okimijli: “Maka xmomojtikan. Xtlamachiakan niman xkitakan kenon Jehová techmakixtis”. ¿Xmelak ika Moisés chikauak tlaneltokaya itech Jehová?

Jehová okimijli israelitas makikuiteuakan kampa onokajkaltijkaj. Yejon yeuajli, Jehová okejkuani moxtli niman aman egipcios xeliujtoyaj itech israelitas. Kampa egipcios onkatka tlayoualyotl. San ika, israelitas kipiayaj tlauijli.



Jehová okijli Moisés makajkokui ima ixpan mar. Kuakon Jehová okichiuj nochi yeuajli chikauak maejeka. Mar onotlajkoxelo niman itlajkotian onochiuj kentla se ojtli. Nochimej israelitas onejnenkej ipan tlajli tlen uajki hasta ijkuak okisatoj, itsajlan itepanuan atl tlen yonokuiteujkaj.

Isoldados faraón okintlaueltokakej israelitas ipan tlajli tlen uajki. Kuakon Jehová okichiuj ika egipcios maka makimatikan tlen kichiuaskej. Okichiuj ika inruedas icarros makisakan. Soldados otsajtsikej: “¡Matiuiyan! Jehová tlaixnamiktok inpampa”.

Jehová okijli Moisés: “Xkajkokui moma ixpan mar”. Nimantsin, atl tlen onochiujkaj ken tepantin inpan ouajtoyauj egipcios. Faraón niman isoldados omijkej. Nion se xomakis.

Ijkuak yokipanauijkaj mar, nochimej okiueyichiujkej toTajtsin ika yejuin tlakuikajli: “Xkuikatilikan Jehová, pampa melak onoueyili. Caballo niman akin ipan yauj okintlajkal ijtik mar”. Ijkuak kalpan nokuikatiaya, siuamej nijtotiayaj niman kitsotsonayaj panderetas. Nochimej melak pakijaj pampa aman yemelak omakiskej.

Tlajtoltilistin: ¿Tlenon opanok ipan mar Rojo? ¿Kenon Jehová okinmakixti israelitas?

Éxodo 13:21-15:21; Nehemías 9:9-11; Salmo 106:9-12; 136:11-15; Hebreos 11:29.

“Tla ijkon, tej, uelis tikijtoskej ikan nochi confianza: ‘Yejua on noTeko yejua nechpaleuijtikaj. Yejua ika xnikmakajsis on tlen uelis nechchiuilis yakaj tlakatl’” (Hebreos 13:6).





5

Ome metstli sakin ika yokipanauijkaj mar Rojo, israelitas oajsikej ipan tepetl Sinaí. Ompa Jehová onotlajtolkauj iuan Israel, ika nochiuaskia ikalpan tlen melak tlasojti. Yejua okintlajpix niman okinmakak nochi tlen kinpolouaya: maná tlen kikuayaj, tlakentli tlen xisoliuiya niman kintlajpiaya kampa nokajkaltiyaj. Tla tikinpiya mokoneuan, xkinpaleui makasikamatikan tleka Jehová okinmakak israelitas Tlanauatijli, tabernáculo niman teopixkej. Xkimititi tleka melak noneki matikchiuakan tlen tikijtouaj, matiyolyemankej niman nochipa matiyolmelaujkanemikan itech Jehová.



TLAMACHTILTIN TLEN NONEKI XMATI

- Nochipa matikchiuakan tlen otikijlikej Jehová ika tikchiusaskej.
- Tla toueyimatij, titenexikolitaj niman titeixnamikij xkuajli tonkisaskej.
- Jehová okimijyoui israelitas maski kemantika xoyolmelaujkanenkej.

23 Onotlajtolkaujkej iuan Jehová

Yopanoka kanaj ome metstli ika israelitas yokiskaj itech Egipto, oajsikej ipan tepetl Sinaí niman ompa onokajkaltijkej. Jehová okijli Moisés matlejko ipan tepetl, niman okijli: “Nejua onikinmakixti israelitas. Tla nechtlakamatij niman kimejyeuaj notlanauatiluan, nochiuaskej nokalpan tlen melak tlasojti”. Moisés ouajtemok niman okimijli israelitas tlen Jehová okijlika. ¿Kenon otlanankilijkej? Yejuamej okijtokej: “Tikchiuaskej nochi tlen Jehová yotechijli”.

Moisés oksejpa otlejkok ipan tepetl. Ompa Jehová okijli: “Ipan yeyi tonajli, nikinnotsas. Xkimijli maka kiyejyekoskej tlejkoskej ipan tepetl Sinaí”. Moisés ouajtemok niman okimijli israelitas manoyektlalikan niman ijkon kikakiskiaj Jehová.

Yeyi tonajli sakín, israelitas okitakej ika ipan tepetl tlapetlaniya niman tlamoxtemiya. Noijki okikakej ken chikauak otlakomon niman okakistik se kuakoujtli. Kuakon, Jehová ouajtemok ipan tepetl itlajkotian tli. Israelitas melak onomojtijkej. Nochi tepetl

tlapachiujtoya ika poktli niman melak chikauak otlalolin. Ken kakistiya kuakoujtli melak tlejkotiaya. Kuakon Jehová okimijli: “Nejua niJehová. Xkipiya nenkiueyichiuaskej okseki tajtsitsintin”.

“Xtlajsojtla on moTeko Dios ikan nochi moyojlo, ikan nochi moalma niman ikan nochi motlamachilis” (Mateo 22:37).

Moisés otlejkok ipan tepetl niman Jehová okimakak itlanauatiluan tlen kimakaskia ikalpan itech kenon nonekiya kiueyichiuaskej niman noyekanaskej. Moisés okimijkuilo yejuin tlanauatiltin niman okinpouili israelitas. Yejuamej onotlajtolkaujkej iuan toTajtsin, okijtokej: “Tikchiuaskej nochi tlen Jehová yotechijli”. San ika ¿kema kichiuaskiaj?

Tlajtoltilistin: ¿Tlenon opanok ipan tepetl Sinaí?

¿Tlenon okijtokej israelitas ijkuak onotlajtolkaujkej iuan Jehová?

Éxodo 19:1-20:21; 24:1-8; Deuteronomio 7:6-9; Nehemias 9:13, 14.





24 Xokichiujkej ken onotlajtolkaujkej

Jehová okijli Moisés: “Xtlejko ipan tepetl kampa ninemi. Nikijkuilos notlanauatiluan ipan temej patlaujkej niman nimitsinmakas”. Moisés otlejkok niman ompa onokauj 40 tonajli niman 40 yeuajli. Ijkuak ompa nemiya, Jehová okijkuilo Majtlaktli Tlanauatiltin ipan ome temej patlaujkej niman okinmakak Moisés.

Israelitas opeuj kinemiliaj ika Moisés yokinkaujteujka. Yejuamej okijlikej Aarón: “Tiknekij yakaj akin matechyekana.

¡Xtexchijchiuili se tatajtsin!”. Aarón okimijli:

“Xnechmakakan oro tlen nenkipiyaj”. Yejua okipat oro niman okichijchiuj se uakaxkonetl. Kalpan okijto: “¡Yejuin uakaxkonetl yejua totajtsin akin otechkixti itech Egipto!”. Opeuj iluichiuaj niman kiueyichiuaj uakaxkonetl tlachijchiujtli ika oro. Tlen okichiuajkej xkuajli katka, ¿tleka? Pampa israelitas iuan onotlajtolkaujkaj Jehová ika san yejua kiueyichiuaskiaj, san ika, aman xkichiuajtoyaj.

“Nochipa ijkuak timotlajtolkauas iuan toTajtsin ika tikchiuas itlaj, nimantsin xtlaxtlaua, pampa yejua xkiyolpaktia akin xtlamachilisejkej. Tlen yotikijto tikchiuas, xtlaxtlaua” (Eclesiastés 5:4).



Jehová okitak tlen panotoya niman okijli Moisés: “Xontemo kampa nemi kalpan. Israelitas xnechtlakamatstokej niman kiueyichiuytokej se tatajtsin xmelaauak”. Moisés ouajtemok itech tepetl, niman kinuajkuiya yejon ome temej patlaujkej.

Ijkuak nonisiuiaya kampa nemiyaj, Moisés okikak ika nokuikatijtoyaj. Ijkuak oajsik, okitak nitotijtoyaj niman notlakuanketstoyaj ixpan uakaxkonetl. Moisés melak okualan, okintlajkal temej patlaujkej tlen kitkiya niman otlajtlapankej. Nimantsin okixoxotoni uakaxkonetl. Kuakon okitlajtolti Aarón: “¿Kenon omitstlaneltokiltijkej niman ijkon xchiua yejuin tlen melak xkuajli?”. Aarón okijto: “Maka xkualani, kuajli tikimixmatstok. Kinekiyaj se intajtsin, ika yejon, onikontlajkal oro ipan tlitl, ¿niman okis yejuin uakaxkonetl!”. Aarón xkpiaya ika kichiuas yejon. Moisés oksejpa otlejkok ipan tepetl niman okitlatlaujti Jehová makintlapopolui israelitas.

Jehová okintlapopolui akin kinekttoyaj kitlakamatiskej. ¿Ueli tikita tleka melak nonekiya ika israelitas makitlakamatikan itlayekanalís Moisés?

Tlajtoltlistin: ¿Tlenon okichiuajkej israelitas ijkuak xompa nemiya Moisés?
¿Tlenon okichiuaj Moisés ijkuak onokuajp?

Éxodo 24:12-18; 32:1-30.



25 Tabernáculo kampa kiueyichiuaj toTajtsin

Ijkuak Moisés nemiya ipan tepetl Sinaí, Jehová okijli makichijchiua tabernáculo. Yejuin kaltlakentli melak tlasojti katka. Ompa israelitas ueliskiaj kiueyichiuaskiaj toTajtsin. Noijki, ueliskiaj kitkiskej tabernáculo maski san kanon yaskiaj.

Jehová okijli: “Xkijli kalpan makitemaka tlen uelis ika tlapaleuis manochijchiua tabernáculo”. Israelitas okitemakakej oro, plata, cobre, temej tlen kualtsitsintin niman okseki tlen patioj. Noijki okitemakakej ichkatl, lino, inkuetlaxio yolkamej niman miyek okseki tlemach. Yejuamej melak okinejkej kitemakaskiej, ika yejon Moisés okimijli: “¡lonka nochi kech noneki! Maka sa itlaj xkuajkuikan”.

Miyekej tlakamej niman siuamej akin melak ueltoyaj otlapaleuijkej manochijchiua tabernáculo. Jehová okinmakak tlamachilistli ika kuajli makichiuakan itekiyo. Sekimej kichijchiuayaj ikpatl, tlakentín ika ikpatl noso kitlaliliayaj tlakentín ikpatl. Oksekimej kinyektlaliayaj temej kualtsitsintin, tekitiyaj ika oro noijki ika madera.

Kalpan okichijchiuj tabernáculo ijkon ken Jehová

okimijli. Ijtik tabernáculo onkatkaj Santo niman Santísimo, yejuin okixelojkej ika se cortina melak kualtsin tlen okichijchiujkej. Ijtik Santísimo onkatka caja tlen tetlalnamiktia tlajtolkualistli, tlachijchiujtli ika oro niman kojtlí itoka acacia. Ijtik Santo onkatka se candelabro tlachijchiujtli ika oro, se mesa niman se tlaixpan kampa kipojkixtiayaj tlen ajuiyak. Ikiyauatenko, kipiaya se fuente tlachijchiujtli ika cobre

niman se ueyi tlaixpan. Caja tlen tetlalnamiktia tlajtolkaualistli kintlalnamiktiaya israelitas ika yonokaujkej ika kitlakamatiskej Jehová.

Jehová okitlapejpeni Aarón niman ikoneuan matekitikan ken teopixkej ipan tabernáculo. Nonekiya kitlajpiyaskiaj tabernáculo niman ompa kiuentlaliliskiaj Jehová. San ueyi teopixketl, Aarón, ueliya kalakiya ijtik Santísimo. Seipa ipan se xiuitl kalakiya niman tlauentlaliaya ipampa itlajtlakoluan, intlajtlakoluan ichanejkauan niman intlajtlakoluan israelitas.

Israelitas otlán kichijchiaj tabernáculo ijkuak yopanoka se xiuitl ika yokiskaj Egipto. Aman kipiayaj kanon kiueyichiuaskej Jehová.

Jehová okitlali se moxtli ikuatipan tabernáculo, ijkon okiteititi ika okiyolpakti. Tla moxtli ompa nokauaya, israelitas nokauayaj kampa nemiyaj. San ika, tla moxtli tlejkouaya kimatiyaj ika nonekiya nejkuaniskej, kuakon kipepetoniayaj tabernáculo niman kitokayaj moxtli.

Tlajtoltilistin: ¿Tlenon okijli Jehová makichijchia Moisés?
¿Tlenon tekintl Jehová okinmakak Aarón iuan ikoneuan?

Éxodo 25:1-9; 31:1-11; 40:33-38; Hebreos 9:1-7.

“Niman se chikauak tlajtojli yejuan ualeuaya ne iluikak okijtoj: ‘Xkita, aman intsajlan on tlakamej chanti Dios. Yejua inuan chantis, niman yejuamej itech teyaxkauan yeskej. Sa no yejua Dios inuan chantis niman yejua nochiuas inDios” (Apocalipsis 21:3).



26 12 ichtakatlachixkej

Israelitas okiskej itech tepetl Sinaí. Okipanauijkej tlatluaktli itoka Parán hasta oajsikej Cadés. Ompa Jehová okijli Moisés: “Xkintitlani 12 tlakamej, se itech sesentetl uejueyimej familias, maichtakatlachiatij Canaán, tlajli tlen nikinmakas israelitas”. Kuakon Moisés okintlapejpeni 12 tlakamej niman okimijli: “Xuiyan Canaán, xkitatij itlal tla tlatlakitia. Xkitakan tla tlaltikpakchanejkej kojtikey noso



ka, tla san nokajkaltiaj noso tla chantij ipan ueyikalpamej”. Yejuamej oyajkej Canaán, Josué iuan Caleb teuan tlapoualtin katkaj.

Ijkuak yopanoka 40 tonajli, ichtakatlachixkej ouajnokuepkej. Kuajkuiyaj higos, granadas niman uvas. Yejuamej okijtokej: “Tlajli melak tlatlakitia, san ika, tlaltikpakchanejkej melak kojtikey niman iueyikalpanuan kipiay tepantin uejkapamej”. Kuakon Caleb okijto: “¡Tejuamej uelis tikintlaniskej! Nimantsin matiuiyan”. ¿Tikmati tleka ijkon okijto Caleb? Pampa yejua niman Josué tlaneltokayaj itech Jehová. San ika, oksekimej majtlaktli ichtakatlachixkej okijtokej: “¡Ka! ¡Tlaltikpakchanejkej melak uejkapamej! Innakastlan tinesiyaj kentla chapolimej”.

Israelitas onosiaujkaujkej. Opeuj kualanij niman onoiijlikej: “Matiktejtemokan okse akin matechyekana niman matokuepakan Egipto. ¿Tleka san tonmiskisej Canaán?”. Josué iuan Caleb okijtokej: “Xtlakamatikan Jehová niman maka xmomojtikan.

Jehová techtlajpiyas”. San ika, israelitas xokinkakisnejkej. Niman okiyejyekojkej kinmiktiskej Josué iuan Caleb.

¿Tlenon okichiuaj Jehová? Yejua okijli Moisés: “Yonikchiuj miyek inpampa israelitas maski ijkon, ok xnechtlakamatij. Yejua ika, nikinkauas 40 xiuitl ipan tlaluaktli hasta mamikikan. San inkoneuan niman Josué iuan Caleb nemiskej ipan tlajli tlen onikimijli nikinmakas”.

Tlajtoltilistin: ¿Tlenon opanok ijkuak 12 ichtakatlachixkej ouajnokuepkej itech Canaán?
¿Kenon okiteititijkej Josué iuan Caleb ika tlaneltokayaj itech Jehová?

Números 13:1-14:38; Deuteronomio 1:22-33; Salmo 78:22; Hebreos 3:17-19.

**“¿Tlika sanoyej nemomojtiaj? ¡Nemejuamej semi achijtsin nenkipiaj tlaneltoktli!”
(Mateo 8:26).**





27 Okixnamijkej Jehová

Sakin, ijkuak israelitas ok nemiyaj ipan tlatluaktli, Coré, Datán, Abiram niman 250 tlakamej okixnamijkej Moisés. Yejuamej okijlikej: “¡Melak yonentechsiauitijkej! ¿Tleka kipiya ika titechyekanas niman Aarón yes ueyi teopixketl? Jehová xsan nemi mouan iuan Aarón, noijki touan nemi”. Jehová xokuelitak yejon. ¡Okitak kentla yejua kixnamiktoskijaj!

Moisés okimijli Coré niman akin kitokayaj: “Xuajlakan mostla ipan tabernáculo niman xkuajkuikan tlen ika nentlapojkixtiaj niman xtemiltikan ika tlen ajuiyak. Jehová techititis akinon yokitlapejpeni”.

Uajmostla, Coré niman 250 tlakamej onosentlaliykej iuan Moisés ipan tabernáculo. Opeuj kitlatiaj tlen ajuiyak ken teopixkej yeskiaj. Jehová okimijli Moisés iuan Aarón: “Xmoxelokan itech Coré niman itech akin kitokaj”.

Coré oyaj ipan tabernáculo kampa nemiya Moisés, san ika, Datán, Abiram niman inchanejkauan xokineykej yaskej. Jehová okimijli israelitas manoxelokan itech inkajkaluan Coré,

Datán niman Abiram. Israelitas nimantsin onoxelojkej. Datán, Abiram niman inchanejkauan onotelketskej ikalakiyan inkajkalan. Kuakon, ¿sa nimantsin tlajli otlapouj niman okintolo! Niman kampa tabernáculo, tlitl ouajtemok niman okintlali Coré niman 250 tlakamej.

Kuakon Jehová okijli Moisés: “Xkajsi intlakouj sesentemej akin tlayekanaj ipan uejueyimej familias, niman inpan xkijkuilo intoka. San ika, ipan itlakouj familia Leví xkijkuilo itoka Aarón. Xkintlali ijtik tabernáculo, niman itlakouj akin nejua niktlapejpenis xochiyouas”.

Uajmostla, Moisés okinkixti intlakouj akin tlayekanayaj niman okimititi. Itlakouj Aarón oxochiyouak niman kipiaya almendras. Ijkon Jehová okiteititi ika yokitlapejpenijka Aarón ken ueyi teopixketl.

“Xkintlakamatikan on yejuan mechyekanaj, niman xchiuakan intlanauatil” (Hebreos 13:17).

Tlajtoltilistin: ¿Tleka Coré niman akin kitokayaj okixnamijkej Moisés?
¿Kenon tikmatij ika Jehová yokitlapejpenijka Aarón ken ueyi teopixketl?
Números 16:1-17:13; 26:9-11; Salmo 106:16-18.



28 Tlajtoua ipoloko Balaam

Israelitas ikuikayaj kanaj 40 xiuitl ipan tlatluaktli. Yonotlatkitijkaj miyek kalpamej. Onokajkaltijkej ipan talmantli Moab, ikisayan tonajli itech atentli Jordán. Sa achijtsin poliuiya ika kalakiskiaj ipan tlajli tlen yokimijlikaj kinmakaskej. Balac, tekiuaj itech Moab, nomojtiaya tla kikuiliskiaj itlalan. Kuakon, okinots se tlakatl itoka katka Balaam mauiya Moab makinuijuikaltiti israelitas, noso makimijli ika xkuajli tlen inpan nochiuas.

San ika, Jehová okijli Balaam: “Xkipiya ika tikinuijuikaltis israelitas”. Kuakon Balaam xokinek yas. Tekiuaj Balac okinots ika okpa niman okijli ika kimakaskia nochi tlen kinekiskia. Maski ijkon, Balaam xokinek yas. Kuakon toTajtsin okijli: “Uelis tias, san ika, san tikijtos tlen nimitsijlis”.

**“Xmotlapiakan para
maka sanoyej xnekikan
nenmoyaxkatiskej
tlajtlamach pampa
inemilis se tlakatl
xne ualejtikaj itech
on tlen miyek kipia”
(Lucas 12:15).**

Balaam oyaj Moab ipan ipoloko. Yejua yokinemilijka kinuijuikaltis israelitas maski Jehová yokijlika maka makichiuu. liluikaktekitkauj Jehová yexpa ouajnonexti ipan ojtli. Balaam xkitaya iluikaktekitketl, san ika, ipoloko kema. Kachtopa, poloko okis itech ojtli niman oksekan oyaj. Sakin, poloko onopepecho itech tepantli niman okiikxipatlacho Balaam. Sa

ika ontlami, poloko sa ouajnotekak ipan ojtli. Balaam kiuitekiya ipoloko ika se tlakotl ijkuak ijkon kichiuaya.


Sakin, Jehová okichiuj ika poloko matlajto. Poloko okitlajtolli Balaam: “¿Tleka tinexuiteki?”. Balaam okinankili: “Yotinechpinaujti. Tla nikpiyaskia se espada nimitsmiktiskia”. Poloko okijli: “Ikapiya miyek xiuitl ika nimitsmamajtinemi. ¿Kemantika ijkon yonimitschiuilijka?”.

Kuakon Jehová okikauili ika Balaam makita iluikaktekitketl. Iluikaktekitketl okijli: “Jehová omitsijli maka xkuijuikalti kalpan Israel”. Balaam okinankili: “Oninopopolo. Ninokuepas nochan”. San ika, iluikaktekitketl okijli: “Uelis tias Moab, san ika, san tikijtos tlen Jehová mitsijlis”.

¿Onomachtí itlaj Balaam itech tlen okijlikej? Ka. Yexpa okiyejyeko kiuiuikaltis kalpan Israel, san ika, Jehová okichiuj yexpa makiteochiua. Sakin, israelitas okixnamijkej Moab niman Balaam omik. ¿Xmelak ika kuajli yeskia tla Balaam nimantsin kitlakamatiskia Jehová?

Tlajtoltlistin: ¿Tleka Balaam oyaj Moab? ¿Tlenon opanok ipan ojtli?

Números 22:1-24:25; 31:8; Nehemías 13:2; 2 Pedro 2:15, 16; Judas 11.





6

Ijkuak israelitas oajsikej ipan tlajli tlen toTajtsin yokijtoka kinmakas, opeujkej kiueyichiuaj toTajtsin ipan tabernáculo. Teopixkej temachtiayaj Tlanauatijli, niman jueces okiyekankej kalpan. Yejuin sección techmacthia ika tlen tiktlapejpeniaj niman tlen tikchiuaj uelis kinpaleuis noso kimijtlakos oksekimej. Nochimej israelitas nonekiya yolmelaujkanemiskej itech Jehová niman intech oksekimej. Xteititi ika ken onoyekankej Débora, Noemí, Josué, Ana, ichpoch Jefté niman Samuel melak okinpaleui miyekej kampa chantiyaj. Kuajli xteititi ika maski sekimej xkatkaj israelitas ken Rahab, Rut, Jael niman gabaonitas okitlapejpenijkej nouikaskej inuan israelitas pampa kimatstoyaj ika toTajtsin inuan nemiya.



TLAMACHTILTIN TLEN NONEKI XMATI


- Jehová okinkuik jueces ika kimakixtis ikalpan ika milagros.
- Jehová okiteochiuj inyolmelaujkanemilis telpokamej niman akin iuejueyimej, pampa chikauak otlaneltokakej itech.
- ToTajtsin xtechikoita, yejua kinselia nochimej niman maski san kanon ualeuaj, tla kitlasojtlaj niman kichiuaj tlen kuajli.

29 Jehová okitlapejpeni Josué

Moisés kuikaya miyek xiuitl ika kiyekantoya Israel niman sa achijtsin poliuiya ika mikiskia. Jehová okijli: “Tejua xtikinkalaktis israelitas ipan tlajli tlen yonikijto nikinmakas. San ika, nimitskaulis xkita yejon tlajli”. Kuakon, Moisés okitlajtlanili Jehová makitlapejpeni akin makitlajpiya kalpan. Jehová okijli: “Xuiya kampa Josué niman xkijli ika yejua yes”.

Moisés okijli kalpan ika imikiskia niman ika Jehová yokitlapejpenijka Josué makinyekana ipan Tlajli tlen yokijtoka kinmakas. Kuakon Moisés okijli Josué: “Maka xmomojti. Jehová mitspaleuis”. Sakin, Moisés otlejkok ikuatipan tepetl Nebo, ompa Jehová okititi tlajli tlen yokijtoka kimakas Abrahán, Isaac, niman Jacob. Moisés kipiaya 120 xiuitl ijkuak omik.

Jehová okijli Josué: “Xpanauí atentli Jordán niman xuiya Canaán. Nimitspaleuis ijkon ken onikpaleui Moisés. Maka tikilkauas ika noneki tikpouas mojmotla Tlanauatijli. Maka xmomojti. Xyolchikauí. Xuiya niman xchiua nochi tlen yonimitsnauati”.



Josué okintitlan ome akin maichtakatlachiatij ueyikalpan Jericó. Ipan okse tlamachtijli, tiueliskej okseki itech tlen ompa opanok. Ijkuak yejuamej onokuepkej, okijtokej ika iueliskiaj kalakiskej Canaán. Uajmostla, Josué okijli kalpan matlakuiteuakan kampa onokajkaltijkaj. Kuakon, kachtopa okintitlan ipan atentli Jordán teopixkej akin kitkiyaj caja tlen tetlalnamiiktia tlajtolkaualistli. Atentli

melak tentoya. San ika, nimantsin ijkuak ikxiuan teopixkej okalajkej ijtik atl, atentli onotelti niman ouak. Teopixkej oajsikej itlajkotian atentli niman ompa onoteltijkej, hasta ijkuak nochimej israelitas yopanokaj oksekan. ¿Tiknemilia ika yejuin okimilnamikti milagro tlen Jehová okichiuuj ipan mar Rojo?

“Jehová nochipa mitsyekanas niman kichiuas kuajli xmomachili ipan se uajki tlajli” (Isaías 58:11).

Sakin ika yopanoka yejon xiujtin, israelitas inemiyaj ipan tlajli tlen yokimijlikaj kinmakaskej. Kichijchiuaskiaj kaltin niman ueyikalpamej. Kitokaskiaj tlen tlaki niman uvas. Ipan yejon tlajli onkatka miyek tlemach tlen kikuaskiaj niman koniskiaj. Ika yejon, noitaya ken tlajli kampa tlatlaci niman xtlaj poliui.

Tlajtoltilistin: ¿Akinon okinyekan israelitas ijkuak Moisés omik? ¿Tlenon opanok ipan atentli Jordán?

Números 27:12-23; Deuteronomio 31:1-8; 34:1-12; Josué 1:1-3:17.






30 Rahab okimiyán ichtakatlachixkej

Ijkuak ichtakatlachixkej israelitas oyajkej ueyikalpan Jericó, onokaujkej ichan se siuatl itoka katka Rahab. Ijkuak tekiuaj itech Jericó okimat, okintitlan isoldados ichan Rahab. Yejua okimiyán ichtakatlachixkej ikuatipan ichan niman oksekan okintitlan soldados. Rahab okimijli ichtakatlachixkej: “Nimechpaleuis pampa nikmati ika Jehová nemouan nemi niman ika nemotlatkitiskej yejuin tlajli. Nimechtlajtlanilia xnechijlikan ika nenkimakixtiskej nochanejkauan”.

Ichtakatlachixkej okijlikej Rahab: “Tla tiksalousa yejuin mekatl chichiltik ipan moventana, timitsijliaj ika xtlaj inpan nochiuas akin nemiskej mochan. Ijkon mochanejkauan makiskaskej”.

Rahab kinkauilia ichtakatlachixkej matemokan ipan iventana ika se mekatl. Yeyi tonajli oniyankej ipan tepemej, sakín onokuepkej kampa Josué. Kuakon israelitas okipanauijkej atentli Jordán niman onoyektlalijkej niman ijkon notlatkitiskiaj tlajli. Jericó kachtopa ueyikalpan tlen onotlatkitijkej. Jehová okimijli ika chikuasen tonajli

An artistic illustration depicting the biblical story of the fall of Jericho. A large, multi-tiered stone wall, built with reddish-brown bricks, is shown crumbling and falling away. Debris, including stones and wooden planks, is scattered in the air and on the ground. In the background, a landscape with palm trees and a hazy sky is visible. The overall color palette is warm, dominated by oranges, yellows, and browns, suggesting a bright, dusty atmosphere.

“Noijki onochiu itech on situatl itoka Rahab [...]. Yejua kuajli okinselij on yejuan Josué okintitlan para kitaskej kenijki tlaojonkaj ne ueyikan Jericó, niman no yejua okimpaleuij para ocholojkej ijkuak ualajtikatkaj intlaueliknluan. Yejua ika Dios okijtoj ika itlajtlakoluan yokintlaxtlau” (Santiago 2:25).

makiyeualokan ueyikalpan, san sejpa ipan se tonajli. Ipan tonajli chikome, yejuamej chikometipan okiyeualojkej ueyikalpan. Teopixkej okinpitskej intrompetas, niman soldados melak chikauak otsajtsikej. ¡ltepanuan ueyikalpan oxoxotonkej! Maski ikal Rahab ompa onkatka, xouets. Rahab niman ichanejkauan omakiskej pampa yejua otlaneltokak itech Jehová.

Tlajtoltilistin: ¿Tleka Rahab okinpaleui ichtakatlachixkej? ¿Kenon israelitas onotlatkitijkej Jericó? ¿Tlenon ipan onochiuj Rahab niman ichanejkauan?

Josué 2:1-24; 6:1-27; Hebreos 11:30, 31; Santiago 2:24-26.



31 Josué niman gabaonitas

Oksekimej iueyikalpanuan Canaán okimatkej tlen ipan onochiuj Jericó. Intekiuajkej onosentlaliykej pampa kimixnamikiskiaj israelitas. San ika, gabaonitas xijkon okichiujkej. Okakijkej tlakensosojli, oyajkej kampa Josué niman okijlikej: “Tejuamej melak uejka tiualeuaj. Oतिकakilijkej itech Jehová niman itech tlen okichiuj nemopampa ipan Egipto niman Moab. Xtechijlikan ika xnentechixnamikiskej niman tochiaskej nemotlakeualuan”.

Josué okinneltokak niman okimijli ika xkimixnamikiskiaj. Ijkuak yopanoka yeyi tonajli, okimat ika gabaonitas nisiuj chantiyaj. Yejuamej ualeuayaj Canaán. Josué okintlajtolti: “¿Tleka onentekajkayaujkej?”. Yejuamej okinankilijkej: “¡Otomojtikej! Tikmatstokej ika Jehová nemoTajtsin tlaixnamiki nemopampa. Timechtlajtlaniliaj maka nintechmiktiskej”. Josué okichiuj ken okimijli niman xokinmikti.

Xuejkaujtipan, makuiltin tekiauajkej cananeos niman insoldados okimixnamikitoj gabaonitas. Josué niman isoldados onejnenkej

**“San xtlanankilikan ‘kemaj’
noso ‘ka’, pampa nochi tlen
okseki nenkijtoskej ualeuas
itech on diablo” (Mateo 5:37).**

nochi yeuajli, ijkon kinmakixtiskiaj.
Uajmostla ika kualkan opeuj noixnamikij.
Cananeos ocholojkej. Yejuamej nochiuiyan
notlalouayaj, san ika, Jehová okichiu j inpan
mauetsiki uejueyi tesiujtli. Kuakon Josué okitlajtlanili Jehová
makichiu a ika tonaltsintli manotelti. Tonaltsintli xkeman noteltiaya,
¿tleka Josué okitlajtlanili yejon? Pampa otlaneltokak itech Jehová.
Tonaltsintli xokalak nochi yejon tonajli hasta ijkuak israelitas
okintlankej tekiauajkej cananeos niman insoldados.

Tlajtoltilistin: ¿Tlenon okichiu jkej gabaonitas niman ijkon omakiskej?
¿Kenon Jehová okinpaleui israelitas?

Josué 9:1-10:15.





32 Se yenkuik tlayekanketl niman omemej siamej yolchikaujkej

Josué omik ijkuak kipiaya 110 xiuitl, miyek xiuitl okiyekan ikalpan Jehová. Ijkuak yejua nemiya, israelitas okiueyichiuaj Jehová. San ika, ijkuak omik Josué, opeujkej kinueyichiuaj tajtsitsintin ijkon ken cananeos. Pampa israelitas xok okitlakamatkej, Jehová okikauili ika se tekiuaj cananeo itoka katka Jabín makintlajyouilti. Kalpan okitlajtlanili Jehová makipaleui. Kuakon Jehová okinmakak se yenkuik tlayekanketl, Barac. Yejua kipaleuiskia kalpan manokuepa itech Jehová.

Débora, akin teotlajtoketl katka, okiteijli makinotsatij Barac. Yejua okijli tlen Jehová okijto: “Xkinuika 10,000 tlakamej niman xkimixnamikitij isoldados Jabín ipan atentli Cisón. Ompa tiktlanis Sísara akin tlayekana itech isoldados Jabín”. Barac okijli Débora: “Nias san tla nouan tiauj”. Yejua okinankili: “Mouan nias. San ika, xmatsto ika xtejua tikmiktis Sísara. Jehová yokijto ika se siuatl kimiktis”.

Débora otlejkok iuan Barac niman soldados ipan tepetl Tabor, ijkon onoyektlalijkej pampa tlaixnamikiskiaj. Ijkuak Sísara okimat yejuin,

okinsentlali ipan valle icarros tlen ika tlaixnamiki niman isoldados. Débora okijli Barac: “Aman ipan yejuin tonajli Jehová kichiuas xtetlani”. Barac niman 10,000 soldados otemokej itech tepetl niman okimixnamikitoj isoldados Sísara.

Sakin, Jehová okichiuaj makisa atentli Cisón niman icarros Sísara tlen ika tlaixnamiki osokipolajkej. Sísara otemok ipan icarro niman onotlalo. Barac niman isoldados okintlankej isoldados Sísara, san ika Sísara onotlalojteuj oniyonato kampa chantiya se siuatl itoka katka Jael. Siuatl okimakak makoni leche niman okitlapacho. Yejon soldado okoch pampa melak siaujtoya. Kuakon Jael yoliktsin okinisiui niman ika se tlakotl yekapitstik okikuatsopini, Sísara omik.

Barac okitejemoto Sísara. Jael ouajkis kampa chantiya niman okijli: “Xkalaki. Nimitsititis tlakatl akin tiktejemoua”. Barac okalak niman okitak ika Sísara yomijka, ompa tlajkaltoya. Barac niman Débora okiueyichiuajkej Jehová ika se tlakuikajli pampa okinpaleui israelitas makintlanikan intlaueliknivan. Israelitas onenkej ika yolseuilstli 40 xiuitl.

Tlajtoltilistin: ¿Kenon Débora okinpaleui israelitas?
¿Kenon okiteititi Jael ika yolchikauak katka?

Jueces 4:1-5:31.

**“Siamej akin
kitejlitokej
kuajli tlajtoltin
melak miyekej”
(Salmo 68:11).**



33 Rut niman Noemí

Ijkuak onkatka apistli ipan Israel, se israelita itoka katka Noemí onochanpatlak Moab. Oyaj iuan iueuentsin niman omemej ikoneuan. Sakin iueuentsin omik. Ikoneuan ononamiktijkej, se iuan Rut niman okse iuan Orpá. Yejuamej moabitas katkaj. San ika, teyolkoko ika ikoneuan Noemí, omijkej.

Ijkuak Noemí okikak ika ipan Israel xok onkatka apistli, okinemili nokuepas. Rut niman Orpá iuan oyajkej, san ika, ipan ojtli Noemí okimijli: “Nemejuamej nenkatkaj melak kuajli nentesiuauan niman nentesiuamonuan. Nikuelitaskia oksejpa xmonamiktikan. Xmokuepakan nemochan Moab”. Siuamej okijtokej: “¡Timitstlasojtlaj! Xtiknekij timitskaujteuaskaj”. Noemí miyekpa okimijli manokuepakan. Sakin, Orpá oyaj, san ika, Rut onokauj. Noemí okijli: “Orpá inokueptok ikalpan niman itech itajtsitsinuan. Iuan xuiya niman xkitati monan”.



San ika, Rut okijli: “Xnimitskauas. Mokalpan, nokalpan yes niman moTajtsin, noTajtsin yes”. ¿Kenon tiknemilia onomachili Noemí ijkuak Rut okijli yejon?

Rut niman Noemí oajsikej Israel ijkuak peua nopixka cebada. Se tonajli, Rut okipejpenato cebada tlen onokauj ipan itlal se akin itoka katka Boaz, ikoneuj Rahab. Boaz okikak ika Rut moabita katka niman ika xokitlalkauí Noemí. Yejua okimijli itlakeualuan makikauakan seki cebada tlen Rut ueliskia kipixkaskia.



Ijkuak itlapoyaujtoya, Noemí okitlajtolti Rut:
“¿Itech akinon itlal otitekit aman?”. Rut okinankili:
“Ipan itlal Boaz”. Noemí okijli: “Boaz se ichanejkauj
noueuentsin. Xtekiti ipan itlal imiuan okseki
ichpokamej. Ompa xtlaj mopan nochuias”.

“Nemi se akin nisiuj
iuan timouikas
xken se mokniuj”
(Proverbios 18:24).

Rut otekit ipan itlal Boaz hasta ijkuak otlán ika
pixkalo. Boaz okitak ika Rut melak tekítiki niman
katka se kuajli siuatl. Ipan yejon tonaltin, tla se
tlakatl mikiya niman xkiapiaya ikoneuan, se
ichanejkauj ueliya nonamiktiaya iuan
siuakaualtsintli. Ijkon Boaz
ononamikti iuan Rut. Okipixkej
se inkoneuj, okitokayotijkej Obed,
yejua onochiuj iabuelo tekiuaj
David. Akin imiuan nouikaya
Noemí melak pakiyaj niman
okijtokej: “Kachtopa, Jehová
omitsmakak Rut, akin melak
mitstlasojtla niman aman
tikpiya se moxuiuj.
Matikueyichiuakan
Jehová ipampa yejon”.

Tlajtoltlistin: ¿Kenon okiteititi Rut ika
melak kitlasojtlaya Noemí? ¿Kenon
Jehová okintlajpax Rut niman Noemí?
Rut 1:1-4:22; Mateo 1:5.





34 Gedeón okintlan madianitas

Sakin israelitas oksejpa okitlalkauijkej Jehová niman opeuj kinueyichiuaj tajtsitsintin. Ipan chikome xiuitl, madianitas okimichtekilijkej inyolkauan israelitas niman okimijtlakouilijkej tlen kitokayaj. Pampa kinekiyaj notlajpiyaskej intech madianitas, oniankej ipan teostomej niman ipan tepemej. Okitlajtlanilijkej Jehová makinmakixti. Yejua ika, Jehová okititlan iiluikaktekitkauj itech se tlakatl akin itoka katka Gedeón. Iluikaktekitketl okijli: “Jehová yomitstlapejpeni xmochiua se kojtik tlaixnamijketl”. Gedeón okitlajtolli: “¿Kenon uelis nikmakixtis Israel ijkuak xniueyixtok?”.

¿Kenon kimatiskia Gedeón ika Jehová yokitlapejpenijka? Okitlali itsojmiyo borrego ipan tlajli niman okijli Jehová: “Tla ika kualkan, ajuaxtli kipatsoua itsojmiyo borrego, san ika, tlajli xpatsiui, kuakon nikmatis ika tikneki manikmakixti Israel”. Uajmostla, ¿itsojmiyo borrego opatsiuj, san ika, tlajli xopatsiuj! Ijkuakon Gedeón okitlajtlan ika uajmostla yejon tsojmitl maka mapatsiui niman tlajli kema. Ijkuak ijkin opanok, yejua okineltokak ika Jehová yokitlapejpenijka. Okinsentlali isoldados niman ijkon konmixnamikiskiaj madianitas.

Jehová okijli Gedeón: “Nikinpaleuis israelitas matetlanikan. San ika, pampa melak miyekej





soldados, ueliskej kinemiliskej ika san inselti otetlankej. Kuakon xkimijli nochimej akin nomojtíaj manokuepakán inchan”. Ika yejon, 22,000 soldados oyajkej niman san 10,000 onokaujkej. Sakin Jehová okijli: “Ok miyekej soldados. Xkinuika ipan atentli niman xkimijli maatlíkan. San xkintlapejpeni akin tlatlachixtokej ijkuak atlij niman kitaj tla xuajlauej nemotlauelikniuan”. San 300 tlakamej tlatlachixtoyaj ijkuak atlijaj. Jehová okijto ika san yejon achijtsitsintin tlakamej kintlaniskiaj 135,000 soldados madianitas.

“Ijkon, tej, pantlantitikaj ika on ueyi poder yejuan topan onkaj xtotech kistikaj, yej ualejtikaj itech Dios” (2 Corintios 4:7).

Ipan yejon yeuajli, Jehová okijli Gedeón: “Aman iuelis nenkixnamikiskej madianitas”. Gedeón okinmakak tlakamej kuakoujtin niman uejueyimej kontin, ijtik kontin kipiayaj se tlitl tlen ika tlauiloskiaj. Yejua okimijli: “Xnechitakan niman noijki ijkon xchiuakan”. Gedeón okipits kuakoujtli tlen kipiaya, okitlapan kontli, opeuj kiuiyonia tlitl tlen kitkiya niman otsajtsik: “¡Iespada Jehová niman Gedeón!”. 300 tlakamej noijki ijkon okichiuajkej. Madianitas melak onomojtijkej niman opeuj nochiuiyan notlalouaj. Pampa xkimatíaj tlenon kichiuaskej san yejuamej opeuj noixnamikij. Jehová oksejpa okinpaleui israelitas makintlaníkan intlauelikniuan.

Tlajtoltílistin: ¿Kenon Jehová okititi Gedeón ika yokitlapejpenijka?
 ¿Tleka Gedeón otlaixnamik san ika 300 soldados?

Jueces 6:1-16; 6:36-7:25; 8:28.

35 Ana okitlajtlan ipan teoyotl se ikoneuj

Elcaná katka se israelita akin okipix ome isiuauj: Ana niman Peniná. San ika, yejua melak kitlasojtlaya Ana. Peniná kipiaya miyekej ikoneuan niman Ana nion se xkipiaya. Ika yejon Peniná kipijpinaujtiaya Ana. Nochi xiujtin, Elcaná kinuikaya ichanejkauan Siló makiueyichiuatij Jehová ipan tabernáculo. Sejpa, ijkuak ompa nemiyaj, Elcaná okitak ika isiuatsin Ana melak noyolkokouaya.

Kuakon okijli: “Nimitstlajtlanilia Ana maka xchoka. Tinechpiya niman melak nimitstlasojtla”.

Sakin, Ana oyaj iselti okichiuato teoyotl. Xueliya noteltiaya ika choka niman okitlatlaujti Jehová makipaleui, okijli: “Jehová, tla tinechmaka se nokoneuj, nejua nimitsmakas mamitstekichiui nochi inemilis”.

Ueyi teopixketl Elí okitak ika Ana melak chokaya, yejua okinemili tla Ana yotlauanka. Ana okijli: “Ka noteko xonitluan. Nikpiya se ueyi tlauejli, niman nikijlitoya Jehová”. Elí okitak ika onopopolo niman okijli: “Jehová mamitsmaka tlen otiktajtlanili”. Ana kuajli onomachili niman oyaj. Xkaxiltiaya se xiuitl ijkuak yejua okipix ikoneuj akin okitokayoti Samuel. ¿Uelis tiknemilis kenon melak opak Ana?





“Xtlajtlanilikan Dios on tlen mechpoloua, niman yejua mechmakas. Xtejtemokan on tlen mechpoloua, niman nenkinextiskej” (Mateo 7:7).

Ana xokilkauj tlen okijlika Jehová. Ijkuak Ana okikajkauj ika kichichitia Samuel, okikauato ipan tabernáculo kampa kitekichiuiliskia toTajtsin. Yejua okijli Elí: “Yejuin nokoneuj tlen oniktajtlanili Jehová ipan teoyotl, onijkauiliko Jehová ijkon kitekichiuilis ipan nochi inemilis”. Elcaná niman Ana kontlajpalouayaj Samuel nochi xiujtin niman kitkiliayaj se yenkuik tlakentli tlen xmaueueyak. Jehová noijki okimakak Ana yeyi ikoneuan tlakamej niman ome siuamej.

Tlajtoltilistin: ¿Tleka noyolkokouaya Ana? ¿Kenon Jehová okiteochiuj Ana?
1 Samuel 1:1-2:11, 18-21.

36 Itlajtolkualis Jefté

Israelitas oksejpa okikaujkej Jehová niman opeuj kinueyichiuaj tajtsitsintin. Yejon tajtsitsintin xkinpaleuiayaj ijkuak ammonitas kimixnamikiyaj. Israelitas otlajyouijkej miyek xiuitl. Sakin okijlikej Jehová: “Yotitlajtlakojkej. Timitstlajtlaniliaj xtechmakixti itech totlauelikniuan”. Israelitas okinxoxotonijkej tajtsitsintin niman oksejpa okiueyichiuujkej Jehová. Kuakon yejua xok okixiko kitas kenon kintlajyouiltiayaj.

Israelitas okitlapejpenijkej se soldado itoka katka Jefté makinyekana ijkuak kimixnamikiskiaj ammonitas. Jefté okijli Jehová: “Tla titetlanij ijkuak titlaixnamikiskej, mouan ninotlajtolkua, nimitsmakas akin kachtopa nechujnamikis ijkuak ninokuepas nochan”. Jehová okikak iteoyouj Jefté niman okipaleui matetlani.



“Yejuan kitlajsojtlas itelpoch noso ichpoch más xken nejua, xkimelaua noyaxka yes” (Mateo 10:37).

Ijkuak Jefté onokuep ichan, isentekonetsin akin kachtopa ouajkis okinamikito. Yejua nijtotitiaya niman kitsotsontiaya pandereta. ¿Tlenon kichiuaskia Jefté? Okilnamik tlajtolkaualistli niman okijto: “¡Ay nokoneuj! Yotikchiuj matlapani noyoltsin. Oninotlajtolkauj iuan Jehová niman aman kipiya ika nikchiuas, noneki nimitstitlanis tontekitis ipan tabernáculo tlen nokaua Siló”. Ichpoch okinankili: “Notaj, tla tejua otimotlajtolkauj iuan Jehová noneki xchua. San nimitstlajtlanilia xnechkauli maniuia ome metstin ipan tepemej inuan ichpokamej akin imiuan ninouika. Sakin nias”. Ichpoch Jefté okitekichiuli Jehová ipan nochi inemilis ipan tabernáculo. Nochi xiujtin ichpokamej akin imiuan nouikaya yayaj Siló kampa kontlajpalouayaj.

Tlajtoltilistin: ¿Katlajua tlajtolkaualistli okichiuj Jefté?
¿Tlenon okijto ichpoch Jefté ijkuak okimat itech itlajtolkaualis itaj?

Jueces 10:6-11:11; 11:29-40; 1 Samuel 12:10, 11.





37 Jehová okinots Samuel

Ueyi teopixketl Elí okipix ome ikoneuan akin tekitiyaj ken teopixkej ipan tabernáculo. Intoka katka Hofní iuan Finehás. Yejuamej xkitlakamatiyaj itlanauatilan Jehová niman kitlajyouiltiyaj kalpan. Ijkuak israelitas kiuentlaliliyaj Jehová, Hofní iuan Finehás nokauiliyaj nakatl tlen melak kuajli katka. Elí okitekakili tlen ikoneuan kichiuayaj, san ika, xtlaj kichiuaya. ¿Kinkauiliskia Jehová ok ijkon makichiujtokan?

Maski Samuel san konetl katka, xkichiuaya ken Hofní iuan Finehás. Samuel melak kiyolpaktiaya Jehová. Se yeuajli, ijkuak kochtoya, Samuel okikak se tlajtojli tlen okinots. Yejua onokuiteuj, onotlalo kampa Elí niman okijli: “¡Nikan ninemi!”. San ika, Elí okijli: “Nejua xonimitsnots. Oksejpa xkochiti”. Samuel oksejpa onotekak. Kuakon oksejpa ijkon opanok. Ijkuak Samuel ika yexpa okikak yejon tlajtojli, Elí okimat ika Jehová akin kinotstoya Samuel. Yejua okijli Samuel ika tla oksejpa kikakiya yejon tlajtojli makijto: “Xtlajto Jehová pampa motekipanojkauj mitskaktika”.

Samuel oksejpa onotekak niman kuakon okikak: “¡Samuel! ¡Samuel!”. Yejua okinankili: “Xtlajto pampa motekipanojkauj

mitskaktika”. Jehová okijli: “Xkijli Elí ika niktajtlakolmakas niman noijki ichanejkauan. Yejua kimatstok ika ikoneuan kichiujukejtlen xkuajli ipan tabernáculo, san ika, xtlaj kichiu”. Uajmostla ika kualkan, Samuel okintlapan ipuertas tabernáculo ijkon ken nochipa. Yejua nomojtiaya kijlis ueyi teopixketl tlen Jehová okijlika. San ika, Elí okinots niman okitajltolti: “Nokoneuj, ¿tlenon yomitsijli Jehová? Nochi xnechijli”. Kuakon Samuel nochi okijli.

Ken noskaltijtiaya Samuel, Jehová iuan nemiya. Nochiuiyan, israelitas kimatstoyaj ika Jehová yokitlapejpenijka Samuel ken teotajtoketl niman juez.

Tlajtoltilistin: ¿Tleka Samuel xsa noijki katka ken Hofní niman Finehás?
¿Tlenon Jehová okijli Samuel?

1 Samuel 2:12-17, 22-26; 3:1-21; 7:6.

**“Xkilnamiki, aman,
moUeyitlachijchijkauj
ipan tonaltin ijkuak
titelpochtitika”
(Eclesiastés 12:1).**



38 Jehová okichiu j ika Sansón makojtik

Miyekej israelitas oksejpa opeuj kinueyichiuaj tajtsitsintin, kuakon, Jehová okinkauili filisteos manotlatkitikan intlaluan israelitas. San ika, nemiyaj sekimej israelitas akin kitlasojtlayaj Jehová, ken Manóah niman isiuauj. Yejuamej xkipiayaj ikoneuan. Se tonajli Jehová okititlan iiluikaktekitkauj kampa isiuauj Manóah. Iluikaktekitketl okijli: “Tikpiyas se mokoneuj. Yejua kimakixtis Israel itech filisteos. Yejua yes se nazareo”. ¿Tikmati akinomej katkaj nazareos? Yejuamej kitekichiuiayaj Jehová niman intekiyo melak tlasojtiya. Nazareos xkinkauiliayaj makitekikan intson.

Sakin, onemiko inkoneuj niman okitokayotijkej Sansón. Ijkuak Sansón onoskalti, Jehová okichiu j ika melak makojtik. Yejua ueliya kimiktiaya se león san ika imauan. Se tonajli, Sansón san iselti

“On ueyi poder yejuan topan onkaj xtotech kistikaj, yej ualejtikaj itech Dios” (2 Corintios 4:7).

okinmikti 30 filisteos. Filisteos kitlaelitayaj niman kitejtemouiliayaj kenon kimiktiskej. Se yeuajli, ijkuak Sansón kochtuya ipan ueyikalpan Gaza, itlaelikniuan oyajkej kampa ipuertas ueyikalpan niman ompa kichiatoyaj

pampa uajmostla ika kualkan kimiktiskiaj. Ika tlajkoyeuajli, Sansón onokuiteuj niman okinkopin puertas itech tepantin. Yejua okinomamalti puertas niman okimitkik ikuatipan se tepetl tlen nokauaya nisiuj Hebrón.

Sakin, filisteos okitatoj Dalila, akin iuan kistinemiya Sansón, niman okijlikej: “Melak miyek tomin timitsmakaskej, tla ueli tikmati tleka Sansón melak kojtik. Tiknekij tikasiskej niman tiktsakuaskej”. Dalila kinekiya yejon tomin kuakon okiseli tlen okijlikej. Kachtopa, Sansón xkinekiya kijlis tleka kojtik katka. San ika, pampa Dalila xokikajkauj ika kitlajtoltiaya Sansón kanon ualeuaya ikojtis, yejua okijli: “Xkeman nechtekiliaj notson pampa ninazareo. Tla nechtekiliaj notson nikpolos nokojtilis”. ¿Xmelak ika onopopolo Sansón ijkuak okijli Dalila yejuin?

Dalila nimantsin okimijli filisteos: “¡Inikmatstika tleka kojtik!”. Yejua okichiu j ika Sansón makochi ipan imetskojyouan, kuakon okiteijli makitekilikan itson. Dalila otsajtsik: “Sansón, ¡nikan nemij filisteos!”. Ijkuak Sansón tlachia, okimachili ika xok kojtik katka. Filisteos okajsikej, okichiu jkej maka ok matlachia niman okitsajkej.

Se tonajli, melak miyekej filisteos onosentlalijkej ipan iteopan intajtsin Dagón niman tsajtsiyaj: “¡Totajtsin otechmaktili Sansón! ¡Xkuajuikakan! Matechtlamauisolti”. Okichiu jkej manotelketsa itlajkotian ome pilares niman okipijpinaujtikej. Sansón otsajtsik: “Jehová, nimitstlajtlanilia, sa aman xnechmaka nokojtilis”. Sansón yotsonueueyakiyaka. Ika nochi ikojtilis, yejua okinmapeuj ipilares teopan. Kuakon teopan ouets niman okinmikti nochimej akin ompa nemiyaj, Sansón noijki omik.

Tlajtoltlistin: ¿Tleka Sansón melak kojtik katka?

¿Tlenon ipan onochiu j Sansón ijkuak okijli Dalila tleka kojtik katka?

Jueces 13:1-16:31.





7

Yejuin sección tlajtos itech inemilis tekiuj Saúl niman tekiuj David, ouejkauj kanaj 80 xiuitl. Kachtopa, Saúl yolyemanki katka niman kimojkaitaya toTajtsin, san ika, yejua nimantsin onopatlak niman xok okinek kitlakamatis itlayekanalís Jehová. Kuakon Jehová xok iuan onouikak niman okijli Samuel makitlapejpeni David ken akin tekiujtiskia ipan Israel. Pampa Saúl kinexikolitaya David miyekpa okiyejyeko kimiktis, san ika, David xkeman onotlakuepilti. Jonatán, ikoneuj Saúl, kimatstoya ika Jehová yokitlapejpenijka David, ika yejon, xkeman okikauj. Maski David okichiuuj uejueyimej tlajtlakoltin, nochipa onokauili Jehová makiyektlali. Tla tikiapiya mokoneuan xkinpaleui makitakan ika melak noneki nochipa manotlakamati ken tlayekana toTajtsin.



TLAMACHTILTIN TLEN NONEKI XMATI

- Jehová melak kitlasojkaita ijkuak tiktlakamatij pampa tiktlasojtłaj.
- Maka matotlakuepiltikan, matijkauilikan Jehová makiyektlali tlen xkuajli.
- Tla tikchiuaj se ueyi tlajtlakojli, maka matikyejyekokan tikiyanaskej.

39 Kachtopa tekiuaj ipan Israel

Jehová okinmakak israelitas jueces akin kinyekanaskiaj, san ika, yejuamej kinekiyaj se tekiuaj. Ijkuakon okijlikej Samuel: “Nochimej kalpamej tlen onka toyeualiyan kipiayaj tekiuajkej. Tejuamej noijki tiknekij se”. Samuel okitak ika yejon xkuajli katka, kuakon okichiuii teoyotl Jehová. Niman Jehová okinankili: “Xtejua mitsixnamikij, nejua akin nechixnamikij. Xkimijli ika kipiymaskej se tekiuaj, san ika, tekiuaj kintlajtlanilis miyek tlemach”. San ika, kalpan okijto: “¡Maski! ¡Tiknekij se tekiuaj!”.

Jehová okijli Samuel ika se tlakatl akin itoka katka Saúl yeskia kachtopa tekiuaj. Ijkuak Saúl okitlajpaloto Samuel ipan Ramá, Samuel okiteititi ika okitlapejpeni Saúl ken tekiuaj, ijkuak okitoyauili tlen chiauak ipan itsontekon.

Sakin, Samuel okinsentlali israelitas makixmatikan yenkuik tekiuaj. San ika, xkanaj kinextiayaj Saúl. ¿Tikmati tleka? Pampa niyantoya kampa tlayejyeualo. Ijkuak okinextitoj Saúl, okuajkixtijkej niman okitelketskej itlajkotian kalpan. Saúl melak uejkapan xijkon ken oksekimej niman melak kualtsin katka. Samuel okijto: “Xkitakan akin Jehová okitlapejpeni”. Niman kalpan chikauak okijto: “¡Uejkaujtipan manemi totekiuaj!”.

Kachtopa, tekiuaj Saúl kikakiya Samuel niman kitlakamatiya Jehová. San ika, sakín onopatlak. Se tonajli, Samuel okijli Saúl makichia pampa yejua tlauentlaliskia. Tekiuaj xkipiya ika tlauentlalis, san ika, pampa Samuel xnimantsin oyejkok, Saúl otlauentlali. ¿Tlenon okichiuaj Samuel? Yejua okijli: “Nonekiya tiktlakamatis Jehová niman xotikchiuj”. ¿Itlaj ueliskia Saúl ipampa tlen xkuajli okichiuaj?

Sakin, ijkuak Saúl okimixnamikito amalequitas, Samuel okijli Saúl ika nochimej makinmikti. San ika, Saúl xokimikti tekiuaj Agag. Jehová okijli Samuel: “Saúl yonechkauj niman xok nechtlakamati”. Samuel melak onoyolkoko niman okijli Saúl: “Pampa tejua xok tiktlakamati Jehová, yejua kitlapejpenis okse tekiuaj”. Ijkuak Samuel iyajtoya, Saúl

**“Tiklakamatis melak kuajli
xijkon ken se uentli”
(1 Samuel 15:22).**

okikitski niman okikotonili itenko itlaken. Kuakon Samuel okijli Saúl:
“Ijkon ken otijkoton notlaken, Jehová mitskixtilis motekiuajyo”.
Jehová okse kimakaskia itekiuajyo akin kema kitlasojtlaskia niman
kitlakamatiskia.

Tlajtoltlistin: ¿Tlenon okitlajtlankej israelitas? ¿Tleka Jehová xok okiseli Saúl ken tekiuaj?
1 Samuel 8:1-22; 9:1, 2, 15-17; 10:8, 20-24; 13:1-14; 15:1-35.



40 David niman Goliat

Jehová okijli Samuel: “Xuiya ichan Jesé. Semej itech ikoneuan tekiuaj yes ipan Israel”. Kuakon Samuel oyaj ichan Jesé. Ijkuak okitak akin yakatstiu j itech ikoneuan Jesé, okinemili: “Yejuin telpochtli yes”. San ika, Jehová okijli ika xyejua akin yokitlapejpenijka. Jehová okijli: “Nejua nikita tlen onka ipan iyojlo tlaltikpakchane, xsan tlen nesi ixko”.



Jesé okititi Samuel oksekimej chikuasen ikoneuan. San ika, Samuel okijto: “Jehová nion se xokitlapejpeni. ¿Tikinpiya oksekimej mokoneuan?”. Jesé okijto: “Nikpiya okse, yejua xokoyotl, itoka David. Kintlajpiya borregos kiyauak”. Ijkuak David okalak, Jehová okijli Samuel: “Yejua akin yoniktapejpeni”. Samuel okitoyauili David ipan itsontekon tlen chiauak, ika yejuin onoteititi ika yejua yeskia tekiuaj ipan Israel.

Sakin, israelitas niman filisteos inoixnamikiskiaj. Imiuan filisteos nemiya se soldado akin melak uejkapan, itoka katka Goliat. Mojmostla Goliat kinpijpinaujtiaya israelitas. Yejua okintsajtsili: “Xnechuajtitanilikan se tlakatl akin manechixnamiki. Tla nechtlani tochiuaskej nemotlakeualuan. San ika, tla niktlani nentotlakeualuan yeskej”.

David oyaj kampa soldados israelitas, okinkauilito tlakuajli ikniuian akin soldados katkaj. David okikak Goliat niman okijto: “Nejua nikixnamikis”. Tekiuaj Saúl okijli: “San titelpochtli”. Yejua okinankili: “Jehová nechpaleuis”.





“On tlakamej xueliskej nomakixtiskej, pero Dios uelis kinmakixtis pampa para Dios xitlaj oujtitikaj kichiuu” (Marcos 10:27).

Saúl okitlaneujti itlaken tlen kikui ijkuak ontlaixnamiki, san ika, David okijli: “Xuelis nitlaixnamikis ika yejuin”. David okajsik imatematlauj niman oyaj ipan atentli, okitlapejpeni makuijli temej pestijkej niman okintlali ipan imorral. Kuakon, David onotlalo kampa Goliat. Yejon tlakatl uejkapan otsajtsik: “Xuajla nikan, telpochtsintli. Nikchiuas mamitskuakan totomej niman yolkamej tekuanimej”. David xonomojti niman okinankili: “Tejua tinechixnamiki ika se espada, niman se lanza, san ika, nejua nimitsixnamikis ika itoka Jehová. Xtejuamej titechixnamiktika, tikixnamiktika toTajtsin. Nochimej nikan kitaskej ika Jehová melak kojtik xijkon ken se espada noso se lanza. Yejuu kichiuas matimechtlanikan”.

David okitlali tetl ipan imatematlauj niman okimotlak ika nochi ikojtilis. Ika itlapaleuilis Jehová, tetl tlen ika okimotlak okalak ipan ixkuateuj Goliat. Yejon uejkapan tlakatl ouets ipan tlajli niman omik. Kuakon filisteos ocholojkej. ¿Titlaneltoka ipan Jehová ijkon ken okichiu David?

Tlajtoltlistin: ¿Akinon okitlapejpeni Jehová ken yenkuik tekiauaj ipan Israel?
¿Kenon David okitlan Goliat?

1 Samuel 16:1-13; 17:1-54.




41 David niman Saúl

Ijkuak David yokimiktijka Goliat, tekiuaj Saúl okitlali makinyekana isoldados. David miyekpa otetlan ijkuak otlaixnamik niman melak okixmatkej. Ijkuak yotlaixnamijka niman nokuepaya ichan, siuamej nokuikatiyaj niman nijtotiyaj ijkuak kuajnamikiyaj niman kijtouayaj: “Saúl okinmikti miyekej, san ika, David okinmikti melak miyekej”. Saúl opeuj kinexikolita David niman kinekiya kimiktis.

David melak kuajli kitsotsonaya arpa. Se tonajli, ijkuak kitlatsotsonilijtoya Saúl, tekiuaj okimotlak ika ilanza. David nimantsin onejkuani niman lanza okalak ipan tepantli. Sakin, Saúl miyekpa okiyejyeko kimiktis. Kuakon David ocholaj niman oniyanto ipan tlaluaktli.

Saúl oyaj imiuan 3,000 tlakamej okitejtemotoj David. Saúl okalak ijtik teostotl kampa nemiya David niman

“Xchiukan kanika hasta kampa nenueliskej kenijki nemoyolika nennemiskej iuan nochi tlakatl. Notlajsojkaikniuan, maka sa no nemejuamej itlaj xtekuepiltikan” (Romanos 12:18, 19).




akin imiuan kistinemiya. Yejuamej okichtakajlikej David: “Amantsin uelis tikmiktis Saúl”. David ononisiui itech tekiuaj niman okitekili tlajkotsin itlaken. Saúl nion xokimat. Sakin, David melak xkuajli onomachili pampa xokitlakaitak tekiuaj akin Jehová yokitlapejpenijka. Yejua xokinkauili tlakamej makimiktikan Saúl. Ijkuak Saúl ouajkis itech teostotl, David okonijli: “Ueliskia nimitsmiktiskia, san ika, xonikchiuj”. ¿Kipatlaskia Saúl tlen kinemiliaya itech David?

Ka. Saúl ok okitlaueltokak David. Se yeuajli, David niman isobrino Abisái sa ichtakatsin okalajkej kampa Saúl niman isoldados onokajkaltijkej. Hasta Abner akin kitlajpiaya tekiuaj Saúl kochtoya. Abisái okijto: “¿Aman kema uelis tikmiktiskej! Xnechkauili manikchiua”. David okijli: “Jehová kitlajtlakolmakas Saúl. San xkajsi iatekon niman ilanza, niman tiauej”.

David otlejkok ikuatipan tepetl tlen nisiuj onkatka, ompa ueliya kitaya kampa onokajkaltijkaj Saúl niman isoldados. Yejua okitsajtsili: “Abner, ¿tleka xotiktalajpix motekiuaj? ¿Kanon onka ilanza niman iatekon?”. Saúl okitenkak David niman okijli: “Ueliskia tinechmiktiskia niman xotikchiuj. Aman nikmati ika titekiuaj yes ipan Israel”. Tekiuaj Saúl onokuiep ichan. San ika, xnochimej ichanejkauan Saúl kitlauelitayaj David.

Tlajtoltlistin: ¿Tleka Saúl kinekiya kimiktis David?
¿Tleka David xokinek kimiktis Saúl?

**1 Samuel 16:14-23; 18:5-16; 19:9-12; 23:19-29;
24:1-15; 26:1-25.**



An illustration showing a group of soldiers standing on a rocky cliff. They are wearing white tunics and head coverings, and some are holding spears and shields. The background is a bright, hazy sky.

42 Jonatán katka yolchikauak niman yolmelaujki

Ikoneuj tekiuaj Saúl akin yakatstiaya, Jonatán, katka se tlaixnamijketl yolchikauak. David okijto ika Jonatán melak chikauak notlalouaya xken se águila niman melak kojtik xken se león. Se tonajli, Jonatán okitak seki filisteos ikuatipan tepetl. Kuakon yejua okijli itlajpixkauj: “Tikimixnamikiskej san tla Jehová techititia ika ijkon kineki, tla filisteos kijtouaj matitlejkokan, kuakon tikmatiskej ika noneki tikimixnamikiskej”. Filisteos okintsajtsilijkej: “Xuajtletjkokan, matoixnamikikan”. Kuakon, yejuamej otepetlejkokej niman okintlankej yejon 20 soldados.

Pampa Jonatán yakatstiaya itech ikoneuan Saúl, yejua yeskia akin kitekipatlaskia Saúl. San ika, kimatstoya ika Jehová yokitlapejpenijka David ken akin tekiuaj yes ipan Israel, maski ijkon xkinexikolitaya. Jonatán niman David melak kuajli onouikakej. Onoijlikej ika

notlajpiyaskiaj niman nopaleuiskiaj. Jonatán okimakak David itlaken, iespada, iarco niman icinturón ijkon okititi ika melak kuajli nouikayaj.

Ijkuak David niyantiniemiya ipampa Saúl, Jonatán okitato niman okijli: “Xpiya kojtilistli niman xyolchikauí. Jehová yomitstlapejpeni ken tekiuaj niman notaj kimatstok”. ¿Tikuelitaskia tikpiyas akin iuan timouikas ijkon ken Jonatán?

Miyekpa Jonatán okipaleui David maski ueliskia mikis. Yejua kimatiya ika tekiuaj Saúl kinekiya kimiktis David, kuakon okijli itaj: “Tla tikmiktia David titlajtlakos. Yejua xokichiuj tlen xkuajli”. Saúl melak okualan iuan Jonatán. Opanok seki xiuitl niman Saúl iuan Jonatán omijkej san sekan ijkuak tlaixnamikiyaj.

Ijkuak Jonatán yomijka, David okitejtemo ikoneuj Jonatán akin itoka katka Mefibóset. Ijkuak okinexti, okijli: “Pampa motaj melak kuajli iuan ninouikaya, nimitstlajpiyas ipan nochi monemilis. Nouan tichantis niman nouan titlakuas”. David xkeman okilkauj Jonatán akin iuan onouikak.

Tlajtoltilistin: ¿Kenon okiteititi Jonatán ika yolchikauak katka? ¿Kenon okiteititi Jonatán ika yolmelaujki katka?

1 Samuel 14:1-23; 18:1-4; 19:1-6;
20:32-42; 23:16-18; 31:1-7;
2 Samuel 1:23; 9:1-13.

“Xmotlajsojtlakan iuan oksekimej ijkon ken nejua nemechtlajsojtla. On tetlajsojtlalistli más ueyi yejuan se uelis kiplas sa no yejua on ika mamiki impampa itetlajsojkauan” (Juan 15:12, 13).



43 Itlajtlakol tekiuaj David

Ijkuak Saúl omik, David onochiuj tekiuaj. Kipiaya 30 xiuitl. Opanok seki xiuitl, se yeuajli ijkuak nemiya ikuatipan ichan, okitak se suatl melak kualtsin. David okimat ika suatl itoka katka Bat-Seba niman ika yononamiktijka iuan se soldado akin itoka katka Urías. David otlanaui makuikakan ichan, san sekan onotekakej niman suatl okoneuajtik. David okiyejyeko kiyanas tlen okichiuj niman okijli akin kinyekanaya isoldados makitlali Urías inyekapan kampa tlaixnamikij niman iselti makikauakan. Urías omik kampa tlaixnamikiyaj, sakin David ononamikti iuan Bat-Seba.




San ika, Jehová okitak nochi tlen xkuajli opanok. ¿Tlenon kichiuaskia? Jehová okititlan teotlajtoketl Natán kampa David. Natán okijli: “Nemiya se tlakatl akin kipiaya miyek tomin niman miyek borregos, niman okse akin xkipiaya tomin, yejua san se borreguito kipiaya niman melak kitlasojtlaya. Tlakatl akin kipiaya tomin okikuili iborreguito akin xkipiaya tomin”. David melak okualan niman okijto: “¡Yejon tlakatl akin kipiaya tomin kimelaua mikis!”. Natán

okijli: “¡Tejua yejon tlakatl!”. David melak onoyolkoko niman okijto: “Yonitlajtlako ixpan Jehová”. Yejon tlajtlakojli okuajkuili miyek tlauejli niman noijki ichanejkauan. Jehová okitlajtlakolmakak David, san ika, okikauili manemi pampa okijto tlen melauak niman onoyolyemanili.

David kinekiya kichijchiuilis iteopan Jehová. San ika, Jehová okitlapejpeni Salomón, ikoneuj David, makichijchiuili. David opeuj kiyektlalia tlen kitekitiltiskia Salomón niman okijto: “Iteopan

Jehová noneki melak ueyixtos. Salomón ok telpochtli, san ika, nikyektlalilis nochi tlen notekitiltis”. David otemakak melak miyek itomin tlen notekitiltiskia ipan tekitl. Okinnexiti tekitkej tlamachilisejkej, okisentlali oro niman plata. Noijki cedro tlen ualeuaya Tiro niman Sidón. Ijkuak sa achijtsin poliuiya ika mikiskia, David okimakak Salomón amamej kampa nesiya kenon nochijchiuaskia teopan. Yejua okijli: “Jehová onechijli manikijkuilo niman manimitsmaka yejuin. Jehová mitspaleuis. Maka xmomojti. Xyolchikaui niman xchiua motekiyo”.



Tlajtoltlistin: ¿Tlenon tlajtlakoqli okichij David?
¿Kenon okipaleui David ikoneuj Salomón?

**2 Samuel 5:3, 4, 10; 7:1-16; 8:1-14;
11:1-12:14; 1 Crónicas 22:1-19;
28:11-21; Salmo 51:1-19.**

“Akin kiyana tlen xkuajli kichijtika xkuajli onkisas, san ika, akin noyolkuitia niman xok kichia kikeliskej” (Proverbios 28:13).





8

Jehová okichiu jka Salomón melak matlamachilise niman okikauili makichijchua teopan. San ika, ika yolik onoxelo itech Jehová. Tla tikipiya mokoneuan, xkintomili kenon akin kinueyichiuajaj tajtsitsintin okichiu jkej ika Salomón makikaua toTajtsin. Tekiuajyotl onotlajkoxelo niman xkuakualtin tekiuajkej okichiu jkej ika kalpan makixnamiki tlen melauak niman makiueyichia tajtsitsintin. Ipan yejon tonaltin, okintlajyouiltijkej niman okinmiktijkej miyekej teotlajtokej akin xokikau jkej toTajtsin. Se siuatl akin tekiuaj katka, Jezabel, okichiu j ika tekiuajyotl tlen onkatka ika tlakpak melak maijtlakaui. Opanok tlen melak xkuajli ipan Israel. Maski ijkon, nemiyaj miyekej itekipanojkauan toTajtsin akin xokikau jkej, ken tekiuaj Jehosafat niman teotlajtoketl Elías.



TLAMACHTILTIN TLEN NONEKI XMATI

- Matiyolmelaujkanemikan itech Jehová maski tochanekauan noso akin imiuan touikaj xkichiuj.
- Tla tijkauaj Jehová, xkuajli tonkisaskej. San ika, tla xtijkauaj, yejua techteochiuas.
- Miyekpa ijkuak tikmachiliskej ika xok titlaxikouaj, Jehová techititis ichikaualis ken nion xtiknemiliaj.

44 Se teopan tlen okichijchiuilijkej Jehová


Ijkuak Salomón opeuj tekiuajti ipan Israel, Jehová okitlajtolti: “¿Tlenon tiknekiskia manimitsmaka?”. Salomón okinankili: “Nejua san nitelpochtli niman xnikmati tlenon noneki nikchuias. Nimitstlajtlanilia xnechmaka tlamachilistli, ijkon kuajli niktajpiyas kalpan”. Jehová okijli: “Pampa otiktajtlan tlamachilistli, nikchuias xpiya tlamachilistli ken xakaj kipiya. Noijki nimitsmakas miyek tomin. Niman tla tinechtlakamati, uejkaujtipan tinemis”.

Salomón opeuj kichijchiua teopan. Yejua okitekilti tlen melak kuajli oro, plata, madera niman temej. Miyekej tlamachilisejkej tlakamej niman siamej otekitkej ipan yejuin teopan. Teopan ouejkauj kichijchiuaj chikome xiuitl. Pampa yoajsika tonajli ijkuak kimaktiliskiaj Jehová, otlauentlalijkej ipan tlaixpan. Salomón onotlakuankets ixpan niman ipan iteoyouj okijto: “Jehová mitsmelaua tikpiyas se teopan melak ueyi niman melak kualtsin xijkon ken yejuin. San ika, nimitstlajtlanilia xseli matimitsueyichiuakan niman xkaki toteoyouan”. ¿Tlenon okinemili Jehová itech teopan niman iteoyouj Salomón? Nimantsin ijkuak Salomón otlán iteoyouj, tli tl ouajtemok itech iluikak niman okitlati uentli tlen onkatka ipan tlaixpan. Ijkon Jehová okiteititi ika kiseliaya teopan. Ijkuak israelitas okitakej yejuin, melak opajkej.

Tekiuj Salomón okixmatkej ika melak tlamachilise ipan Israel niman nochuiyan. Miyekej konitayaj makinpaleui ika intlaueluan. Hasta se siuatl akin tekiuj katka ipan Seba oyaj itech, okitlatlatak ika ouijtika tlajtoltilistin. Ijkuak okikak itlanankilisuan, okijto: “Xnikneltokaya tlen oksekimej kijtouayaj motech, san ika, aman nikita ika melak titlamachilise xijkon ken kijtouayaj. MoTajtsin Jehová yomitsteochiuj”. Israelitas melak pakijaj niman kuajli nemiyaj. San ika, yejuin nopatlaskia.

Tlajtoltilistin: ¿Tleka Jehová okichij ika Salomón melak matlamachilise?
¿Kenon okiteititi Jehová ika kiseliaya teopan?

1 Reyes 2:12; 3:4-28; 4:29-5:18; 6:37, 38; 7:15-8:66; 10:1-13; 2 Crónicas 7:1; 9:22.





**“Nikan nemi on yejuan más ueyixtikaj xken Salomón”
(Mateo 12:42).**

45 Se tekiuajyotl tlajkoxeliui

Ijkuak Salomón kiueyichiuaya Jehová, israelitas nemiyaj ika yolseuilistli. San ika, Salomón ononamikti imiuan miyekej siamej akin ualeuayaj oksekan niman kinueyichiuayaj tajtsitsintin. Ika yolik, Salomón onopatlak niman noijki opeuj kinueyichiuajaj tajtsitsintin. Jehová melak okualan. Yejua okijli Salomón: “Nijkuilis mochanejkauan tekiuajyotl ipan Israel niman niktajkoxelos. Tlen ueyi itech motekiujyotl nikmakas se motlakeual niman mochanejkauan nokauaskej san ika tlen pitentsin”.

Jehová okichiuaj itlaj tlen ika teasikamachiltiskia tlen yokijtoka. Se itlakeual Salomón, Jeroboán, ononexti ipan ojtli iuan teotlajtoketl Ahíya. Yejua okikojkoton itlaken, okikixti 12 tlajkotsitsintin, niman okijli Jeroboán: “Jehová kikuilis ichanejkauan Salomón tekiuajyotl itech Israel niman notlajkoxelos. Xkajsi yejuin majtlaktli tlajkotsitsintin pampa tejua titekiuajtis ipan majtlaktli uejueyimej familias”. Ijkuak tekiuaj Salomón okikak yejuin kinekiya kimiktis Jeroboán! Kuakon Jeroboán ocholoj Egipto. Sakin, Salomón omik niman ikoneuj Rehoboam onochiuaj tekiuaj. Kuakon, Jeroboán okinemili ika iueliskia nokuepas Israel.

Tlayekankej itech Israel okijlikej Rehoboam: “Tla tejua tikpaleuiya kalpan, yejuamej xkeman mitskauaskej”. San ika,



**“Maka xmosentlali iuan yakaj yejuan xtlaneltoka itech Cristo. ¿Kenijki yakaj yejuan yolmelajki uelis nouikas san sean iuan yakaj yejuan xyolmelajki? [...]. Noso ¿kenijki uelis san se tlamachilistli kiplias on tlaneltokaketl iuan on yejuan xtlaneltoka?”
(2 Corintios 6:14, 15).**

Rehoboam okinkak telpokamej akin imiuan nouikaya, yejuamej okijlikej: “¡Noneki tikchikajkanotsas kalpan! ¡Xchiualti kalpan chikauak matekiti!”. Rehoboam okinkak telpokamej. Niman opeuj kitlajyouiltia kalpan, kuakon majtlaktli uejueyimej familias okixnamijkej. Yejuamej okichiuujkej ika Jeroboán matekiuajti ipan majtlaktli uejueyimej familias, tlen okixmatkej ken tekiuajyotl itech Israel. Okseki ome uejueyimej familias okixmatkej ken tekiuajyotl itech Judá niman xokikaujkej Rehoboam. Ijkon onotlajkoxelojkej 12 uejueyimej familias itech Israel.

Jeroboán xkinekiya ika kalpan makiueyichiuati Jehová ipan Jerusalén, kampa tlanauatiaya Rehoboam. ¿Tikmati tleka? Jeroboán kimojtiaya ika kalpan manokuepa itech Rehoboam niman makipaleui. Yejua okinchijchiuj ome uakaxkokonej tlachijchiujtin ika oro niman okijli kalpan: “Jerusalén melak uejka nokaua. Kuajli tla sa nikan nenkiueyichiuaj uakaxkokonej tlachijchiujtin ika oro”. Kalpan okikak Jeroboán niman oksejpa okilkauj Jehová.

Tlajtoltilistin: ¿Tleka Israel onotlajkoxelo?

¿Tlenon xkuajli okichiuujkej tekiuajkej Rehoboam niman Jeroboán?

1 Reyes 11:1-13, 26-43; 12:1-33.



46 Jehová okiteititi ika yejua toTajtsin akin melauak

Majtlaktli uejueyimej familias itech Israel okipixkej xkuakualtin tekiuajkej, san ika, Acab katka melak xkuajli. Yejua ononamikti iuan se xkuajli siuatl akin kiueyichiuaya Baal. Itoka katka Jezabel. Acab iuan Jezabel okichiuajkej ika miyekej makiueyichiuakan Baal niman okinmiktijkej iteotlajtokauan Jehová. ¿Tlenon okichiuaj Jehová? Okititlan teotlajtoketl Elías makijliti Acab tlen yokijlika.

Elías okijli tekiuaj Acab ika pampa kichiuaya tlen xkuajli, xkiyauiskia ipan Israel. Ipantsin yeyi xiuitl xtlaj otlak niman kalpan opeuj kipiya apistli. Sakin, Jehová oksejpa okititlan Elías itech Acab. Tekiuaj okijli: “¡Tejua akin tikpeualtia tlauejli! Nochi yejuin motlajtlakol”. Elías okinankili: “Xnotlajtlakol ika xkiyaui. Tejua otikchiuj pampa tikueyichiuajtika Baal. Matikchiuakan itlaj tlen kiteititis akinon toTajtsin akin melauak. Xsentlali kalpan niman iteotlajtokauan Baal ipan tepetl Carmelo”.

Kalpan onosentlali ipan tepetl. Elías okimijli: “Xtlapejpenikan. Tla Jehová yejua toTajtsin akin melauak, xtokakan. San ika, tla Baal, xtokakan yejua. Matikchiuakan yejuin: 450 iteotlajtokauan Baal kipiayaj ika tlauentlaliskej niman kinotsaskej intajtsin niman nejua nitlauentlalis niman niknotsas Jehová. Akin tlanankilis ika tlitl yejua yes toTajtsin akin melauak”. Kalpan okinek.

Iteotlajtokauan Baal okiyektlalijkej uentli. Osetonalojkej kinotstoyaj intajtsin: “¡Baal, xtechnankili!”. Pampa Baal xokinnankili, Elías opeuj kinpijpinaujtia. Yejua okijto: “Xchikajkatsatsilikan, kanaj yokoch niman noneki yakaj makitlachialti”. Itlapoyaujtoya niman iteotlajtokauan Baal ok kitsatsilitoyaj. San ika, xkinnankiliaya.

Elías okitlali uentli ipan tlaixpan niman okitoyauili miyek atl. Sakin, okichiuaj teoyotl niman okijto: “Jehová, nimitstlajtlanilia xkauili kalpan makimati ika san tejua titoTajtsin akin melauak”. Nimantsin Jehová okichiuaj mauetsiki tlitl itech iluikak niman okitlati uentli.

Kalpan otsajtsik: “¡Jehová yejua toTajtsin akin melauak!”. Aman Elías okijto: “¡Xkinmasikan iteotlajtokauan Baal!”. Ipan yejon tonajli, okinmiktijkej 450 iteotlajtokauan Baal.

Ouajnonexti se moxstintli ipan mar niman Elías okijli Acab: “Melak chikauak kiyauis. Xsalo carreta niman xuiya mochan”. Melak otlamoxten, oajakak niman opeuj melak chikauak kiyauis. Ijkon otlán ika xkiyauiya. Acab totoka oyaj ipan icarreta. Jehová okipaleui Elías manotlalo chikauak, ¡hasta okitlan yejon carreta! San ika ¿ompa otlán nochi itlaueluan Elías? Matikitakan.

Tlajtoltilistin: ¿Kenon okiteititi Jehová ika yejua toTajtsin akin melauak? ¿Kenon Jehová okinankili iteoyouj Elías?

1 Reyes 16:29-33; 17:1; 18:1, 2, 17-46; Santiago 5:16-18.

“Makimatikan tlatikpakchanejkej ika tejuá, akin motoka Jehová, san tejuá tiUeyixtika ipan nochi tlatikpaktli” (Salmo 83:18).



47 Jehová okiyolchikauj Elías


Jezabel okimat tlen inpan onochiuj iteotlajtokauan Baal niman melak okualan. Otlanauati makijlitij Elías: “Mostla noijki timikis ken iteotlajtokauan Baal”. Elías melak onomojti niman ocholojteuj kampa tlaluaktli. Ompa okichiuuj teoyotl niman okijto: “Jehová xok nitlaxikoua. Xnechkauili manimiki”. Elías melak siaujtoya niman okoch itsintlan se kojtlí.

Se iluikaktekitketl okitlatlachialti niman ika yemanki tlajtojli okijli: “Xmokuiteua, xtlakua”. Elías okitak se pan yeualtik totonixtoya ipan temej niman se atekontli. Yejua otlakua niman oatlik, sakin oksejpa okoch. Iluikaktekitketl oksejpa okitlatlachialti niman okijli: “Xtlakua. Noneki tichikaujtos pampa uejka tinejnemis”. Kuakon Elías oksejpa otlakua. Sakin onejnen 40 tonajli niman 40 yeuajli hasta oajsik tepetl Horeb. Ompa okochito ijtik se teostotl. Kuakon Jehová okijli: “Elías, ¿tlenon nikan tikchiujtika?”. Elías okinankili: “Israelitas xkichiujtokej tlen okijtokej. Yokinnoxotonijkej kampa mitsuentlaliliayaj niman yokinmiktijkej moteotlajtokauan. Aman yejuamej noijki kinekij nechmiktiskej”.

Jehová okijli: “Xkisa niman xijkato ipan tepetl”. Kuakon chikauak oajakak, melak otlalolin niman sakin, tlitl. Sa ika tlami, Elías okikak se tlajtojli tlen kakistiya yolik niman yemanki. Yejua onoxayakatlapacho ika itlaken niman onokauj ikiyauak teostotl. Jehová okitlajtohti tleka cholojtinemiya. Elías okijto: “Sa nejua ninokaua”. San ika, Jehová okijli: “Xmoselti tinemi. Ipan Israel ok nemij 7,000 akin nechueyichiuaj. Xuiya niman xkijli Eliseo ika yejua mitstekipatlas ken teotlajtoketl”. Elías nimantsin okichiuuj tlen Jehová okinauati. ¿Tiknemilia ika Jehová noijki mitspaleuis tla tiktlakamati? Kema kichiuas. Aman matikitakan tlenon opanok ijkuak ok xkiyauiya.

Tlajtoltilistin: ¿Tleka Elías ocholoj? ¿Tlenon Jehová okijli Elías?

1 Reyes 19:1-18; Romanos 11:2-4.

A man with a long white beard, wearing a white robe and a brown fur cloak, stands in a rocky, mountainous landscape. He is gesturing with his right hand towards the left. The scene is illuminated by bright, warm light, possibly from the sun, creating a hazy atmosphere. The ground is covered in large, reddish-brown rocks and sparse, dry vegetation.

**“Maka itlaj xkomatstiakan, yej
nochipa xchiuakan oración,
niman xtlajtlanilikan Dios
ikan tlaxtlauijli nochi
tlen mechpoloua”
(Filipenses 4:6).**



48 Oyoliuj ikoneuj se siuakauajli

Ipan tonaltin ijkuak ok xkiyauiya, Jehová okijli Elías: “Xuiya Sarepta. Ompa se siuakauajli mitstlakualtis”. Ikalakiayan ueyikalpan, Elías okitak se siuakauajli akin xtlaj kipiaya, tlakopejpentok. Elías okitlajtlanili atl. Ijkuak siuakauajli ikonkuiliskia, Elías okijli: “Nimitstlajtlanilia, xnechuajkuili pan”. Siuakauajli okinankili: “Xnikpiya pan tlen uelis nimitsmakas. San nikpiya achijtsin tlen chiauak niman harina tlen ika nikchijchiuas tlen tijkuaskej nejua iuan nokoneuj”. Elías okijli: “Jehová yokijto ika tla tinexchijchiuilia pan, xtlamis tlen chiauak niman harina tlen tikpiya, hasta ijkuak oksejpa kiyauis”.

Kuakon siuakauajli oyaj ichan niman okichijchiuili pan. Ijkon ken Jehová okijtoka, siuakauajli niman ikoneuj nochipa okipixkej tlen kikuaskej ijkuak ok xkiyauiya. Kontin tlen kipiayaj tlen chiauak niman harina xotlankej.



“Xkimixtlalokan on kakalomej ika xtokaj nion pixkaj, nion kipiaj inkueskon noso kajli para tlayejyeua. Pero Dios kintlakualtia. ¡Nemejuamej, tej, más sanoyej nenueyikijtosnekij xken on totomej!” (Lucas 12:24).

Kuakon opanok itlaj tlen teajman. Ikoneuj siuakauajli melak okualok niman omik. Yejua okitlatlaujti Elías makipaleui. Elías okontilanili ikoneuj siuakauajli niman okuikak tlakpak kampa kochiya, okitekak ipan itlapech niman okichiu teoyotl, okijto: “Jehová, nimitstlajtlanilia, xyoliti yejuin konetl”. ¿Tikmati tleka melak temojkatlachialtiskia tla Jehová kichiuaskia yejon? Pampa xkeman nomatiya tla yakaj mayoliui. Noijki pampa siuakauajli niman ikoneuj xkatkaj israelitas.

Kuakon, konetl opeuj nijyotia niman oyoliuj. Elías okijli siuakauajli: “¡Xkita! Mokoneuj yoltika”. Yejua melak opak niman okijli Elías: “Aman nikmati ika toTajtsin omitsajtitlan. Tlen tikijtoua ualeua itech Jehová niman nochipa nochia”.

Tlajtoltilistin: ¿Kenon okiteititi siuakauajli akin chantiya Sarepta ika tlaneltokaya itech Jehová? ¿Kenon tikmatij ika Elías melauak katka se iteotlajtokauj toTajtsin?

1 Reyes 17:8-24; Lucas 4:25, 26.



49 Okitlajtlakolmakakej se xkuajli siuatl

Itech iventana kampa chantiya ipan Jezreel, tekiuaj Acab kitaya itlal se tlakatl akin itoka katka Nabot, kampa kitokaya uvas. Acab kinekiya yejon tlajli niman okiyejyeko kikouilis. San ika, Nabot xokinek kinemakiltis pampa iTlanauatil Jehová kijtouaya ika xueliskia nonemakas tlajli tlen kitemakayaj tajtin. ¿Tiknemilia ika Acab okitlakaitak Nabot ipampa tlen okichiuj? Ka. Acab xok okinek uajkisas kampa kochiya nion xok okinek tlakuas pampa melak okualan.

Isiuauj Acab, Jezabel, melak xkuajli katka. Okijli iueuentsin: “Tejua titekiuaj ipan Israel. Uelis tikpiyas tlen tiknekis. Nejua nikchiuas xpiya yejon tlajli”. Yejua okintlajkuilouili tlayekankej ipan ueyikalpan, makijtokan ika Nabot okiuijuikalti toTajtsin niman ika makitemojmotlakan hasta mamiki. Tlayekankej okichiujkej ken Jezabel okimijli, sakin okijli Acab: “Nabot yomik. luelis tikmotlatkitis itlal kampa kitokaya uvas”.

Jezabel xsan Nabot okimikti, noijki okinmikti miyekej akin okitlasojtlakej Jehová. Jezabel okinueyichiuj tajtsitsintin niman okichiuj okseki tlen melak xkuajli. Jehová okitak nochi yejuin. ¿Tlenon kichiuliskia?

Ijkuak Acab omik, ikoneuj Jehoram opeuj tekiuajti. Jehová okititlan se tlakatl itoka katka Jehú makitlajtlakolmakati Jezabel iuan ichanejkauan.

Jehú oyaj Jezreel ipan icarreta kampa chantiya Jezabel. Jehoram okinamikito Jehú niman okijli: “¿Onka yolseuilstli?”. Jehú okijto: “Xuelis onias yolseuilstli tla monan, Jezabel, kichiujtok tlen xkuajli”.



“Se herencia tlen
notlatkitia ika ueyi
ileuilstli itlamiyan xse
tlateochiualistli yes”
(Proverbios 20:21).



Jehoram okiyejyeko cholos ipan icarreta, san ika, Jehú okimotlak ika se flecha niman omik.

Kuakon Jehú oyaj kampa chantiya Jezabel. Ijkuak okitekakili ika Jehú yaya, Jezabel onotlapalyoti, okiyektlali itson niman okichiak tlakpak itech iventana. Ijkuak Jehú oajsik, Jezabel okiuijuikalti. Jehú okintsajtsili itlakeualuan Jezabel akin nemiyaj inakastlan: “Xkuajtlajkalikan”. Yejuamej okomapeujkej niman ouetstajsik ipan tlajli niman omik.

Sakin, Jehú okinmikti 70 ikoneuan Acab niman xok okitekauili manoueyichia Baal ipan itekiuajyo. ¿Ueli tikita? Jehová kimati nochi niman ijkuak noneki, kintlajtlakolmaka akin kichiuaj tlen xkuajli.

Tlajtoltilistin: ¿Tlenon okichiuj Jezabel niman ijkon okinotlatkiti itlal Nabot?
¿Tleka Jehová okitlajtlakolmakak Jezabel?

1 Reyes 21:1-29; 2 Reyes 9:1-10:30.

50 Jehová okimakixti Jehosafat

Jhosafat tekiuaj ipan Judá, okinxoxotoni miyek tlaixpan kampa kiueyichiuayaj Baal niman tajtsitsintin kampa tlanauatiaya. Jehosafat kinekiya ika tlaltikpakchanejkej makixmatikan itlanauatiluan Jehová. Ika yejon, okinnauati tlayekankej niman levitas matemachtikan itlanauatiluan Jehová ipan nochi Judá.

Kalpamej tlen nisiuj onkatkaj kimakasiyaj kixnamikiskej Judá pampa kimatstoyaj ika Jehová kinpaleuiyaya. Yejuamej hasta kitkiliayaj tetlayokoliltin tekiuaj Jehosafat. San ika, moabitas, ammonitas niman oksekimej akin ualeuayaj Seír okixnamikitoj Judá. Jehosafat kimatstoya ika nonekiskia makinpaleui Jehová. Okinsentlali nochimej tlakamej, siuamej niman kokonej ipan Jerusalén. Imixpan okichiuaj teoyotl niman okijto: “Jehová, tla xtouan tinemi xuelis titetlaniskej. Timitstlajtlaniliaj xtechijli tlenon tikchiuaskej”.

Jehová okikak iteoyouj niman okinankili: “Maka xmomojtikan. Nimechpaleuis. San xijkatokan, maka itlaj xchiuakan, niman xkitakan kenon nimechmakixtis”. ¿Kenon kinmakixtiskia Jehová?

Uajmostla, Jehosafat okintlapejpeni akin nokuikatiayaj niman okimijli mauiyán inyekapan akin tlaixnamikiskiaj. Yejuamej okiskej itech Jerusalén niman oyajkej kampa itoka katka Tecoa pampa tlaixnamikiskiaj.

Ijkuak Jehová tlaixnamiktoya ipampa ikalpan, akin kikuikatlaliliayaj chikauak kakistiya kenon ika pakilistli kiueyichiuajtoyaj. Yejua okichiuaj ika ammonitas niman moabitas manoixnamikikan, nion se xomakis. San ika, Jehová okimakixti ikalpan, akin tlaixnamikiyaj niman teopixkej. Nochimej kalpamej tlen nisiuj nokauayaj okimatkej itech tlen okichiuaj Jehová niman okitakej ika yejua kimakixtijtoya ikalpan. ¿Kenon Jehová kimakixtia ikalpan? Ika miyek tlemach. Yejua xnoneki makipaleuikan tlaltikpakchanejkej.

Tlajtoltilistin: ¿Tlenon okichiuaj tekiuaj Jehosafat?

¿Kenon Jehová okimakixti Judá?

2 Crónicas 17:1-19; 20:1-30.

**“Xnonekis nentlaixnamikiskej
ipan yejuin tlausokilistli.
Xijkatokan, maka itlaj
xchiuakan niman xkitakan
kenon mechmakixtis Jehová”
(2 Crónicas 20:17).**





9

Ipan yejuin sección tomachtiskej itech kokonej, teotlajtokej niman tekiuajkej akin melak otlaneltokakej itech Jehová. Ipan Siria, se ichpokatsin israelita okineltokak ika iteotlajtokauj Jehová ueliskia kipajtis Naamán. Teotlajtoketl Eliseo yemelak okineltokak ika Jehová kitlajpiyaskia itech soldados akin kitlauelitayaj. Maski ueliskia kimiktiskiaj, ueyi teopixketl Jehoiadá okimakixti Jehoás, ijkuak konetsintli katka, itech iabuela Atalía akin melak xkuajli katka. Tekiuaj Ezequías otlaneltokak ika Jehová kimakixtiskia Jerusalén niman xonotemakak itech asirios. Tekiuaj Josías xotekauili makinueyichiuakan tajtsitsintin kampa tlanauatiaya, okiyektlali teopan niman okipaleui kalpan oksejpa manokuepa itech Jehová.



TLAMACHTILTIN TLEN NONEKI XMATI

- Maka matikijtukan ika xuelis titlajtoskej itech Jehová pampa ok tikokonej.
- Ijkuak tikchiuaj tlen kuajli, Jehová techijlia ika touan nemis.
- Ijkon ken Jonás, matomachtikan tiklakamatiskej Jehová niman maka matikualanikan tla xnochiua ken tiknekij.

51 Se tlaixnamijketl niman se ichpokatsin

Ipan Siria nemiya se ichpokatsin israelita akin uejka nemiya itech ichan. Soldados sirios okixelojkej itech ichanejkauan niman aman yejua itlakeual katka isiuauj Naamán, akin kinyekanaya soldados sirios. Ichpokatsin kiueyichiuaya Jehová maski akin ompa chantiyaj xkichiuyaj.

Naamán kipiaya se xkuajli kokolistli ipan itlalnakayo tlen melak tekoko. Ichpokatsin kinekiya kipaleuis. Kuakon okijli isiuauj Naamán: “Nikixmati yakaj akin uelis kichiuas ika moueumentsin kuajli manomachili. Ipan Israel, nemi se iteotlajtokauj Jehová akin itoka Eliseo. Yejua uelis kipajtis moueumentsin”.

Isiuauj Naamán okijli iueumentsin tlen okijlika ichpokatsin. Naamán kichiuaskia maski san tlenon niman ijkon pajtis. Kuakon yejua oyaj Israel kampa chantiya Eliseo. Naamán kichiaya ika Eliseo makiseli ken se akin ueyixtok. San ika, yejua nion xokis, Eliseo okititlan itlakeual makiseli niman makijli Naamán yejuin tlajtoltin:




“Xmaltiti chikometipan ipan atentli Jordán. Kuakon tipajtis”.

Naamán xokuelkak yejon, okijto: “Oniknemili ika yejuin teotlajtoketl nechpajtiskia ijkuak kinotsaskia iTajtsin niman ika kichiuaskia tlen temojkatlachialti. Niman san tlen onechijli, ika maniuuya itech yejon atentli tlen onka Israel. Tikinpiyaj melak kualtsitsintin atentin ipan Siria. ¿Xuelis nias ipan yejon atentin?”. Naamán melak okualan niman okitlalkauijteuj ichan Eliseo.

Itlakeualuan Naamán okipaleuijkej kuajli matlanemili. Yejuamej okijlikej: “Tikchiuaskia maski san tlenon niman ijkon tipajtis, ¿xmelak? Tlen teotlajtoketl mitstlajtlanilia xouijtika. ¿Tleka xtikchiua?”. Naamán okinkak, kuakon oyaj ipan atentli Jordán niman chikometipan okalak ijtik atl. Ijkuak ika chikometipan okichiuuj yejon, ¡opopoliuj ikokolis! Yejua melak opak niman okitlasojkamachilito Eliseo. Naamán okijli: “Aman nikmatstika ika Jehová yejua toTajtsin akin melauak”. Ijkuak Naamán onokuap ichan xok kualouaya, ¿kenon tiknemilia onomachili ichpokatsin israelita ijkuak okitak?

Tlajtoltlistin: ¿Tiknemilia ika ouijtika okimachili ichpokatsin israelita tlajtos iuan isiuauj Naamán?
¿Tlenon tiknemilia okipaleui makipiya yolchikaualistli?

2 Reyes 5:1-19; Lucas 4:27.



“Otikchiu para on kokonej niman on tselikakokonej mamitskuikatlalikan ika on melajki yekteneualistli” (Mateo 21:16).



52 **Jehová kipiya caballos niman carros ika tlitl**

Tekiuaj ipan Siria, Ben-Hadad, ok kixnamiktoya Israel. San ika, teotlajtoketl Eliseo nochipa kijliaya tekiuaj ipan Israel ijkuak kixnamikiskiaj, ijkon yejua cholouaya. Kuakon Ben-Hadad okinemili kajsis Eliseo. Yejua okimat ika Eliseo nemiya ipan ueyikalpan Dotán niman okintitlan soldados sirios makajsitij.

Sirios oajsikej Dotán ika yeuajli. Uajmostla, itekipanojkauj Eliseo okis niman okitak ika miyekej soldados yokiyualojkaj ueyikalpan. Yejua melak onomojti niman otsajtsik: “Eliseo, ¿tlenon uelis tikchiuskej?”. Yejua okinankili: “Melak miyekej touan nemij xijkon ken imiuan yejuamej”. Nimantsin Jehová okichiuaj ika itekipanojkauj Eliseo makita ika tepemej tlen kiyualouayaj ueyikalpan, tentoyaj ika caballos niman carros tlen ika tlaixnamikij tlachijchiujtin ika tlitl.

Ijkuak soldados sirios okiyejyekojkej kajsiskej Eliseo, yejua okichiuaj teoyotl niman okijto: “Jehová nimitstlajtlanilia xchiua maka matlachiakan”. Soldados xok okimatkej kanon nemiya maski



“Tiktalialaj toyojlo itech Dios ika san tlinon tejuamej tiktajtlaniliskej ijkon ken yejua kineki, yejua techkakis” (1 Juan 5:14).

tlachiyaj. Kuakon Eliseo okimijli: “Xyejuin ueyikalpan tlen nenkitejtemouaj. Xuajlakan nouan, nimechuikas kampa nemi tlakatl akin nenkitejtemouaj”. Eliseo okinuikak hasta Samaria kampa chantiya tekiuaj ipan Israel.

Ijkuak sirios okimatkej kanon nemiyaj, xok itlaj ouel okichiujkej. Tekiuaj ipan Israel okitlajtolti Eliseo: “¿Manikinmikti?”. ¿Notlakuepiltiskia Eliseo ipampa tlen okiyejyekojkej kichiuiliskej? Ka. Eliseo okijli: “Maka xkinmikti. Xkintlakualti niman xkinkauili mauian”. Kuakon tekiuaj okiyektlali se ueyi tlakuajli niman okinkauili manokuepakam inchan.

Tlajtoltlistin: ¿Kenon Jehová okitlajpax Eliseo iuan itekipanojkauj?
¿Tiknemilia ika Jehová noijki mitstlajpiyas?

2 Reyes 6:8-24.



53 Iyolchikualis Jehoiadá

Jezabel okipix se ikoneuj siuatl itoka katka Atalía, akin noiiki xkuajli katka. Atalía ononamikti iuan tekiuaj ipan Judá. Ijkuak iueuentsin omik, ikoneuj opeuj tekiuajti. Niman, ijkuak ikoneuj omik, Atalía opeuj tekiuajti ipan Judá. Kuakon okiyejyeko kinmiktis ikoneuan tekiuaj akin ueliskiaj kitekipatlaskiaj niman noiiki oksekimej akin kikuiliskiaj itekiujyo. ¡Hasta ixuiuan okinmikti! Nochimej melak kimakasiyaj.

Ueyi teopixketl Jehoiadá niman isiuauj Jehoseba kimatstoyaj ika xkuajli tlen kichiujtoya Atalía. Maski ueliskiaj kinmiktiskiaj, okimakixtijkej konetsintli itoka katka Jehoás, ixuiuj Atalía. Yequamej okiskaltijkej ipan teopan.

Ijkuak Jehoás kipiaya chikome xiuitl, Jehoiadá okinsentlali nochimej tlayekankej iuan levitas niman okimijli: “Xtlajpiakan ipuertas teopan niman maka xkauilikan yakaj makalaki”. Kuakon, Jehoiadá okitlali Jehoás ken tekiuaj ipan Judá niman okitlalili se corona. Akin chantiyaj ipan Judá otsajtsikej: “¡Uejkaujtipan manemi totekiuaj!”.

Atalía okikak ika tlaltikpakchanejkej tsajtsitoyaj niman onotlalo kampa onka teopan. Ijkuak okitak yenkuik tekiuaj, otsajtsik:

“¡Ninechixnamiktokej!
¡Ninechixnamiktokej!”. Tlayekankej okajsikej yejon xkuajli siuatl, okikixtijkej niman okimiktijkej. San ika ¿tlenon panoskia iuan kalpan aman ika yejua xok kimijtlakoskia?

Jehoiadá okipaleui kalpan manotlajtolkaua iuan Jehová, yejuamej okijtokej ika san yejua kiueyichiuaskiaj. Jehoiadá okichiuaj ika makixoxotonikan iteopan Baal niman tajtsitsintin. Okintlali teopixkej niman levitas matekitikan ipan





“Maka xkinmakasikan akin kimiktiaj tlnakayotl, san ika, xuelij kimiktiaj nemilistli. Tlen kema, xmakasikan akin ueli kipopoloua nemilistli niman tlnakayotl ipan Gehena” (Mateo 10:28, TNM).

iteopan Jehová niman ijkon tlatikpakchanejkej ueliskiaj ompa kiueyichiuaskej. Noijki okintlali tlajpixkej akin kitaskiaj maka makalaki nion se akin xchipauak. Kuakon Jehoiadá niman tlayekankej okuikakej Jehoás kampa chantiskia niman okitlalijkej kampa tlanauatiskia. Akin chantiyaj Judá melak opajkej. Aman ueliskiaj kiueyichiuaskiaj Jehová pampa xok nemiya Atalía niman xok noueyichiuaya Baal. ¿Tiknemilia ika Jehoiadá yolchikauak katka? ¿Tikita kenon okinpaleui miyekej?

Tlajtoltlistin: ¿Kenon okiteititi Jehoiadá ika yolchikauak katka? ¿Tiknemilia ika Jehová mitspaleuis xpiya yolchikaualistli?

2 Reyes 11:1-12:12; 2 Crónicas 21:1-6; 22:10-12; 23:1-24:16.



54 Jehová okijyoui Jonás

Ipan Asiria onkatka se ueyikalpan itoka katka Nínive, akin ompa chantiyaj melak xkuakualtin katkaj. Jehová okijli iteotlajtोकौ Jonás mauia Nínive niman makimijliti ika nonekiya makipatlakan tlen kichiuayaj. San ika, Jonás oksekan ocholoj. Otlejkok ipan se barco tlen yaskia Tarsis.

Ijkuak barco onkatka ipan mar, opeuj chikauak ajakakiyau i niman marineros melak onomojtijkej. Okinchiuilijkej teoyotl intajtsitsinuan niman onotlajtoitijkej: “¿Tleka ijkon topan nochiujtok?”. Sakin, Jonás okimijli: “Yejuin nochiujtok nopampa. Nejua nicholojtika, xnikchiujtika tlen Jehová onechijli. Xnechonatlajkalkan niman ajakakiyaujtlí noteltis”. Marineros xkinekiyaj kontlajkaliskej Jonás ipan mar, san ika, yejua okimijli makichiuakan. Ijkuak okontlajkalkej, ajakakiyaujtlí onotelti.

Jonás okinemili ika mikiskia. Ijkuak polaktiaya ijtik mar, okichiuli teoyotl Jehová. Kuakon Jehová okichiu ika se ueyi michin makitolo, san ika, xokimikti. Ijkuak nemiya ijtik michin, Jonás okichiu teoyotl niman okijto: “Nimitsijlia ika nochipa nimitstlakamatis”. Jehová okitlajpix Jonás yeyi tonajli kech ouejkauj ijtik michin, sakín okichiu ika michin makisotla ipan uajki tlajli.

“ToTeko [...] techpialia ijyouilistli, pampa nion se tlakatl xkineki mapoliui, yej kineki para nochimej manoyolpatlakan” (2 Pedro 3:9).

Pampa Jehová okimakixti Jonás, ¿kijtosnekiya ika xok nonekiya mauiya Nínive? Ka. Jehová oksejpa okontitlan. Aman Jonás kema otetlakamat. Oyaj okimijlito tlaltikpakchanejkej xkuakualtin: “Ipan 40 tonajli, Nínive popoliuis”. Kuakon opanok itlaj tlen xnochiaya, ninivitas okikakej niman onoyolkuepkej. Tekiuaj ipan Nínive okijli ikalpan: “Xnotsakan toTajtsin niman xmoyolkuepakan. Kanaj ijkon xtechpopolos”. Ijkuak Jehová okitak ika yonoyolkuepkaj, xokipopolo Nínive.

Jonás okualan ijkuak okitak ika ueyikalpan xokipopolojkej. Xkonemili: Jehová okijyoui Jonás niman okikneli, san ika, Jonás xokimikneli ninivitas. Kuakon okis itech ueyikalpan, onotlali itsintlan se ayojkijli niman onotlauelkixti. San ika, xiujtli ouak niman Jonás melak okualan. Kuakon Jehová okijli: “Timotekipachoua ipampa yejuin ayojkijli, san ika, xtimotekipachoua ipampa ninivitas. Nejua onikimikneli niman yejuamej omakiskej”. ¿Tlenon kinekiya toTajtsin kimachtis? Ika ninivitas melak ueyi kijtosnekiyaj xijkon ken se xiujtli.

Tlajtoltilistin: ¿Tlenon Jehová okimachtli Jonás?
¿Tlenon tomachtiaj itech tlen ipan onochiuj Jonás?

Jonás 1:1-4:11.



55 Se iluikaktekitkauj Jehová okimakixti Ezequías

Tekiuajyotl asirio okinoyaxkatijka majtlaktli uejueyimej familias ipan Israel. Aman Senaquerib, tekiuaj ipan Asiria, noiiki kinekiya noyaxkatis ome uejueyimej familias ipan Judá. Opeuj noyaxkatia sesentetl iueyikalpanuan Judá. Niman Senaquerib melak kinekiya kinoyaxkatis Jerusalén. San ika, xkimatiya ika Jehová kitlajpiaya Jerusalén.

Ezequías, itekiuaj Judá, okimakak miyek tomin Senaquerib niman ijkon maka itlaj kichiuilis Jerusalén. Maski Senaquerib okiseli tomin, okintitlan akin tlaixnamikij makixnamikitij Jerusalén. Kalpan melak nomojtiaya pampa asirios nonisiuiayaj. Kuakon Ezequías okimijli: “Maka xmomojtikan. Asirios kojtikey, san ika, Jehová kichiuas matikpiyakan kojtilistli xijkon ken yejuamej”.

Senaquerib okititlan rabsaqué, akin tlajtoskia ipampa, niman kinpijpinaujtiskia chanejkej Jerusalén. Rabsaqué onokauj ikiyauak ueyikalpan niman otsajtsik: “Jehová xuelis mechpaleuis. Maka mamechkajkayaua Ezequías. Nion se tatajtsin xuelis mecmakixtis totech”.

Ezequías okitlajtolti Jehová tlenon nonekiya kichiuas. Jehová okinankili: “Maka mamitsmojti tlen kijtous rabsaqué. Senaquerib xnoyaxkatis Jerusalén”. Sakin, Ezequías okiseli amatlajkuiloltin itech Senaquerib. Amatlajkuiloltin kijtousayaj: “Xmotemakakan. Jehová xuelis mechpaleuis”. Ezequías okichiuaj teoyotl, okijto: “Jehová, timitstlajtlaniliaj, xtechmakixti intech, ijkon nochimej kimatiskej ika tejua titoTajtsin akin melauak”. Jehová okijli: “Tekiuaj ipan Asiria xkalakis Jerusalén. Nejua niktalajpiyas nokalpan”.

Senaquerib kinemiliaya nimantsin noyaxkatiskia Jerusalén. San ika, se yeuajli, Jehová okititlan iluikaktekitkauj kampa onokajkaltijkaj soldados



asirios akin nemiya
ikiyauak ueyikalpan.
¿lluikaktekitketl
okinmikti 185,000
soldados! Ijkuak
isoldados tekiuaj
Senaquerib akin melak
kojtikej katkaj omijkej, yejua
onokuiep ichan. Jehová
okitlajpix Ezequías niman
Jerusalén ijkon ken okijtoka
kichiuas. Tla tinemiskia
Jerusalén, ¿titlaneltokaskia
itech Jehová?

Tlajtoltlistin: ¿Kenon Jehová
okitlajpix Jerusalén? ¿Tiknemilia
ika Jehová mitstlajpiyas?

**2 Reyes 17:1-6; 18:13-37; 19:1-37;
2 Crónicas 32:1-23.**

**“Jehová iluikaktekitkauj
nemi inyeualiuuyan
akin kimojkaitaj,
niman kinmakixtia”
(Salmo 34:7).**





56 Josías okitlasojtlak iTlanauatil toTajtsin

Josías opeuj tekiuajti ijkuak kipiaya chikueyi xiuitl. Ipan yejon tonaltin, kalpan kichiuaya naualyotl niman kiueyichiuaya tajtsitsintin. Ijkuak kipiaya 16 xiuitl, Josías okiyejyeko kimatis kenon kiueyichiuas Jehová ken kinamiki. Ijkuak kipiaya 20 xiuitl, opeuj kinxoxotonia tajtsitsintin niman miyek tlaixpan ipan nochi ueyikalpan. Niman ijkuak kipiaya 26 xiuitl, okichiuj manoyektlali iteopan Jehová.

Ueyi teopixketl, Hilquías, okinexti ipan teopan se tlajkuilolamatl itech iTlanauatil Jehová. Kanaj yejuin tlakuilolamatl tlen Moisés okijkuilojka. Itlajkuilojkauj tekiuaj, Safán, okitkili tlajkuilolamatl Josías niman opeuj chikauak kipouilia. Josías okikak niman okasikamat ika kalpan ikuikaya miyek xiuitl ika xkitlakamatiya Jehová. Kuakon tekiuaj Josías okijli Hilquías: “Jehová melak kualantika touan. Iuan xtlajto, matechijli tlenon kineki matikchiuakan”. Jehová okijli yejuin tlajtojli se siuatl teotlajtaketl itoka Huldá: “Akin chantij Judá yonechkaujkej. Nikintlajtlakolmakas, san ika, xnikchiuas ipan itonaluan Josías pampa yejua yolyemanki”.

Ijkuak tekiuaj Josías okikak yejuin tlajtoltin, oyaj ipan teopan niman okisentlali kalpan Judá. Sakin, ika chikauak tlajtojli okipouili kalpan iTlanauatil Jehová. Josías niman kalpan okijtokej kitlakamatiskej Jehová ika nochi inyojlo.

**“Motlajtol se tlauijli ipan nokxi, niman se tlauijli ipan noojui”
(Salmo 119:105).**

Yopanoka miyek xiuittl ika kalpan Judá xkipanoltiayaj Pascua. San ika, ijkuak Josías okipouj ipan Tlanauatijli ika Pascua nonekiya nopanoltis nochi xiuittl, yejua okijli kalpan: “Tikiluichiuiliskej Jehová, tikpanoltiskej Pascua”. Kuakon Josías okichiuj manoyektlali miyek uentli niman manemikan sekimej akin nokuikatiaj ipan teopan. Kuakon okipanoltijkej Pascua. Sakin okipanolti lluitl itoka Tortas tlen Xkipiya Tlaxokolilistli, yejuin ouejkauj chikome tonajli. Youejkauj ika xkipanoltiayaj se Pascua ken yejuin hasta ijkuak nemiya Samuel. Josías melauak kitlasojtlaya iTlanauatil toTajtsin. Niman tejua, ¿tikuelita timomachtis itech Jehová?

Tlajtoltilistin: ¿Tlenon okichiuj tekiuj Josías ijkuak okikak iTlanauatil toTajtsin?
¿Tlenon kinemiliaya Jehová itech Josías?

2 Reyes 21:26; 22:1-23:30; 2 Crónicas 34:1-35:25.





10

Jehová yejua Tekiuaj itech nochi tlen onka. Yejua nochipa kuajli kiyekana niman nochipa ijkon kichiuas. Se neskayotl, okimakixti Jeremías ijkuak mikiskia ijtik se pozo. Okimakixti Sadrac, Mesac niman Abednego itech horno tlen tlikuitoya niman okimakixti Daniel itech leones ijkuak okichiuaj maka makikuakan. Jehová okitlajpax Ester niman ijkon makimakixti ikalpan. Yejua xkikauilis nochipa maonia tlen xkuajli. Teotlajtoltin itech se tlamachijchiuajli tlen nesi ken se ueyi tlakatl niman se ueyi kojtl, techmelajkaijliaj ika iTekiuajyo Jehová xuejkaujtipan kipopolos nochi tlen xkuajli niman tlanauatis ipan tlaltikpaktli.



TLAMACHTILTIN TLEN NONEKI XMATI

- I Tekiuajyo Jehová melak kojtik xijkon ken tekuijomej tlen onka ipan tlaltikpaktli.
- Ijkon ken okichijkej Ester niman Daniel, nochipa matikpaleuikan tlen kuajli, maski san kanon tinemiskej.
- Ijkuak tikixnamikiskej ajmantli, melak matitlaneltokakan itech Jehová ijkon ken okichijkej Jeremías niman Nehemías.

57 Jehová okititlan Jeremías matenojnotsati

Jehová okitlapejpeni Jeremías matekiti ken teotlajtoketl ipan Judá. Okijli makinnojnotsa akin ompa chantiyaj niman makimijli ika makikajkauakan ika kichiuaj tlen xkuajli. Jeremías okinankili Jehová: “Nejua san nitelpochtli, xnikmati kenon nitlajtos imixpan tlaltikpakchanejkej”. Jehová okijli: “Maka xmomojti. Nejua nimitsijlis tlenon tikijtos. Nejua nimitspaleuis”.

Jehová okijli Jeremías makinsentlali akin kiyekanaj kalpan, makitlapana se kontli tlachijchiujtli ika sokitl imixpan niman makimijli: “Jerusalén xaxamanis ijkon ken yejuin”. Ijkuak Jeremías ijkon okichiuaj, tlayekankej melak okualankej. Se teopixki itoka katka Pasjur okiuisk Jeremías niman ipan se kojtl tlen kojkyonki katka itoka cepo, okitlalili imauan niman ikxiuan. Jeremías xouel onouiyoni nochi yeuajli. Uajmostla Pasjur okimakauj. Kuakon Jeremías okijto: “Xok nikxikoua. Nikajkauas ika nitenojnotsa”. San ika ¿yemelak ijkon okichiuaj? Ka. Jeremías kuajli okinemili niman okijto: “ITlajtol Jehová kentla tlitl tlen noijtik onka. Xuelis nikajkauas ika nitenojnotsas”. Jeremías xokikajkauj ika tenojnotsa.

Opanok seki xiuitl niman se yenkuik tekiuaj opeuj tlanauatia Judá.

Teopixkej niman tlakajkayaujkej teotlajtokej kinkualaniaya tlen kijtouaya Jeremías. Ika yejon, okimijlikej akin ueyixtoyaj: “Yejuin tlakatl kinamiki mamiki”. Jeremías okijto: “Tla ninechmiktiaj, nenkimiktiskej se tlakatl akin kichiuaj tlen kuajli. Nikijtoua tlen Jehová yonechnauati, xsan tlen ninknemilia”. Ijkuak tlayekankej okikakej yejuin, okijtokej: “Yejuin tlakatl xkinamiki mamiki”.



“Nochi tlakatl mechtlauelitas san pampa nennechneltokaj. Pero yejuan melajkanemis ikan itlaneltok hasta ijkuak nochi tlamis, Dios yejua kimakixtis” (Mateo 10:22).

Jeremías xokikajkauj ika tenojnotsa, san ika, aman tlayekankej melak okualankej, ika yejon okijlikej tekiuaj makimikti. Tekiuaj okimijli makichiuilikan tlen kinekiskiaj. Kuakon okajsikej Jeremías niman okontlajkalkej ijtik se pozo uejkatlan tlen kipiaya miyek sokitl ijkon ompa mamiki. Jeremías ika yolik opeuj sokipolaki.

Se itlakeual tekiuaj akin ueyixtoya itoka katka Ébed-Mélec okijli tekiuaj: “¡Tlayekankej okontlajkalkej Jeremías ijtik se pozo! Tla ompa tijkauaj, mikis”. Tekiuaj okinauati Ébed-Mélec makinuika 30 tlakamej makikixtitij Jeremías. Jeremías xtlaj okitelti ika tenojnotsa, ¿xmelak ika tikuelitaskia tikchias ijkon ken yejua?

Tlajtoltlistin: ¿Tleka Jeremías okitlakamat Jehová maski ok telpochtli katka?
¿Akinon okiyejyeko kiteltis Jeremías makikajkaua ika matenojnotsa?

Jeremías 1:1-19; 19:1-11; 20:1-13; 25:8-11; 26:7-16; 38:1-13.



58 Okixoxotonijkej Jerusalén

Kalpan Judá miyekpa okikauj Jehová niman okinueyichiuaj tajtsitsintin. Pampa, Jehová kinekiya kinpaleuis okomintitlanili iteotlajtokauan, san ika, xokinkakisnejkej. Niman xsan yejon, noiiki okinpipinaujtijkej. ¿Kenon okitelti Jehová ika manoueyichiuakan tajtsitsintin?

Tekiuaj ipan Babilonia, Nabucodonosor, ika yolik okinotlatkitijtia kalpamej. Ijkuak kemach okinotlatkiti Jerusalén, okajsik tekiuaj Joaquín, akin ueyixtokej, tlaixnamijkej niman artesanos niman okinuikak Babilonia. Noiiki okuikak tlen melak tlasojtiya tlen onkatka ipan iteopan Jehová. Sakin, Nabucodonosor okitlali Sedequías ken tekiuaj ipan Judá.

Kachtopa, Sedequías kitlakamatiya Nabucodonosor. San ika, kalpamej tlen nisiuj nokauayaj niman teotlajtokej tlakajkayaujkej okijlikej tekiuaj Sedequías makixnamiki Babilonia. Jeremías okimelajkaijli: “Tla tikixnamiki onias mikilistli, apistli niman kokolistli ipan Judá”.

Ijkuak yopanoka chikueyi xiuitl, Sedequías okixnamik Babilonia niman okintlajtlanili tlaixnamijkej itech Egipto makipaleuikan. Kuakon, Nabucodonosor okintitlan babilonios makixnamikitij Jerusalén. Yejuamej okiyualojkej ueyikalpan. Jeremías okijli Sedequías: “Jehová kijtousa ika tla timotemaka itech Babilonia, tejua niman ueyikalpan nenmakisaskej. San ika, tla xtikchiua, babilonios kitlatiskej Jerusalén niman tejua mitsuikaskej”. Sedequías okijto: “Xninotemakas”.



“ToTeko Dios nochi ueli, ika tlen melauak yotitetlaxtlaulij niman otikchiu ken kitocaroua” (Apocalipsis 16:7).

Ijkuak opanok se xiuitl uan tlajko, babilonios okixoxotonijkej seki itech itepanuan Jerusalén niman okitlatijkej ueyikalpan. Noijki okitlatijkej teopan, miyekej okinmiktijkej niman oksekimej okinuikakej.

Sedequías ocholoy itech Jerusalén, san ika, babilonios okajsikej nisiuj Jericó niman okuikakej ixpan Nabucodonosor. Tekiuaj okichiuj ika Sedequías makita kenon kinmiktiajay ikoneuan. Kuakon okichiuj maka sa matlachia niman okitsauk. Ompa omik Sedequías. San ika, Jehová okijli kalpan Judá: “Ijkuak panos 70 xiuitl, oksejpa nimechuikas nemochan Jerusalén”.

¿Tlenon panoskia inuan telpokamej akin kinuikaskiaj Babilonia?
¿Ok yolmelaujkanemiskiaj itech Jehová?

Tlajtoltlistin: ¿Akinon katka Nabucodonosor?

¿Tlenon okichiuiili ueyikalpan Jerusalén? ¿Akinon katka Sedequías?

2 Reyes 24:1, 2, 8-20; 25:1-24; 2 Crónicas 36:6-21;

Jeremías 27:12-14; 29:10, 11; 38:14-23; 39:1-9; Ezequiel 21:27.



59 Nauimej telpokamej akin okitlakamatkej Jehová

Nabucodonosor okinuikak Babilonia ikoneuan akin ueyixtoyaj Judá, niman okitlali itlakeual itoka katka Aspenaz makintlajpiya. Nabucodonosor okijli Aspenaz makintlapejpeni akin chikaujkej niman tlamachilisejkej. Yejon telpokamej kiseliskiaj tlamachtijli yeyi xiuitl, niman ijkon uejueyixtoskiaj ipan Babilonia. Nonekiya nomachtiskej amapouaskej, tlajkuiloskej niman tlajtoskej tlajtojli acadio tlen nokuiya Babilonia. Noiiki nonekiya kikuaskej tlakuajli tlen tekiauaj kikuaya. Nauimej itech yejuin telpokamej katkaj Daniel, Hananías, Misael niman Azarías. Aspenaz okintokayoti ken babilonios: Beltsasar, Sadrac, Mesac niman Abednego. ¿Tiknemilia ika tlamachtijli tlen kiseliskiaj kichiuaskia makikauakan Jehová?

“Motech makitakan on yejuan tlaneltokaj kenijki titlajtlahtoua, kenijki timouika, kenijki titetlajsojtla, kenijki titlaneltoka, niman ika monemilis chipauak para ijkon xuelis yakaj mitspijpinauis pampa san titelpochtli” (1 Timoteo 4:12).

Yejuin nauimej telpokamej okijtokej ika nochipa kitlakamatiskiaj Jehová. Kimatstoyaj ika xkuajli yeskia tla kikuaskej tlen tekiuaj kikuaya pampa

ipan iTlanauatil Jehová xtekauiliaya manokua seki yolkamej. Kuakon okijlikej Aspenaz: “Timitstlajtlaniliaj maka xtexchiualti matijkuakan tlakuajli tlen tekiuaj kikua”. Aspenaz okimijli: “Tla nemejuamej xkuajli nentlakuaj niman tekiuaj kita ika xnenchikaujtokej, yejua nechmiktis”.

Daniel okinemili itlaj kichiuas. Okijli akin kintlajpiaya: “Timitstlajtlaniliaj ika san xtechmaka kijli niman atl ipan majtlaktli tonajli. Sakin, xtechixtlalo niman noijki oksekimej telpokamej akin kikuaj tlakuajli tlen kikua tekiuaj”. Akin kintlajpiaya ijkon okichiuaj.

Ijkuak yopanoka majtlaktli tonajli, Daniel niman akin inuan nouikaya nesiyaj melak chikaujkej xijkon ken oksekimej telpokamej. Jehová oyolpak pampa okitlakamatkej. Noijki okimakak tlamachilistli Daniel, ijkon okasikamat tlen kijtosnekij tlatlachalistin niman temiktli.

Ijkuak otlán ika okinmachtijkej, Aspenaz okinuikak telpokamej ixpan Nabucodonosor. Tekiuaj imiuan otlajto niman okitak ika Daniel, Hananías, Misael niman Azarías melak tlamachilisejkej katkaj xijkon ken oksekimej telpokamej. Kuakon okintlapejpeni matekitikan ipan itekiuajyo. Sakin, tekiuaj miyekpa kintlajtlaniliaya makitlajtolpaleuikan itech tlen melak nonekiya. Jehová okichiuaj makipiyakan tlamachilistli xijkon ken tlamachilisejkej akin tekitiyaj itech tekiuaj nion ken akin tenaualuiyaj.

Maski Daniel, Hananías, Misael niman Azarías xnemiyaj inchan, xkeman okilkaujkej ika teuan katkaj itech ikalpan Jehová. Niman tejua, ¿noijki nochipa tikilnamikis Jehová maski tla motajuan xnemij mouan?

Tlajtoltilistin: ¿Tleka Daniel niman akin inuan nouikaya okitlakamatkej Jehová?
¿Kenon okinpaleui Jehová?

Daniel 1:1-21.

60 Se Tekiuajyotl tlen xkeman popoliuis

Se yeuajli, tekiuaj Nabucodonosor okitemik tlen xkeman kitemikiya. Melak kajmanaya yejuin niman xok ueliya kochiya. Yejua okiminnots akin tenaualuiyaj niman okimijli: “Xnechtomilikan tlen oniktemik”. Yejuamej okinankilijkej: “Xtechijli tlenon otiktemik totekiuaj”. San ika, Nabucodonosor okimijli: “¡Ka! Nemejuamej xnechijlikan tlen oniktemik, tla xninechijliaj nimechmiktis”. Kuakon oksejpa okijlikej: “Xtechijli tlenon otiktemik, niman sakin timitstomiliskej”. Yejua okijto: “Nochimej nenkinekij ninechkajkayauaskej. ¡Xnechijlikan tlenon oniktemik!”. Yejuamej okijlikej: “Xnemi nion se tlakatl akin uelis kichiuas tlen tiktlajtlani. Xueli nochia”.

Nabucodonosor melak kualantoya, kuakon otlanauati makinmiktikan nochimej akin tlamachilisejkej itech yejon país. Noiiki kinmiktiskiaj Daniel, Sadrac, Mesac niman Abednego. Daniel okitlajtlani tekiuaj matlamachia. Daniel niman akin imiuan nouikaya okichiuilijkej teoyotl Jehová niman okitlajtlaniijkej makinpaleui. ¿Tlenon okichiuaj Jehová?

Jehová okititi Daniel ipan se tlatlachalistli tlen okitemik Nabucodonosor niman okijli tlen kijtosnekiya. Uajmostla, Daniel oyaj kampa itlakeual tekiuaj niman okijli: “Maka xkinmiktikan akin tlamachilisejkej. Nejua uelis niktomilis tekiuaj tlen okitemik”. Tlakeuajli okuikak Daniel kampa Nabucodonosor. Daniel okijli tekiuaj: “NoTajtsin yomitsititi tlenon panos tlayekapan. Yejuin tlen otiktemik: otikitak kentla se tlakatl uejkapan, itsontekon tlachichiujtli ika oro, iyelpan niman imauan ika plata, ijti niman imetspatlachuan ika cobre, imetskojyouan ika hierro niman ikxuan ika hierro iuan sokitl. Kuakon, se tetl tlen ualeuaya itech se tepetl okaxili ipan ikxuan. Kuakon nochi oxaxaman niman onochiuaj tlapoktli, niman ajakatl okuikak tlapoktli. Tetl onochiuaj se ueyi tepetl tlen okitemilti nochi tlatikpaktli”.




Kuakon Daniel okijli: “Yejuin tlen kijtosneki tlen otiktemik: motekiuajyo yejua yejon tsonetekomatl tlachijchiujtli ika oro. Tlen tlachijchiujtli ika plata, yes se tekiuajyotl tlen uajlas ika tlayekapan. Sakin tekiuajyotl tlen uajlas kojtik yes kentla cobre niman tlanauatis ipan nochi tlaltikpaktli. Tekiuajyotl tlen kitokas, kojtik yes ijkon ken hierro. Sa ika tlami, onias se tekiuajyotl tlen xeliujtos, seki tlen kipiayas kojtik yes ken hierro niman okseki yemanki yes ken sokitl. Yejon tetl tlen nochiua kentla se tepetl, iTekiuajyo toTajtsin tlen kinxoxotonis nochi tekiuajyomej niman xkeman tlamis”.

Nabucodonosor onotlakuankets niman onoixpilo ixpan Daniel niman okijli: “MoTajtsin omitsasikamachilti yejuin temiktli. Xnemi okse ken moTajtsin”. Nabucodonosor xokimikti Daniel, okichij ika makinyekana nochimej tlakamej tlamachilisekej niman okitlali ken akin tlanauatia ipan Babilonia. ¿Otikitak kenon Jehová okinankili iteoyouj Daniel?

Tlajtoltlistin: ¿Tleka Daniel ouel okitomili Nabucodonosor tlen okitemik? ¿Tlenon kijtosnekiya yejon temiktli?

Daniel 2:1-49.



“Okinsentlaliykej
[...] kampa ikan
tlajtojli hebreo
itoka Armagedón”
(Apocalipsis 16:16).



61 Yejuamej xonotlakuanketskej

Sakin ijkuak tekiauaj Nabucodonosor yokitemijka itech itlaj ken se tlakatl uejkapan, okichijchiuj se tlamachijchiuajli ika oro. Okitlali ipan talmantli itoka Dura niman nochimej okinsentlali akin ueyixtoyaj ipan itekiauajyo noijki Sadrac, Mesac niman Abednego oyajkej. Tekiauaj otlanauati: “Ijkuak nenkikakiskej ika kintsotsonaj trompetas, arpas niman gaitas, ;nimantsin xmotlakuanketsakan ixpan tlamachijchiuajli! Akin xkichiuas, kontlajkaliskej ijtik horno tlen tlikuitika”. ¿Notlakuanketsaskiaj hebreos ixpan yejon tlamachijchiuajli, noso san Jehová kiueyichiuaskiaj?

Kuakon tekiauaj otlanauati makitsotsonakan tlakuikajli. Nochimej onotlakuanketskej niman okiueyichiuajkej tlamachijchiuajli, san ika, Sadrac, Mesac niman Abednego, xokichiuajkej. Sekimej tlakamej okimitakej niman okijlikej tekiauaj: “Yejon yeyimej hebreos xkinekij kiueyichiuaskej tlamachijchiuajli tlen otikchijchiuj”. Nabucodonosor otlanauati makinuikilikan niman okimijli: “Oksejpa nimechkauilis xyejyekokan xueyichiuakan tlamachijchiuajli. Tla xnenkichiuaj nimechontlajkalis ijtik horno. Xnemi nion se tatajtsin akin uelis mechmakixtis notechkopa”. Yejuamej okinankilijkej: “Xnonekis tikyejyekoskej. ToTajtsin uelis techmakixtis. Niman maski tla xtechmakixtia, kuajli xmatsto tekiauaj, ika xtikueyichiuaskej tlamachijchiuajli”.

“Xmauistili [Jehová] moTeko Dios, niman san yejua xtekipano” (Mateo 4:10).

Nabucodonosor melak okualan. Okinnauati itlakeualuan: “;Xxotlaltikan horno chikometipan

xijkon ken kachtopa!”. Kuakon okinnauati isoldados: “Xkinsalokan yejuin tlakamej niman xkomintlajkalikan ijtik”. Horno melak totonki katka, ika yejon ijkuak soldados okinisiuijkej horno nimantsin omijkej. Yejon yeyimej hebreos ouetsitoj ijtik tlitl. Sakin, Nabucodonosor oontlachix ijtik horno, niman okitak nauimej tlakamej ompa nejnentinemiyaj, xsan yeyimej katkaj. Yejua melak onomojti niman okintlajtolti itlakeualuan: “¿Xotikomintlajkalkej yeyimej tlakamej ijtik tlitl? Nikimita nauimej, ¿niman se tlachia kentla iluikaktekitketl!”.

Nabucodonosor ononisiui itech horno niman otsajtsik: “¿Xuajkiskan, itekipanojkauan toTajtsin Akin ueyixtika!”. Nochimej otlamojkaitakej ijkuak okitakej ika Sadrac, Mesac niman Abednego ouajkiskej ijtik tlitl. Intlalnakayo, intson, intlaken xotlatlak niman yejuamej nion xpokijnekuistiyaj.

Nabucodonosor okijto: “InTajtsin Sadrac, Mesac niman Abednego melak ueyixtika. Okuajtitan iiluikaktekitkauj makinmakixtiki. Xnemi okse ken inTajtsin”.

Ijkon ken yeyimej hebreos, ¿tikneki tiyolmelaujkanemis itech Jehová maski san tlenon mapano?

Tlajtoltlistin: ¿Tlenon xokichiujkej Sadrac, Mesac niman Abednego?
¿Kenon okinmakixti Jehová?

Daniel 3:1-30.



62 Se tekiuajyotl kentla se ueyi kojtl


Se yeuajli, Nabucodonosor okipix se temiktli tlen melak temojti. Okiminnots tlakamej akin tlamachilisejkej makitomilikan tlen okitemik. San ika, nion se xouel okitomili. Sakin, tekiuaj otlajto iuan Daniel.

Nabucodonosor okijli Daniel: “Ipan tlen oniktemik, onikitak ika se kojtl melak ouejkapantiak hasta oajsik iluikak. Nochiuiyan ueliyaj kitayaj. Ixiujyo melak kualtsin katka niman miyek itlakilyo kipiaya. Yolkamej noseuiayaj kampa itlaseuil niman totomej kichijchiuayaj intepasol ipan imauan. Sakin, se iluikaktekitketl ouajtemok itech iluikak niman otsajtsik: ‘Xtsontekikan yejon kojtl, niman xmitsotsontekikan. San ika, xkauakan ikojyo iuan ineluayouan. Xsalokan iyeualiyán ika hierro niman cobre. Iyojlo kojtl nopatlas. Xok kipiyan iyojlo se tlakatl, kipiyan iyojlo se yolki niman ijkon nokauas chikome xiuitl. Nochimej kimatiskej ika toTajtsin yejua Tekiuaj niman yejua ueli kimaka tekiuajyotl akin yejua kinekis’ ”.

Jehová okijli Daniel tlenon kijtosnekiya temiktli. Ijkuak Daniel okasikamat tlenon kijtosnekiya, melak onomojti. Yejua okijto: “Tekiuaj, niknekiskia ika tlen otiktemik inpan manochiua motlauelikniuan, san ika, tejua mopán nochiuas. Tejua yejon ueyi kojtl tlen okitsontejkej. Tikpolos motekiujyo niman tijkuas xiujtli ijkon ken se yolki. San ika, iluikaktekitketl okijto ika makikauakan ikojyo iuan ineluayo. Yejon kijtosneki ika oksejpa titekiujtis”.

Ijkuak opanok se xiuitl, Nabucodonosor nejnentinemiya ikuatipan ikal niman opeuj kita Babilonia. Yejua okijto: “Melak kualtsin ueyikalpan tlen yonikchijchiuj. ¡Xkita kenon melak niueyixtika!”. Ijkuak yejua tlajtotoya, se tlajtojli tlen ualeuaya iluikak okijli: “¡Nabucodonosor! Aman tikpoloua motekiujyo”.

Ijkuakon, Nabucodonosor okipolo itlamachilis niman opeuj kichiua kentla se yolki. Okixitijkej kampa chantiya niman ochantito imiuan yolkamej ipan tepetl. Itson melak oueueyakiyak ijkon ken ijuiyouan águila niman istiuán oueueyakiyakej ijkon ken istiuán tototl.



Ijkuak yopanoka
chikome xiuitl,
Nabucodonosor oksejpa
okajsik itlamachilis niman
Jehová oksejpa okichiuaj tekiuaj
ipan Babilonia. Kuakon
Nabucodonosor okijto: “Nikueyichiuá
Jehová, akin Tekiuaj ipan iluikak. Aman
nikmati ika Jehová yejua akin Tekiuaj. Yejua
kinpinaujtia akin noueyimatij, niman yejua
ueli kimaka tekiuajyotl akin yejua kinekis”.

Tlajtoltlistin: ¿Tlenon okijtosnek tlen okitemik
Nabucodonosor? ¿Tlenon okasikamat Nabucodonosor?
Daniel 4:1-37.

“Pampa on yejuan
noueyilia,
kiknotlaliskej”
(Lucas 14:11).

63 Tlen ijkuijujtika ipan tepantli

Sakin, Belsasar onochiuj tekiuaj ipan Babilonia. Se yeuajli, okichiuaj se iluitl niman okiminnots akin ueyixtoyaj ipan itekiuajyo.

Okinnauati itlakeualuan ika makuajkuikan vasos tlachijchiujtin ika oro tlen Nabucodonosor okikixti itech iteopan Jehová. Belsasar niman itenotskauan ipan otlaonikej vasos niman opeuj kiueyichiuaj intajtsitsinuan. Kuakon ouajnonexti ima se tlakatl niman opeuj kijkuiloua seki tlajtoltin tlen xnasikamatiya ipan tepantli kampa iluichiujttoyaj.

Belsasar melak onomojti. Okiminnots akin tenaualuiyaj niman okimijli: “Tla yakaj ueli nechtomilia yejuin tlajtoltin, nikchiuas ika yeyi maueyixto ipan Babilonia”. Kuakon okiyejyekojkej, san ika nion se xouel okijli. Kuakon ouajla isiuauj tekiuaj niman okijli: “Nemi se tlakatl itoka Daniel, yejua kitomiliaya tlen kitemikiya Nabucodonosor. Yejua uelis mitstomilis yejuin tlajtoltin”.

Daniel okitato tekiuaj. Belsasar okijli: “Tla tikpoua niman tinechtomilia yejuin tlajtoltin, nejua nimitsmakas se koskatl tlachijchiujtli ika oro niman nikchiuas ika tejua ika yeyi xueyixto ipan Babilonia”. Daniel okinankili: “Xnikneki motetlayokoliluan,

san ika, kema nimitsijlis tlenon kijtosnekij yejuin tlajtoltin. Motaj, Nabucodonosor, noueyimatiya niman Jehová okipinaujti. Tikmatstoya tlen ipan onochiuj, maski ijkon, xotiktlakaitak Jehová. Otikinkuik vasos tlachijchiujtin ika oro tlen onkatkaj ipan iteopan niman ipan otikonik vino. Kuakon toTajtsin okijkuilo yejuin tlajtoltin: *MENÉ, MENÉ, TEQUEL* niman *PARSÍN*. Yejuin tlajtoltin kijtosnekij ika medos niman persas notlatkitiskej Babilonia niman tejua xok titekiuaj yes”.

“Aman kemaj,
youets on
ueyixtikaj ciudad
itoka Babilonia.
Yejua yonochiu
chanyotl para
on xkuajkualtin
espíritus”
(Apocalipsis 18:2).

Nesiya ika xakaj ueliskia kinotlatkitis Babilonia. Yejuin ueyikalpan kinpiaya tepantin uejkapamej niman se uejkatlan atentli. San ika, ipan yejon yeuajli, medos niman persas okixnamijkej. Tekiuaj persa Ciro oksekan okiojuitlali atentli niman ijkon isoldados ueliskiaj ajsiskej hasta ipuertas ueyikalpan. Ijkuak ompa oajsikej, ijpuertas ueyikalpan tlapojtoyaj! Soldados nimantsin otlaixnamijkej, onotlatkitijkej ueyikalpan niman okimiktijkej tekiuaj. Kuakon Ciro onochiuj tekiuaj ipan Babilonia.

Ipan kachtopa xiuitl, Ciro okijto: “Jehová yonechijli manikyektlali iteopan ipan Jerusalén. Judíos akin kinekiskej ontlapaleuskej uelis yaskej”. Ijkon ken Jehová okijtoka, miyekej judíos onokuepkej inchan ijkuak yopanoka 70 xiuitl ika yokixoxotonijkaj Jerusalén. Ciro okinkuepili judíos vasos tlachijchiujtin ika oro niman plata tlen Nabucodonosor okikixti itech teopan. ¿Ueli tikita kenon Jehová okikuik Ciro ijkon uelis ika kipaleuis ikalpan?

Tlajtohtilistin: ¿Tlenon okijtosnek tlen onoiykuilo ipan tepantli? ¿Tlenon okijli Jehová makichiua Ciro?

Esdras 1:1-11; Daniel 5:1-30; Isaías 44:27-45:2; Jeremías 25:11, 12.



64 Daniel okontlajkalkej kampa leones

Okse akin otekiuajtik ipan Babilonia, katka Darío akin medo. Okitak ika Daniel xkatka ken oksekimej. Kuakon, okichuij ika Daniel makinyekana akin ueyixtoyaj ipan itekiuajyo. Yejuin tlakamej kinexikolitayaj Daniel niman kinekiyaj kimiktiskej. Kimatstoyaj ika ipan se tonajli yexpa kichiuliaya teoyotl Jehová, kuakon okijlikej Darío: “Totekiuaj, kimelaua maonia se tlanauatijli tlen makijto ika nochimej san tejua mamitschiuilikan teoyotl. Tla yakaj xkitlakamati tlanauatijli makontlajkalikan kampa tlakoyonkan kampa kinpiyaj miyekej leones”. Darío okuelkak yejon tlajtolin niman okitlali yejon tlanauatijli.

Ijkuak Daniel okikak yejon yenkuik tlanauatijli, oyaj ichan. Ixpan se ventana tlen tlapoujtoya, onotlakuankets niman okichiuli teoyotl Jehová. Tlakamej akin kinexikolitayaj okalajkej ichan niman okinextitasikej kichiujtok teoyotl. Kuakon onotlalojkej okijlitoj Darío:

“Daniel xmitstlakamatstika. Mojmmostla yexpa kichiuilia teoyotl iTajtsin”. Darío kuajli iuan nouikaya Daniel niman xkinekiya makimiktikan. Nochi tonajli kinemilijtoya kenon kimaxixtis, san ika, nion yejua xueliskia kipatlaskia tlanauatijli tlen yokitlalijka. Kuakon otlanauati



makontlajkalikan Daniel kampa tlakoyonkan kampa nemij leones tlen melak temomojtikej.

Ipan yejon yeuajli, Darío melak najmantoya ipampa Daniel niman xueliya kochiya. Uajmostla ika kualkan onotlalo kampa okontlajkalkej niman okontsajtsili: “Daniel, ¿omitsmakixti moTajtsin?”.

Darío okikak se tlajtojli. ¡Katka Daniel! Yejua okinankili: “liluikaktekitkauj noTajtsin okinkamatsauk leones, ijkon xtlaj onexchiuilijkej”. ¡Darío melak opak! Otlanauati makikixtikan kampa nemiya. Daniel xtlaj ipan onochiuj. Kuakon, tekiuaj otlanauati: “Xkomintlajkalikan kampa tlakoyonkan tlakamej akin okiteixpantijkej Daniel”. Ijkuak okomintlajkalkej, leones nimantsin okinkuajkej.


Darío okimakak ikalpan yejuin tlanauatijli: “Nemochimej kipiya ika nenkitlakaitaskej iTajtsin Daniel. Yejua okimakixti itech leones”.

¿Tikchiuilia teoyotl Jehová mojmmostla ijkon ken Daniel?

Tlajtoltlistin: ¿Tlenon yexpa kichiuaya Daniel ipan se tonajli? ¿Kenon Jehová okimakixti Daniel?

Daniel 6:1-28.

“Dios ueli kinmanauiya on yolmelajkej tlakamej itech on tetlatlatalistli” (2 Pedro 2:9).



65 Ester okimakixti ikalpan

Ester katka se ichpochtli judía akin chantiya Persia ipan se ueyikalpan tlen itoka katka Susa. Yeuejkauí Nabucodonosor okinkixti iuejkachanejkauan itech Jerusalén. Mardoqueo, akin iprimo katka, okiskalti. Yejua tlakeuajli katka itech Asuero, itekiuaj Persia.

Tekiuaj Asuero okinek se yenkuik isiuauj. Itekipanojkauan okiukilijkej siamej melak kualtsitsintin itech itekiuajyo, Ester teuan katka. Itech nochimej siamej, tekiuaj okitlapejpeni Ester manochiua isiuauj. Mardoqueo okijli maka yakaj makijli ika judía katka.

Se tlakatl akin melak noueyimatiya, itoka katka Hamán, kinyekanaya nochimej akin ueyixtoyaj. Yejua kinekiya ika nochimej ixpan manotlakuanketsakan. Mardoqueo xokinek kichiuas, kuakon Hamán melak okualan hasta okinek kimiktis. Ijkuak okimat ika Mardoqueo judío katka, okinemili kenon kichiuas niman ijkon kinmiktis judíos itech ueyikalpan. Yejua okijli tekiuaj: “Judíos xkuajli tlen kichiuaj, kipiya ika tikinmiktis”. Asuero okinankili: “Xchiua nochi tlen nonekis”. Niman okikauili makitlali se tlanauatijli. Hamán otlanauati makinmiktikan nochimej judíos ipan tonajli 13 metstli adar. Jehová nochi kitstoya.

Ester xkimatiya itech tlanauatijli. Kuakon Mardoqueo okititlanili

ipán se amatl niman okijli: “Xuiya, xtlajto iuan tekiuaj”. Ester okijto: “Tla yakaj yauj kampa tekiuaj ijkuak xkinotsa, kimiktiaj. Niman jiki piya 30 tonajli ika tekiuaj xnechnotsa! San ika, kema nias. Tla tekiuaj nechujtekechilia itlakouj ninemis. Tla xkichiua nimikis”.

Ester oyaj ikiyauak tekiuaj. Ijkuak tekiuaj okitak, okitekechilia itlakouj. Ester okinisiui niman tekiuaj okitlajtolti: “¿Tlenon uelis ika nimitspaleuis Ester?”. Yejua okijli: “Nikneki xuajla iuan Hamán kampa nikchijchiuas ueyi tlakuajli”.





“Mehuikaskej imixpan on gobernadores niman reyes san pampa nennechneltokaj. Ijkuak ijkon nemopan nochluas, noka xtlajtukan imixpan niman imixpan on yejuan xhebreos” (Mateo 10:18).

Ijkuak ompa nemiyaj, Ester oksejpa okimijli matlakuatij. Ijkuak ika okpa otlakuatoj, tekiuaj oksejpa okitlajtolti: “¿Tlenon uelis ika nimitspaleuis?”. Yejua okijli: “Yakaj kineki techmiktis, nejua iuan nokalpan. Nimitstlajtlanilia xtechmakixti”. Tekiuaj okitlajtolti: “¿Akinon kineki mitsmiktis?”. Yejua okijto: “Yejuin xkuajli tlakatl Hamán”. Asuero melak okualan niman otlauati makimiktikan Hamán.

San ika, nion tekiuaj xueliskia kipopolos tlen Hamán yotlanauatijka. Kuakon tekiuaj okitlali Mardoqueo makinyekana akin ueyixtoyaj niman okikauili makichijchia se yenkuik tlanauatijli. Yejuin tlanauatijli kijtouaya ika judíos ueliskiaj kimixnamikiskiaj intlaueliknivan. Ipan tonajli 13 metstli adar, judíos otetlankej. Itech yejon tonajli ika tlayekapan nochi xiujtin iluichiuaj ika otetlankej.

Tlajtoltlistin: ¿Tlenon kinekiyaj kinchiuiliskej judíos?
¿Kenon okiteititi Ester ika tlaneltokaya itech Jehová?

Ester 2:5-20; 3:1-5:8; 7:1-8:14; 9:1-28.

66 Esdras otemachti iTlanauatil toTajtsin

Ikipiya kanaj 70 xiuitl ika miyekej israelitas yonokuepkaj Jerusalén, san ika, sekimej ok chantiyaj miyekan ipan Persia. Semej itech yejuamej katka se teopixki itoka katka Esdras, akin otemachti iTlanauatil Jehová. Yejua okimat ika akin nemiyaj Jerusalén xkitlakamatstoyaj Tlanauatijli niman okinek kinpaleuis. Tekiuaj persa Artajerjes okijli: “MoTajtsin okichiuaj xpiya tlamachilistli niman ijkon xtemachti iTlanauatil. Xkuika akin kinekis mouan yas”. Esdras okinsentlali nochimej akin kinekiyaj nokuepaskej Jerusalén. Okitlajtlanilijkej Jehová makintlajpiya ipan ojtli niman oyajkej.

Naui metstli sakín, oajsikej Jerusalén. Akin ueyixtoyaj itech ueyikalpan okijlikej Esdras: “Israelitas xokitlakamatkej Jehová niman yononamiktijkej imiuan siuamej akin kiueyichiuaj tajtsitsintin”. ¿Tlenon okichiuaj Esdras? Imixpan nochimej, onotlakuankets niman okichiuaj teoyotl, okijto: “Jehová, tejuua yotikchiuj miyek topampa. San ika, tejuamej yotitlajtlakojkej motechkopa”. Kalpan onoyolkuep, san ika, ok kichiuajtoyaj tlen xkuajli. Esdras okintlapejpeni tlayekankej niman jueces makitakan tlenon panouaya. Ipan yeyi metstli, akin xkinekiyaj kiueyichiuaskej Jehová, okinkixtijkej.

Opanokej 12 xiuitl. Itepanuan Jerusalén okinyektlalijkej. Kuakon Esdras okisentlali kalpan niman okinpouili iTlanauatil toTajtsin. Ijkuak Esdras okitlapo amoxtlí, kalpan onotelkets. Yejua okiueyichiuaj Jehová niman yejuamej okajkokej imauan ijkon okiteititijkej ika kiseliyaj tlen onoiyto. Sakín, Esdras okipouj niman otetomili Tlanauatijli. Kalpan kuajli okikak niman okasikamat ika oksejpa yokitlalkauijka Jehová niman ochokak. Uajmostla, Esdras ok okinpouili Tlanauatijli. Yejuamej okasikamatkej ika nonekiya kipanoltiskej Iluitl itoka Cabañas. Nimantsin opeuj noyektlaliaj ika kipanoltiskej iluitl.



Iluitl ouejkauj chikome tonajli, kalpan melak opak niman okitlasojkamachili Jehová pampa miyek tlen okipixkak. Xok ijki kuajchiujtiayaj Iluitl itoka Cabañas, ken ipan itonaluan Josué. Ijkuak otlán iluitl, kalpan onosentlali niman okijto ipan teoyotl: “Jehová, tejuá otitechmakixti kampa titlakeualtin katkaj, otitechtlakualti ipan tlaluaktli niman otitechmakak yejuin kualtsin tlajli. San ika, miyekpa xotimitstlakamatkej. Maski otikintitlan moteotlajtókauan matexchikajkanotsakan, xotikinkakisnejkej. Maski ijkon, otitechijyoui. Xotikilkauj tlen otikijli Abrahán tikchiuas. Aman timitsijliaj ika timitstlakamatiskej”. Kalpan okijkuilo tlen okijto niman akin ueyixtoyaj, levitas niman teopixkej okitlalilijkej insello.

Tlajtoltlistin: ¿Tlenon Esdras okinmachi israelitas akin onosentlalijkej Jerusalén? ¿Tlenon okijto kalpan ika kichiuaskia?

Esdras 7:1-28; 8:21-23, 31, 32; 9:1-10:19;
Nehemias 8:1-18; 9:1-38.

“¡Dios más kintiochiua on yejuan kakij itlajtol niman kitlakamatij!”
(Lucas 11:28).



67 Itepanuan Jerusalén

Ipan itonaluan Esdras, nemiya se israelita itoka katka Nehemías. Akin tlakeuajli katka itech tekiuaj Artajerjes. Yejua chantiya Persia ipan ueyikalpan Susa. Ikniuj Nehemías oualeuj Judá okijliko tlen xkuajli panotoya: “Israelitas akin onokuepkej Jerusalén xkipiyaj tlen makinpaleui. Itepanuan niman ipuertas ueyikalpan tlen babilonios okixoxotonijkej ok xkinyektlaliaj”. Nehemías melak onoyolkoko, pampa kinekiya ontlapaleuis, okichiuii teoyotl toTajtsin ijkon makikauili tekiuaj mauiya Jerusalén.

Sakin, tekiuaj okitak ika Nehemías noyolkokouaya. Yejua okijli: “Xkeman ijkin nimitsitaya. ¿Tlenon panoua?”. Nehemías okijli: “Nokalpan Jerusalén yokixoxotonijkej, ¿kenon xninajmanas?”. Tekiuaj okitlajtolti: “¿Tlenon uelis nikchiuas mopampa?”. Nimantsin Nehemías okichiuuj teoyotl ipan iyojlo. Kuakon okijto: “Nimitstlajtlanilia xnechkauili maniuuya Jerusalén manikinyektlaliti itepanuan”. Tekiuaj Artajerjes okikauili mauiya niman okimakak nochi tlen kitekitiltiskia ipan ojtli. Noijki okitlali ken tlanauatijketl ipan Judá niman okimakak madera tlen ika kiyektlaliskia ipuertas ueyikalpan.

Ijkuak Nehemías oajsik Jerusalén, okitato itepanuan ueyikalpan. Kuakon, okinsentlali teopixkej niman tlanauatijkej niman okimijli: “Yejuin melak xkuajli, noneki nimantsin matitekitakan”. Kalpan okiseli tlen okijto niman opeuj kinyektlalia tepantin.

San ika, sekimej intlaueliknivan israelitas opeuj kinpipinaujtiaj niman okimijlikej: “Se ostotsin ueliskia kitlajkalis tepantli tlen nenkichijchiujtokej”. Akin tekityaj xokinkakej nion xokikajkaujkej ika tekij. Okinchijchiujkej tepantin uejkapamej niman chikaujkej.

Intlaueliknivan, okinemilijkej miyekan kixnamikiskej Jerusalén san se ueyi niman kichiuaskiaj ijkuak nion xnonemiliaya. Ijkuak judíos okimatkej yejuin, melak onomojtijkej. San ika, Nehemías okimijli: “Maka xmomojtikan. Jehová touan nemi”. Yejua okintlali akin



**“Nochi tlen
yokichijchiujkej tlen ika
mitsixnamikiskej xkuajli
onkisas” (Isaías 54:17).**

kintlajpiyaskiaj tekitkej. Ijkon intlaueeliknuiuan xueliskiaj kimixnamikiskej.

Te pantin niman puertas otlán kinyektlaliaj ipan 52 tonajli. Nehemías okinuikak Jerusalén nochimej levitas, ijkon iluichiuaskej. Ojkan okinxelo akin nokuikatiskiaj. Yejuamej otlejkokej ipan itepan Jerusalén, onoxelojkej niman okiyualojkej ueyikalpan. Okintsotsonkej trompetas, címbalos iuan arpas niman okikuikatlalilijkej Jehová. Esdras oyaj imiuan sekimej niman Nehemías inuan oksekimej hasta ijkuak ononamijkej ipan teopan. Nochimej tlakamej, siuamej niman kokonej okitemakakej uentli niman oiluichiuujkej. Uejka kakistiya ika melak pakiyaj.

Tlajtoltlistin: ¿Tleka Nehemías oyaj Jerusalén?
¿Kech ouejkaujkej ika okiyektlalijkej itepanuan Jerusalén?

Nehemías 1:1-11; 2:1-20; 4:1-23; 5:14; 6:1-19; 12:27-43.





11

Ipan yejuin sección tlajtoua itech Tlajkuiloltin ika griego. Jesús onemiko ipan se familia kampa xmiyek kipiayaj tomin niman chantiya ipan se pitentsin kalpan. Yejua otekit iuan itaj akin katka kojxinketl. Jesús yeskia akin kinmakixtiskia tlaltikpakchanejkej. Jehová okitlapejpeni ken Tekiuaj itech iTekiuajyo tlen onka ipan iluikak. Tla tikipiya mokoneuan, xkinpaleui makasikamatikan ika Jehová kuajli okitlapejpeni familia kampa Jesús noskaltiskia ika iyojlo niman kampa inuan nemiskia akin kitlasojtlaj toTajtsin. Xkintomili kenon Jehová okimakixti Jesús ijkuak Herodes kinekiya kimiktis. Noijki ika xtlaj uelis kiteltis tlen Jehová kineki manochiua. Xkinmacht kenon Jehová okitlapejpeni Juan matenojnotsa itech Jesús. Kuajli xkimititi kenon Jesús maski san konetl katka kitlasojtlaya itlayekanalis Jehová.



TLAMACHTILTIN TLEN NONEKI XMATI

- Nochipa matitlakamatikan itlayekanalís Jehová.
- Maski Jesús, ikoneuj toTajtsin, melak kojtik katka, yejua okinek uajnemis ipan tlaltikpaktli ken se konetsintli.
- Juan Teapolaktijketl ika yolyemanílistli okinpaleui tlaltikpakchanejkej makimatikan ijkuak yejkoskia Mesías.

68 Elisabet okipix se ikoneuj

Opanok 400 xiuitl ika okiyektlalijkej itepanuan Jerusalén. Se teopixki itoka katka Zacarías niman isiuauj Elisabet, chantiyaj inisiuj ueyikalpan. Yejuamej ikipiyaj miyek xiuitl ika yononamiktijkaj, san ika, xkipiyaj inkoneuan. Se tonajli, ijkuak Zacarías kipojkixtiaya tlen ajuiyak ijtik Santo tlen onkatka ipan teopan, iluikaktekitketl Gabriel okinojtiti. Zacarías melak onomojtí, san ika, Gabriel okijli: “Maka xmomojtí. Nimitsuajkuilia kuajli tlajtoltn tlen ualeua itech Jehová. Mosiuauj, Elisabet, kipiayas se ikonetsin niman itoka yes Juan. Jehová yokitlapejpeni makichiua se tekítl tlen melak ueyi kijosneki”. Zacarías okitlajtoltn: “¿Kenon uelis nikneltokas? Nejua niman nosiuauj yotieueentsintiakej, xok uelis tikpiyaskej se tokoneuj”. Gabriel okijli: “ToTajtsin onechajtitlan manimitsijliki yejuin kuajli tlajtoltn. San ika, pampa xotinechneltokak, xuelis titlajtos hasta ijkuak uajnemis konetsintli”.

Zacarías ouejkauj ijtik santuario xijkon ken okseki tonajli. Ijkuak ouajkis, tlaltikpakchanejkej akin kichiatoyaj kinekiyaj kimatiskej tlenon opanok. Zacarías xueliya tlajtouaya. San kiteijliaya ika señas tlen kinekiya kijos. Kuakon tlaltikpakchanejkej okimatkej ika okiseli tlajtojli tlen ualeuaya itech toTajtsin.

Sakin, Elisabet okoneuajtiak niman okipix se konetsintli, ijkon ken iluikaktekitketl okijtoka. Akin imiuan nouikayaj niman ichanejkauan okitatorj konetsintli niman melak pakiyaj ipampa. Elisabet okijto: “Itoka yes Juan”. Yejuamej okijtokej: “Xtikpiya nion se mochanejkauj itoka Juan. Manotokayoti Zacarías, ken itaj”. San ika, Zacarías okijkuilo: “Itoka Juan”. Ijkuakon, ¿Zacarías oksejpa ouel otlajto! Tlen opanok itech konetsintli onomat ipan nochi Judea niman tlaltikpakchanejkej onotlajtoltnijkej: “¿Tlenon kichiuas yejuin konetl ijkuak noskaltis?”.

Kuakon Zacarías okiseli iespíritu santo toTajtsin. Yejua okijto se teotlajtojli: “Manoueyichiua Jehová. Yejua okijli



Abrahán ika kuajtítlaniskia se temakixtijketl, Mesías, akin techmakixtis. Niman Juan yes se teotlajtoketl akin tenojnotsas itech Mesías”.


Noijki, se ichanejkauj Elisabet, akin itoka katka María, itlaj ipan onochiuj tlen temojkatlachialti. Tikitaskkej yejuin ipan okse capítulo.

Tlajtoltlistin: ¿Tlenon Gabriel okijli Zacarías?

¿Tlenon tekítl tlen melak ueyi kijtosneki kichiuaskia Juan?

Mateo 11:7-14; Lucas 1:5-25, 57-79; Isaías 40:3; Malaquías 3:1.

“On tlen on tlakamej xuelij kichiuaj, Dios kemaj ueli kichia” (Lucas 18:27).



69 Iluikaktekitketl Gabriel okitlajpaloto María

Elisabet kipiaya se ichanejkauj ichpochtli, itoka katka María, akin chantiya ipan ueyikalpan Nazaret ipan Galilea. María nonamiktiskia iuan José, akin kojxinketl katka. Ijkuak Elisabet sa kipolouaya yeyi metstli ika kipiayas ikonetsin, iluikaktekitketl Gabriel okinojtiti María niman okijli: “Kuajli xnemi María. Jehová melak yomitsteochiuj”. Yejua xokasikamat tlen Gabriel okijli. Kuakon yejua okijli María: “Tikpiyas se konetsintli. Kipiya ika tiktokayotis Jesús. Yejua Tekiuaj yes, niman iTekiuajyo xkeman tlamis”.

María okijto: “Nejua ok niichpochtli. ¿Kenon uelis nikpiyas se konetsintli?”. Gabriel okijli: “Jehová nochi ueli kichiua. Iespíritu santo uajlas motech niman tikpiyas se konetsintli. Mochanejkauj Elisabet noijki kipiayas se ikonetsin”. María okijto: “Nejua niitekkitkauj Jehová. Nopan manochiua nochi tlen yotikijto”.




María oyaj ipan se ueyikalpan tlen onkatka ipan tepetl, okitlajpaloto Elisabet. Ijkuak okitlajpalo, konetsintli akin nemiya ijtik Elisabet onouiyoni. Elisabet okiseli espíritu santo, niman okijto: “María, Jehová melak yomitsteochiuj. Melak ueyi kijtosneki ika inan noTeko ouajla nochan”. María okijto: “Nikueyichiua Jehová ika nochi noyojlo”. María onokauj iuan Elisabet yeyi metstli, sakín oyaj ichan ipan Nazaret.

Ijkuak José okimat ika María kipiýaskia ikonetsin, yejua xok okinek iuan nonamiktis. San ika, se iiluikaktekitkauj Jehová okinojtiti ipan itemik niman okijli: “Maka xmomojti iuan timonamiktis. Yejua xtlaj kichiuá tlen xkuajli”. Kuakon José iuan ononamikti María.

Tlajtoltilistin: ¿Tlenon Gabriel okijli María itech konetsintli tlen kipiýaskia? ¿Kenon onomachilijkej Elisabet niman María ipampa tlen inpan onochiuj?

Mateo 1:18-25; Lucas 1:26-56; Isaías 7:14; 9:7; Daniel 2:44; Gálatas 4:4.

“Jehová kichiuá nochi tlen yejua kipaktia kichiuas ipan iluikak niman ipan tlaltikpaktli” (Salmo 135:6).




70 Iluikaktekitkej okiteijlikej ika Jesús otlakat

Tekiuaj ipan Tekiuajyotl romano, César Augusto, otlanauati ika nochimej judíos manokuepakan inchan manojkuilotij. Kuakon José niman María oyajkej Belén, pampa ichanejkauan José ompa ualeuayaj. Sa achijtsin poliuiya ika María kipiuyaskia ikonetsin.

Ijkuak oajsikej Belén, san ouel onokaujkej kampa kintsakuayaj yolkamej. Ompa María okitlakatili ikonetsin niman okitejkuix ika yemanki tlakentli niman melak yoliktsin okitekak ipan se kuexomatl.

Inisiuj Belén, sekimej tlajpixkej kintlajpiayaj inborregos kiyauak ika tlayoua. Kuakon nimantsin se iluikaktekitketl onotelkets imixpan niman itlauil iueyilis Jehová okinyeualo. Tlajpixkej melak onomojtijkej, san ika, iluikaktekitketl okimijli: “Maka xmomojtikan. Nikuajkui melak kuajli tlajtoltin. Amanin otlakat Mesías ipan Belén”. Kuakon miyekej iluikaktekitkej ouajnonextijkej ipan iluikak niman kijtougayaj:

“Nejua niualeua itech Dios niman aman nikan ninemi. Xoniuajlaj san pampa oniknek, yej oniuajlaj pampa Dios onechajtitlan” (Juan 8:42).



“Manoueyichiua toTajtsin ipan iluikak niman maonia yolseklistli ipan taltikpaktli”. Sakin, iluikaktekitkej opopoliujkej. ¿Tlenon okichiuujkej tlajpikkej?

Tlajpikkej opeujkej noijliaj: “Nimantsin matiakan Belén”. Kuakon nimantsin oyajkej niman okinextijkej José iuan María kampa kintsakuaj yolcamej niman konetsintli akin kemach yotlakatka.

Nochimej akin okikakej tlen iluikaktekitketl okimijli tlajpikkej, melak otlamojkaitakej. María otlanemili itech itlajtluan iluikaktekitketl niman xkeman okilkauj. Tlajpikkej onokuepkej kampa inyolkauan, kitlasojkamachiliayaj Jehová ipampa nochi tlen okitakej niman okikakej.

Tlajtoltlistin: ¿Kenon okiteijlikej iluikaktekitkej ika yotlakatka Jesús?
¿Akinomej okiminextijkej tlajpikkej ijkuak oajsikej Belén?

Lucas 2:1-20; Isaías 9:6.



71 Jehová okitlajpix Jesús

Ipan se yeuajli, sekimej tlakamej akin ualeuayaj ikisayan tonajli okitakej tlen nesiya kentla se sitlalin tlen melak petlaniya niman nouiyoniaya ipan iluikak. Kampa ualeuayaj noneltokaya ika sitlalimej ueliyaj teyekanaj. Kuakon okitokatiajkej. Yejuin “sitlalin” okinuikak Jerusalén. Tlakamej opeujkej tetlajtoitiaj: “¿Kanon nemi konetl akin yes intekiuaj judíos? Tiknekij ixpan totlakuanketsaskej”.

Ijkuak Herodes, tekiuaj itech Jerusalén, okikak itech se yenkuik tekiuaj, melak onotekipacho niman okintlajtolti teopixkej: “¿Kanon noijtoua ika tlakatis yejuin tekiuaj?”. Yejuamej okinankilijkej: “Teotlajtokej okijtokej ika tlakatiskia Belén”. Kuakon Herodes okiminnots tlakamej akin ualeuayaj ikisayan tonajli niman okimijli: “Xuiyan Belén niman xtejtemokan konetl. Sakin xuajmokuupakan niman xnechijlikij. Nejua noijki nikneki ixpan ninotlakuanketsas”. San ika, san tekajkayaujtoya.

“Sitlalin” oksejpa opeuj nouiyonia. Tlakamej okitokatiajkej hasta Belén. Kuakon “sitlalin” onotelti ikuatipan se kajli niman yejuamej ompa okalajkej niman okinextijkej Jesús iuan inan, María. Yejuamej onotlakuanketskej ixpan konetl niman okimakakej oro, tlen ajuiyak niman mirra. ¿Yemelak okintitlanka Jehová yejon tlakamej makinextitij Jesús? Ka.

Ipan yejon yeuajli, Jehová okinots José ipan se temiktli: “Herodes kineki kimiktis Jesús. Xkuika mosiuauj iuan mokoneuj niman xuiyan Egipto. Ompa xnemikan hasta ijkuak nimitsijlis ika iuelis oksejpa nemokuépaskej”. Nimantsin José niman ichanejkauan oyajkej Egipto.

Jehová okimijlika tlakamej akin ualeuayaj ikisayan tonajli ika maka manokuépakán itech Herodes. Ijkuak Herodes okitak ika yejuamej xnokuépakiaj, melak okualan. Pampa xouel okinexti Jesús, otlanauati makinmiktikan nochimej kokonej akin kipiayaj san


noijki xiuitl ken Jesús. San ika, Jesús xtlaj ipan onochiuj, yejua nemiya Egipto.

Sakin, Herodes omik. Jehová okijli José: “Aman iuelis nemokuepaskej”. José, María niman Jesús onokuepkej Israel, niman onochantijkej ipan ueyikalpan Nazaret.

Tlajtoltlistin: ¿Tlenon kinekiyaj kichiuiliskej Jesús? ¿Kenon Jehová okitlajpix?

Mateo 2:1-23; Miqueas 5:2.

**“Ijkon notlajtol tlen kisa itech nokamak
[...] yemelak kuajli onkisas itech tlen
nejua yoniktitlan manochiua”
(Isaías 55:11).**



72 Telpokatsin Jesús

José iuan María chantiyaj ipan Nazaret iuan Jesús niman oksekimej inkoneuan tlakamej niman siamej. José tekitiya ken kojxinketl niman ijkon kinmakaskia tlen noneki ichanejkauan. Noijki kinmachtiaya itech Jehová niman iTlanauatil. Yejuamej yonomatkaj yaskej ipan sinagoga kampa kiueyichiuayaj Jehová niman nochi xiujtin yayaj Jerusalén kampa kipanoltiayaj Pascua.

Ijkuak Jesús kipiaya 12 xiuitl, ichanejkauan oyajkej Jerusalén ijkon ken nochipa kichiuayaj. Melak tojlan katka ipan ueyikalpan pampa miyekej okipanoltitoj Pascua. Ijkuak otlán iluitl, José iuan María onokuepkej inchan, kinemiliayaj ika Jesús imiuan yaya oksekimej inchanekjauan. San ika, ijkuak okitejtemojkej itech inchanekjauan, xokinextijkej.

Yejuamej onokuepkej Jerusalén niman yeyi tonajli kitejtemojtinemiyaj inkoneuj. Sakin okinextitoj ipan teopan. Ompa nemiya Jesús, intsajlan tlamachtijkej, kuajli kinkaktoya niman



kintlajtoltiaya. Tlamachtijkej melak tlamojkaitayaj ipampa tlen Jesús kijtouaya niman opeuj miyek kitlajtoltiaj. Melak tlamojkaitayaj ipampa itlanankilisuan. Okitakej ika kuajli kasikamatiya iTlanauatil Jehová.

José iuan María melak yonajmankaj. María okijto: “Nokoneuj, ;nochiuiyan timitstejtemojtinemij! ¿Kanon tinemiya?”. Jesús okijto: “¿Xnenkimatiyaj ika kipiya ika ninemis ichan noTaj?”.

Jesús onokuep imiuan itajuan Nazaret. Ompa José okimachti Jesús kenon kichiuas tekintl ken kojxinketl. ¿Kenon tiknemilia katka Jesús ijkuak san telpokatsin katka? Ijkuak onoskaltijtía, onochiujtia tlamachilise. Ika yejon, toTajtsin niman tlaltikpakchanejkej kitlasojtlayaj.

Tlajtoltilistin: José iuan María kitejtemojtinemiyaj Jesús, ¿kanon okinextitoy? ¿Tleka ompa nemiya?

Mateo 13:55, 56; Marcos 6:3; Lucas 2:40-52; 4:16; Deuteronomio 16:15, 16.

“Noalma kojtitikaj ijkuak nikchiua tlen kineki on yejuan onechajtitlan para nitlami itekiu” (Juan 4:34).



73 Juan okiteijli ika uajlaskia Mesías

Juan, ikoneuj Zacarías niman Elisabet, onochiuj teotlajtoketl ijkuak onoskalti. Jehová okititlan Juan makimijli tlaltikpakchanejkej ika uajlaskia Mesías. San ika, yejua xtenojnotsaya ipan sinagogas noso ipan kalpamej, Juan tenojnotsaya ipan tlatluaktli. Nochimej akin ualeuayaj Jerusalén niman Judea konkakiyaj Juan. Yejua okinmacti tlaltikpakchanejkej ika tla kinekiyaj kipaktiskej toTajtsin, nonekiya maka sa makichiuakan tlen xkuajli. Sakin, ijkuak yokikakej, miyekej onoyolkuepkej itech intlajtlakoluan niman Juan okinapolakti ipan atentli Jordán.

Juan nemiya san ika achijtsin. Itlaken tlachijchiujtli katka ika itsojmiyo camello niman kikuaya chapolimej niman neujtli. Kalpan kinekiya kuajli kimatis okseki itech Juan. Hasta fariseos niman saduceos okitatoj. Juan okimijli: “Nemejuamej noneki xmopatlanan niman xmoyolkuepakan. Nenkinemiliaj ika nenuejueyixtokej san pampa nenkijtouaj ika nentekoneuan itech Abrahán. Yejuin xkijtosneki tla nentekoneuan itech toTajtsin”.

Miyekej okitatoj Juan niman okitlajtoitijkej: “¿Tlenon noneki tikchiuaskej niman ijkon tikpaktiskej toTajtsin?”. Juan okimijli: “Tla nenkipiyaj ome nemotlaken xmakakan se akin xtlaj kipiya”. ¿Tikmati tleka ijkon okimijli? Yejua kinekiya makimatikan ika tla kinekiyaj kipaktiskej toTajtsin, nonekiya kintlasojtlaskej oksekimej.

Juan okimijli akin tominsentlaliaj: “Melajki xmoyekanakan niman maka xtekajkayauakan”. Niman soldados okimijli: “Maka

“Yejua ouajlaj ken se teixpantiliketl para okiteixpantiliko ika on yejuan kitemaka tlamachilistli para ijkon nochimej ueliskej tlaneltokaskej” (Juan 1:7).

xselikan tlaxtlauijli san ichtaka niman nochipa xkijtokan tlen melauak”.

Teopixkej niman levitas noijki okitatoj Juan niman okijlikej: “Nochimej kinekij kimatiskej akinon tejua”. Juan okijto: “Nejua kentla nitlajtojli tlen tsajtsi ipan tlaluaktli. Nikinyekana tlaltikpakchanejkej itech Jehová, ijkon ken Isaías okijto”.

Tlaltikpakchanejkej kuelkakiyaj tlen Juan kinmacthiaya. Miyekej notlajtoltiyaj tla Juan katka Mesías. San ika, yejua okimijli: “Yakaj akin melak ueyixtika xijkon ken nejua uajlas. Nion xnechmelaua niktojtomas ikakuan. Nejua niteapolaktia ika atl. San ika, yejua teapolaktis ika espíritu santo”.

Tlajtoltilistin: ¿Tleka Jehová okititlan Juan makinmacthi tlaltikpakchanejkej? ¿Tlenon okichiujkej ijkuak okikakej Juan?

Mateo 3:1-11; Marcos 1:1-8; Lucas 3:1-18; Juan 1:19-28; Isaías 40:3.





12

Jesús otenojnots itech Tekiuajyotl tlen onka iluikak. Noijki ika makitlajtlanikan ipan teoyotl machipau i toka toTajtsin, mauajla iTekiuajyo niman manochiua tlen kineki ipan tlaltikpaktli. Tla tikipiya mokoneuan, xkintomili kenon techpaleuiya yejuin teoyotl. Jesús xonokauili ika Satanás makixelo itech toTajtsin. Jesús okintlapejpeni itlatitlankauan, akin tlapoualtin yeskij itech iTekiuajyo toTajtsin. Xkita kenon Jesús okiteititi ika chikauak okitekichiuli Jehová. Noijki pampa kinekiya kinpaleuis oksekimej okinpajti akin kualouayaj, okinmakak tluajli akin apismikiyaj niman sekimej okinyoliti. Ika yejuin milagros yejua okiteititi tlenon kichiuas Tekiuajyotl ipampa tlaltikpakchanejkej.



TLAMACHTILTIN TLEN NONEKI XMATI

- Jesús okinnauati inomachtijkauan matenojnotsakan itech Tekiuajyotl niman noiiki matemachtikan.
- Kachtopa matiktajtlanikan ipan teoyotl manochiua tlen Jehová kineki sakín uelis tiklajtlaniskej tlen tiknekij.
- Matiteltlapopoluikan ika nochi toyojlo niman matikinchiuilikan oksekimej tlen tikuelitaskiaj matexchiuilikan.

74 Jesús onochiuj Mesías

Juan kiteijliaya yejuin tlajtoltin: “Yakaj akin melak ueyixtika xijkon ken nejua uajlas”. Ijkuak Jesús kipiaya kanaj 30 xiuitl, oualeuj Galilea niman oyaj atentli Jordán, kampa Juan kinapolaktijtoya tlaltikpakchanejkej. Jesús kinekiya ika Juan makiapolakti, san ika, Juan okijli: “Nejua xnechmelaua nimitsapolaktis. Tejua noneki tinechapolaktis”. Jesús okijli: “Jehová kineki tejua xnechapolakti”. Kuakon okalajkej ijtik atentli Jordán niman Juan okiapolakti Jesús.

Ijkuak Jesús okis ijtik atl, okichiuj se teoyotl. Nimantsin iluikak otlapouj niman iespíritu toTajtsin ipan ouajtemok kentla paloma. Kuakon Jehová ouajtlajto itech iluikak: “Tejua tinoKoneuj, akin niktlasojtla. Nejua yonimitsseli”.

Ijkuak Jesús okiseli iespíritu Jehová, yejua onochiuj Cristo noso Mesías. Aman ueliskia peuas kichiuas tekittlen Jehová okinauati makichiu ipan tlaltikpaktli.


Nimantsin ijkuak Jesús onoapolakti oyaj ipan tlaluaktli niman ompa onen 40 tonajli. Ijkuak ouajnoku ep okitato Juan. Ijkuak Jesús nonisiuijtiaya, Juan okijto: “Yejuin iborreguito toTajtsin akin kikixtis tlajtlakojli itech tlaltikpaktli”. Ijkon okijto pampa kinekiya ika tlaltikpakchanejkej makimatikan ika Jesús katka Mesías. ¿Tikneki tikmatis tlenon ipan opanok Jesús ijkuak onen ipan tlaluaktli? Matikitakan.

Tlajtoltilistin: ¿Tleka onoapolakti Jesús?

¿Tleka okijto Juan ika Jesús iborreguito toTajtsin?

Mateo 3:13-17; Marcos 1:9-11; Lucas 3:21-23; Juan 1:29-34; Isaías 42:1; Hebreos 10:7-9.

“Niman oualeu itlajtol
toTajtsin ne iluikak. Kijtoua:
‘Tejua tinotlajsojkaKonetsin,
niman sanoyej moka nipaktikaj’”
(Marcos 1:11).



75 Diablo okitlatlatak Jesús

Ijkuak onoapolakti Jesús, iespíritu santo toTajtsin okuikak ipan tlatlaktli. Ipan 40 tonajli xtlaj okikua niman melak oapismik. Kuakon Diablo okitlatlatak Jesús niman okijli: “Tla melauak tiiKoneuj toTajtsin, xkimijli yejuin temej manochiuakan pan”. San ika, Jesús okinankili ika tlen kijtousa iTlajtol toTajtsin: “Ijkuiliujtika ika xsan ika tlakuajli se yoltika. Noneki kikakis nochi tlajtojli tlen kijtousa Jehová”.

Sakin, Diablo okixnamik Jesús ika okse tlatlatalistli: “Tla melauak tiiKoneuj toTajtsin, itech yejuin ikuatipan teopan, xonmotlajkali. Ijkuiliujtika ika toTajtsin kinuajtitanis iiluikaktekitkauan mamitspaleuikij”. San ika, Jesús oksejpa okinankili ika iTlajtol toTajtsin: “Ijkuiliujtika ika xkipiya tiklatlatas Jehová”.


Kuakon, Satanás okititi Jesús nochi tekiuajyomej tlen onka ipan tlaltikpaktli iuan inueyilis niman okijli: “Nimitsmakas nochi yejuin tekiuajyomej niman inueyilis, tla tinechueyichia maski san sejpa”. San ika, Jesús okinankili: “¡Xuiya Satanás! Ijkuiliujtika ika san Jehová kipiya tikueyichias”.

Kuakon Diablo okikaujteuj, niman iluikaktekitkej oyajkej itech Jesús niman okimakakej tlakuajli. Sakin ijkuak opanok yejuin, Jesús opeuj tenojnotsa kuajli tlajtoltin itech iTekiuajyo toTajtsin. Yejuin tekittl tlen ika okuajtitankej ipan tlaltikpaktli. Tlaltikpakchanejkej kuelkakiyaj tlen Jesús kinmacthiaya niman nochiuiyan kitokayaj.

Tlajtoltilistin: ¿Katlajua yeji tlatlatalistin okixnamik Jesús? ¿Kenon Jesús okinankili Diablo?

Mateo 4:1-11; Marcos 1:12, 13; Lucas 4:1-15;
Deuteronomio 6:13, 16; 8:3; Santiago 4:7.





“Ijkuak [Diablo] kijtous
tlen xmelauak, san kijtous ken
nochipa nouika, pampa yejua
tlakajkayajketl niman yejua intaj
akin tlakajkayauaj” (Juan 8:44).

76 Jesús okichipauj teopan

Kanaj ipan metstli abril itech xiuitl 30, Jesús oyaj Jerusalén. Miyekaj oyajkej ipan ueyikalpan okipanoltitoj Pascua. Ipan yejuin iluitl tlauntlaliayaj ipan teopan. Sekimej kinuikayaj inyolkauan niman oksekimej kinkouayaj Jerusalén.

Ijkuak Jesús oajsik teopan, okitak ika sekimej ompa kinemakayaj yolcamej. ¡Tlanemakatoyaj ichan Jehová, kampa kiueyichiuayaj! ¿Tlenon okichiuaj Jesús? Okichijchiuj se mekatl niman ika okinuajkixti borregos niman uakaxtin itech teopan. Noijki okintlajkal inmesas akin tepatiliayaj tomin niman nochi yejon tomin oxixin. Jesús



okimijli: “¡Xkixtikan nochi yejuin! ¡Maka xchiuakan ichan noTajtsin ken kampa tlanemakalo!”.

Akin nemiyaj ipan teopan melak otlamojkaitakej ijkuak okitakej tlen Jesús okichiuuj. Inomachtijkauan okilnamijkej teotlajtojli tlen tlajtouaya itech tlen kichiuaskia Mesías: “Melak niktlasojtlas ichan Jehová”.

Sakin, ipan xiuitl 33, Jesús oksejpa okichipauj teopan. Yejua xkitekauiliskia san makauilmatikan ichan iTajtsin.

Tlajtoltilistin: ¿Tlenon okichiuuj Jesús ijkuak okitak ika sekimej tlanemakatoyaj ipan teopan? ¿Tleka okichiuuj yejon?

Mateo 21:12, 13; Marcos 11:15-17; Lucas 19:45, 46; Juan 2:13-17; Salmo 69:9.

“Xuelis tiktekichiuilis Dios san sekan iuan on tomin” (Lucas 16:13).



77 Se siuatl akin nemiya kampa pozo

Sakin ijkuak yopanoka Pascua, Jesús iuan inomachtijkauan panouayaj Samaria ijkuak nokuepayaj Galilea. Yejuamej onoteltijkej inisiuj ueyikalpan tlen itoka katka Sicar, kampa noixmatiya ken ipozo Jacob. Jesús noseuijtoya ijkuak inomachtijkauan oyajkej ueyikalpan okikouatoj tlakuajli.

Se siuatl okikixtiko atl. Jesús okijli: “Xnechmaka atl”. Siuatl okijto: “¿Tleka tinechnotsa? Nejua nisamaritana. Judíos xkinnotsaj samaritanos”. Jesús okijli: “Tla tikmatiskia akinon nejua, tinechtlajtlaniliskia atl niman nejua nimitsmakaskia atl tlen kitemaka nemilistli”. Siuatl okitlajtolti: “¿Tlenon tikijtosneki? Tejua nion xtikpiya tlen ika tijkixtis atl”. Jesús okijto: “Akin konis atl tlen nikmakas, xok keman amikis”. Siuatl okijli: “NoTeko, xnechmaka yejon atl”.

“On yejuan amiki, mauajla. Niman yejuan kineki, makoni on atl yejuan tetlayokolijli niman yejuan kitemaka nemilistli” (Apocalipsis 22:17).

Sakin Jesús okijli: “Xkijli moueuentsin mauajla”. Yejua okinankili: “Xnikpiya noueuentsin”. Jesús okijli: “Melauak tlen tikijtoua, pampa makuilpa yotimonamiktijka niman aman tinemi iuan se akin xiuam timonamiktia”. Siuatl okijto: “Nikita ika titeotlajtoketl. Nokalpan kineltoka ika tiueliskej tikueyichiuaskej toTajtsin ipan yejuin tepetl. San ika, judíos kijtouaj ika noneki san tikueyichiuaskej ipan Jerusalén. Nikneltoka ika ijkuak yejkos Mesías, techmachtis ken ijki tikueyichiuaskej toTajtsin”. Kuakon Jesús okijli itlaj tlen xkeman yakaj kijliaya: “Nejua niMesías”.

Siuatl nimantsin oyaj ueyikalpan niman okimijlito




samaritanos: “Niknemilia ika yoniknexti Mesías. Yejua nochi kimati notechkopa. ¡Xuajlakan niman xkitakan!”. Kuakon oyajkej iuan kampa pozo niman okikakej itlamachtluan Jesús.

Samaritanos okijlikej Jesús manokaua ipan ueyikalpan. Ome tonajli yejua okinmachi niman miyekej itech otlaneltokakej. Yejuamej okijlikej siuatl samaritana: “Aman ika otijkakej yejuin tlakatl, tikmatij ika melauak yejua akin kimakixtis taltikpaktli”.

Tlajtoltlistin: ¿Tleka melak otlamojkaitak siuatl samaritana ika Jesús okinots? ¿Tlenon Jesús okijli samaritana?

Juan 4:1-42.



78 **Jesús otenojnots itech Tekiuajyotl**

Sakin ijkuak Jesús onoapolakti, opeuj kiteijlia yejuin tlajtoltin: “ITekiuajyo toTajtsin iyej kotika”. Inomachtijkauan iuan oyajkej nochiuiyan Galilea niman Judea. Ijkuak Jesús onokuep ichan Nazaret, oyaj ipan sinagoga, okitlapo iamatlajkuilol Isaías niman opeuj chikauak kipoua: “Jehová yonechmakak iespíritu santo niman ijkon manitenojnotsa kuajli tlajtoltin”. ¿Tlenon kijtosnekiya? Miyekkej kinekiyaj kitaskej imilagros Jesús. San ika, yejua xokiseli espíritu santo tlen san ika makichiua yejon. Okiseli pampa ika tenojnotsaskia kuajli tlajtoltin. Kuakon yejua okimijli akin kikaktoyaj: “Aman nochiua yejuin teotlajtojli”.

Sakin, Jesús oyaj ipan mar tlen onka Galilea, kampa okinnexiti naui michtlamajkej akin onochiujkej inomachtijkauan. Yejua okimijli: “Nouan xuajlakan niman nimichtlamajkej yeskej itech tlakamej”. Yejuamej katkaj Pedro, Andrés, Santiago niman Juan akin nimantsin okikaujkej intekiyo niman okitokakej. Nochiuiyan ipan Galilea otenojnotskej itech iTekiuajyo Jehová. Otenojnotskej ipan sinagogas, kampa tlanemakalo niman ipan ojtli. Miyekkej kintokayaj kampa yayaj. Nochiuiyan, hasta Siria, onomat tlen kichiuaya Jesús.

Jesús okichiuaj ika sakín sekimej inomachtijkauan mauelikan matepajtikan niman matekixtilikan xkuakualtin espíritus. Oksekimej iuan otenojnotsatoj ipan uejueyimej kalpamej niman ipan kalpantsitsintin. Niman miyekkej siuamej akin yolmelaujkej katkaj ken María Magdalena, Juana, Susana niman oksekimej, kipaleuiayaj Jesús niman inomachtijkauan.

Ijkuak yejua yokinmachi inomachtijkauan, Jesús okintitlan matenojnotsatij. Ijkuak tenojnotstiyaj Galilea, miyekkej onochiujkej inomachtijkauan niman onoapolaktijkej. Miyekkej kinekiyaj nochiuaskej inomachtijkauan Jesús niman yejua okijto ika katkaj ken tlaltin ijkuak inopixkas. Yejua okijto: “Xtlajtlanilikan Jehová makinuajtitalani okseki tekitej matlapixkakan”. Yejua okintlapejpeni



**“Najua ika onkaj nitemachtis on
kuajli tlajtojli no ipan on oksekimej
pueblos ken Dios tlamandarojtikaj,
pampa yejua ika Dios onechajtitlan”
(Lucas 4:43).**

70 inomachtijkauan niman ojomemej okintitlan matenojnotsatij ipan nochi Judea. Nochimej kinnojnotsayaj itech Tekiuajyotl. Ijkuak ouajnokuepkej, melak kinekiyaj kijliskej Jesús tlen inpan onochiujka. Diablo xueliskia kiteltis intenojnotsalis.

Jesús okinmachi inomachtijkauan nochipa matenojnotsakan sakim ijkuak nokuepaskia iluikak. Yejua okimijli: “Xtenojnotsakan kuajli tlajtoltin ipan nochi tlaltikpaktli. Xtemachtikan itech iTlajtol toTajtsin niman xteapolaktikan”.

Tlajtoltilistin: ¿Tlenon tekintl okinmakak Jesús inomachtijkauan?

¿Kenon onomachilijkej inomachtijkauan ipampa yejuin tekintl?

Mateo 4:17-25; 9:35-38; 28:19, 20; Marcos 1:14-20; Lucas 4:14-21; 8:1-3; 10:1-22.



79 Jesús okichiuj miyek milagros

Jesús ouajla ipan tlaltikpaktli otenojnotsako itech iTekiuajyo toTajtsin. Noijki, Jehová okimakak iespíritu santo tlen ika makichiuu milagros ijkon teititis tlen kichiuas ijkuak Tekiuaj yes. Yejua ueliya kinpajtiaya nochi kokolistin. Maski san kanon yaya, kokoxkej kitlajtlaniliayaj makinpajti niman yejua kinpajtiaya. Akin xtlachiyaj, tlachiyaj, akin xtlakakiyaj, tlakakiyaj niman akin sepoujtoyaj, nejnemiyaj. San kikitskiliayaj itenko itlaken, pajtiyaj. Noijki akin kipiayaj xkuakualtin espíritus kinpajtiaya. Miyekej kitokayaj Jesús maski san kanon yaya. Maski kemantika kinekiya nemis iselti, nochipa kinseliaya akin kitejtemouayaj.

Se tonajli, okuikakej se akin sepoujtoya ipan kajli kampa Jesús nemiya. San ika, pampa melak tojlan katka, xouelkej okalajkej. Kuakon, okikoyonijkej ikuatipan kajli niman okontemoltijkej kampa Jesús

nemiyu. Kuakon Jesús okijli tlakat!: “Xmokuiteua niman xnejnemi”. Ijkuak yejua okichiuj, nochimej otlamojkaitakej.

“Dios okititlan on Espíritu Santo itech Jesús [...] para kipia poder [...]. Nouiyan okichijtinen on tlen kuajli niman nochimej on yejuan itlaj ika kintlajyouiltiaya ika ipoder on diablo okimpajtijtinen, pampa Dios iuan nemiya” (Hechos 10:38).

Okse tonajli, Jesús okalak ipan se kalpan niman majtlaktli tlakamej akin kipiayaj lepra uejka okontsajtsilijkej: “Jesús, ¡xtechpaleui!”. Ipan yejon tonaltin, akin kipiayaj lepra xkinkauiliayaj manonisiuikan itech oksekimej. Jesús okimijli mayakan teopan, ijkon ken iTlanauatil Jehová kinnauatiaya leprosos



makichiuakan ijkuak yopajtikaj. Ijkuak yejuamej ok xiajsiyaj, opajtikej. Ijkuak se itech yejuamej okitak ika yopajtika, ouajnokuep okitlasojkamachilito Jesús niman okiueyichiuaj toTajtsin. Itech yejon majtlaktli, san yejua okitlasojkamachilito Jesús.

Se siuatsintli akin ikipiaya 12 xiuitl ika kualouaya, melak kinekiya pajtis. Yejua okinisiui Jesús maski melak tojlan katka niman okajsik itenko itlaken. Nimantsin siuatsintli opajtik. Kuakon Jesús otetlajtolti: “¿Akinon onechkitski?”. Siuatsintli melak onomojti, okinisiui niman okijli nochi tlen opanok. Jesús okiyolseui niman okijli: “Nokoneuj, xuiya ika yolseuilstli”.

Se tlakatl akin ueyixtoya itoka katka Jairo, okitlajtlanili Jesús: “¡Xuajla nochan! Noichpokatsin melak kualo”. San ika, ijkuak xiajsiyaj ichan Jairo, iichpokatsin omik. Ijkuak Jesús oajsik, okitak ika miyekej chokatoyaj. Jesús okimijli: “Maka xchokakan, yejua san kochtika”. Kuakon okajsik ima ichpokatsin niman okijli: “Ichpokatsin, ¡xmokuiteua!”. Yejua nimantsin onokuiteuj niman Jesús okimijli itajuan makitlakualtikan. ¡Xnemili kenon onomachilijkej itajuan ichpokatsin!

Tlajtoltlistin: ¿Tleka Jesús ueliya kinpajtiaya nochi kokolistin?
¿Tlenon ipan onochiuaj iichpokatsin Jairo?

Mateo 9:18-26; 14:36; Marcos 2:1-12; 5:21-43; 6:55, 56; Lucas 6:19; 8:41-56; 17:11-19.

80 Jesús okintlapejpeni 12 itlatitlankauan

Ijkuak Jesús kipiaya kanaj se xiuitl uan tlajko ika tenojnotstinemiya, yejua okitlapejpeni itlaj tlen melak ueyi kijtosnekiya. ¿Akinomej kintlapejpeniskia iuan matekitikan? ¿Akinomej kinmachtiskia makiyekanakan tlanechikojli? Achtopa kijtos tlen kichiuas, okitejtemo itlayekanalís Jehová. Kuakon oyaj ipan tepetl kampa iselti nemiskia niman nochi yeuajli okichiuaj teoyotl. Uajmostla ika kualkan, Jesús okiminnots sekimej inomachtijkauan niman okintlapejpeni 12 itlatitlankauan. ¿Tikilnamiki intokayo? Yejuamej katkaj Pedro, Andrés, Santiago, Juan, Felipe, Bartolomé, Tomás, Mateo, Santiago tekoneuj itech Alfeo, Tadeo, Simón niman Judas Iscariote.

Yejon 12 itlatitlankauan yaskiaj iuan Jesús. Sakin ijkuak yokinmachtijka, okintitlan matenojnotsatij. Jehová okinmakak kojtilistli tlen ika kitekixtiliskej xkuakualtin espíritus niman kinpajtiskej akin kualouayaj.

Jesús kimitaya 12 itlatitlankauan ken akin imiuan nouikaya niman intech tlaneltokaya. Tlamachtijkej itech tlanauatijli

Andrés



Pedro



Santiago



Juan



Felipe



kimitayaj tlatitlankej ken akin xonomachtijkej niman xueyixtoyaj. San ika, Jesús xijkon kimitaya. Yejua kuajli yokinmachtijka ijkon kuajli kichiuaskej intekiyo. Yejuamej nemiskiaj iuan Jesús ijkuak melak nonekiskia, ken ijkuak ikimiktiskiaj niman ijkuak oksejpa yoliuiskia. Miyekkej itlatitlankauan Jesús ualeuayaj Galilea ijkon ken yejua. Sekimej yononamiktijkaj.

Itlatitlankauan tlajtlakojlekej katkaj ika yejon nopopolouayaj. Kemantika xkinemiliayaj tlen kijtouayaj niman xkuajli kitlapejpeniayaj tlen kichiuayaj. Xnochipa oteijyouijkej. Hasta onokualanijkej pampa kinekiyay uejueyixtoskej itech oksekimej. San ika, kuajli katka inyojlo niman kitlasojtlayaj Jehová. Yejuamej akin peuaskiaj kiyekanaskej tlanechikojli sakín ijkuak Jesús xok nemiskia ipan tlaltikpaktli.

Tlajtoltlistin: ¿Akinomej okintlapejpeni Jesús manochiuakan 12 itlatitlankauan? ¿Tlenon okinnauati Jesús makichiuakan itlatitlankauan?

Mateo 10:1-10; Marcos 3:13-19; 10:35-40; Lucas 6:12-16; Juan 15:15; 20:24, 25; Hechos 2:7; 4:13; 1 Corintios 9:5; Efesios 2:20-22.

“Nemechtokayotia notetlajsojkauan pampa yonemechijlij nochi tlen noTajtsin onechijlij” (Juan 15:15).

Simón



Tadeo



Bartolomé



Tomás



Judas Iscariote



Santiago tekoneuj itech Alfeo



Mateo



81 Tlamachtijli ipan Tepetl

Sakin ijkuak okintlapejpeni 12 itlatitlankauan, Jesús ouajtemok itsintlan tepetl kampa melak miyekej yonosentlalijkej. Yejuamej ualeuayaj: Galilea, Judea, Tiro, Sidón, Siria niman kalpamej tlen kipanauiyaj atentli Jordán. Okinuajuikilijkej akin kualouayaj noso tlajyouiyaj ipampa xkuakualtin espíritus. Jesús okinpajti nochimej. Kuakon onotlali ipan tepetl niman opeuj kinnojnotsa. Okijto tlenon noneki tikchiuaskej tla tiknekij touikaskej iuan toTajtsin. Noneki matikasikamatikan ika noneki matikpiyakan itlapaleuilis Jehová niman matomachtikan matiktlasojtlakan. San ika, xuelis tiktlasojtlaskej toTajtsin tla xtikintlasojtlaj oksekimej. Nochimej matikinchiuilikan tlen kuajli, noijki akin techtlauelitaj.

Jesús okijto: “Xsan noneki nenkintlasojtlaskej akin inuan nemouikaj. Noijki noneki nenkintlasojtlaskej akin mechtlauelitaj, niman nentetlapopoluiskej ika nochi nemoyojo. Tla yakaj nemouan kualani,



nimantsin xkitatij niman xkijlitij mamechtlapopolui. Xkinchiuilikan oksekimej ijkon ken nenkinekiskej mamexchiuilikan”.

Jesús noiiki okinmakak tlajtolpaleuulistin itech kenon noneki kitaskej tlen kipiay. Yejua okijto: “Tlen melak ueyi kijtosneki, timouikas iuan Jehová xijkon ken tikpiyas miyek tomin. Se tlachtejketl uelis kichtekis nemotomin, san ika, xakaj uelis mechichtekilis ken kuajli iuan nemouikaj Jehová. Ika yejon maka xmajmanakan itech tlen nenkikuaskej, nenkoniskej noso tlen ika nemotlakentiskej. Xkimitakan totomej, toTajtsin nochipa kinmaka tlen kikuaskej. Tla san nemajmantokej, xkichiuas uejkaujtipan xnemikan. Xkilnamikikan, Jehová kimatstika tlen mechpoloua”.

Tlaltikpakchanejkej xkeman kikakiyaj makinnojnotsakan ijkon ken Jesús okichiuj. Tlamachtijkej ipan tlanauatijli xkinmachiayaj yejon. ¿Tleka Jesús melak kuajli temachtiaya? Pampa nochi tlen temachtiaya ualeuaya itech Jehová.

Tlajtoltilistin: ¿Tlenon noneki tikchiuaskej tla tiknekij touikaskej iuan Jehová? ¿Tlenon kineki Jehová matikinchiuilikan oksekimej?

Mateo 4:24-5:48; 6:19-34; 7:28, 29; Lucas 6:17-31.

“Xmokauilikan manemechpaleui niman xmokauilikan manemechmachi, pampa nejua niyolsejki niman niyolyemanki, niman notech nenkinextiskej neseuilistli para nemoalma” (Mateo 11:29).



82 Jesús okinmacthi inomachtijkauan kenon kichiuaskej teoyotl

Fariseos kinekiyaj nochimej kinmojkatlachialtiskej. Tla kichiuayaj itlaj tlen kuajli san kichiuayaj pampa kinekiyaj oksekimej makimitakan. Teixpan kichiuayaj teoyotl niman ijkon nochimej ueliskiaj kimitaskej. Fariseos kitsontekontlaliayaj ueueyakej teoyomej niman miyekpa kijtouayaj ipan sinagogas niman kampa tojlan nojutilo kampa ueliskiaj kinkakiskiaj. Kuakon tlaltikpakchanejkej otlamojkaitakej ijkuak Jesús okimijli: “Maka xchiuakan teoyotl ken fariseos. Yejuamej kinemiliaj ika toTajtsin mojkatlachias pampa miyek tlajtolin kijtouaj, san ika, yejon xmelaauak. San nemoselti xnotsakan Jehová”.

Jesús okimijli kenon kichiuaskej teoyotl: “ToTajtsin akin tinemi iluikak, machipaui motoka. Mauajla moTekiuajyo.



Manochiua nikan ipan tlaltikpaktli tlen tikneki, ijkon ken nochiua iluikak”. Noijki okimijli ika ipan inteoyouj makitlajtlanikan tlen mojmmostla kikuaskiaj, makintlapopoluili intlajtlakoluan niman itech okseki tlen kinmajmanaskia.

Noijki, Jesús okijto: “Maka xkajkauakan ika nenkichiuaj teoyotl. Nochipa xtlajtlanilikan nemoTajtsin, Jehová, tlen kuajli. Se tajtli kineki kimakas ikoneuj tlen kuajli. Tla nemokoneuj mechtlajtlanilia pan, ¿nenkimakaskej se tetl? Tla mechtlajtlanilia se michin, ¿nenkimakaskej se kouatl?”.

Jesús otetomili tlenon kijtosnekiya tlen okijto: “Tla nenkimatstokej kenon nenkintlayokoliskej tlen kuajli nemokoneuan, ¿kuajli xmatstokan ika nemoTajtsin, Jehová, mechmakas espíritu santo! San noneki xtlajtlanilikan”. ¿Tikchiua tlen Jesús okijto? ¿Tlenon tiktlajtlanilia Jehová ijkuak tikchiua teoyotl?

Tlajtoltlistin: ¿Tlenon okinmacthi Jesús makitlajtlanikan inomachtijkauan ipan teoyotl? Ijkuak tikchiua teoyotl, ¿tiknotsa Jehová itech tlen tikita ika melak ueyi kijtosneki?

Mateo 6:2-18; 7:7-11; Lucas 11:13.

“Xtlajtlanilikan Dios tlen mechpoloua, niman yejua mechmakas. Xtejemokan tlen mechpoloua, niman nenkinextiskej. Xtetepinikan on tlatsakuilyotl, niman Dios mechtlapouilis” (Mateo 7:7).



83 Jesús melak miyekej okintlakualti

Ijkuak xiajsiya Pascua ipan xiuitl 32, tlatitlankej ouajnokuepkej kampa otenujnotsatoj. Yejuamej melak siaujtoyaj, kuakon Jesús okinuikak Betsaida ipan se barco kampa ueliskiaj noseiskej. San ika, ijkuak oajsikej itempan atl, Jesús okitak ika miyekej tlaltikpakchanejkej okintokakej. Maski yejua kinekiya nemis iselti iuan itlatitlankauan, kuajli okinseli. Okinpajti akin kualouayaj niman opeuj miyek kinmachtia. Nochi tonajli okinmachi itech iTekiuajyo toTajtsin. Ijkuak iteotlak katka, itlatitlankauan okijlikej: “Tlaltikpakchanejkej kanaj apismikij. Xkintitlani mauian niman ijkon ueliskej kikouaskej tlen kikuaskej”.

Jesús okimijli: “Xnoneki mauian. Nemejuamej xkinmakakan tlen kikuaskej”. Itlatitlankauan okitlajoltijkej: “¿Tikneki matijkouatij

pan tlen kikuaskej?”. Felipe, se itlatitlankauj Jesús, okijli: “Maski tikpiyaskiaj miyek tomin, xtechaxiliskia tikkouaskej miyek pan tlen nochimej makikuakan”.

Jesús okintlajoltli: “¿Kech pan tikpiyaj?”. Andrés okijli: “San tikpiyaj makuijli pan niman ome michintsitsintin. Yejon xtechaxilis”. Jesús okijto: “Xnechujkuilikan yejon pan niman michintsitsintin”. Kuakon okimijli tlaltikpakchanejkej manotlalikan ipan sakatl niman manosesentlalikan, sekimej 50 niman oksekimej 100. Kuakon okontilan pan niman michimej, oajkotlachix niman okichiuje teoyotl. Sakin okinmakak itlatitlankauan yejon tlakuajli,



niman yejuamej okinxexelouilijkej tlaltikpakchanejkej. Nochimej 5,000 tlakamej akin ompa nemiya, noiiki siuamej niman kokonej otlakuajkej hasta kampa oixuikkej. Sakin, tlatitlankej okisentlalijkej tlen onokauj niman ijkon maka maijtlakaui. Okitemiltijkej 12 chikijtin. ¿Xmelak ika temojkatlachialti yejuin milagro?

Nochimej melak otlamojkaitakej hasta kinekiyaj ika Jesús manochiua intekiuaj. San ika, Jesús kimatstoya ika Jehová ok xkinekiya manochiua tekiuaj. Kuakon okimijli tlaltikpakchanejkej mauiyan niman okimijli itlatitlankauan makipanauikan mar Galilea. Yejuamej oyajkej ipan barco, niman Jesús iselti otlejkok ipan tepetl. ¿Tleka? Pampa kinekiya tlajtos iuan iTajtsin. Maski kipiaya miyek tekiti, Jesús nochipa kichiuaya teoyotl.

Tlajtoltlistin: ¿Kenon okiteititi Jesús ika najmanaya ipampa tlaltikpakchanejkej? ¿Tlenon techmachtia yejuin itech Jehová?

Mateo 14:14-22; Marcos 6:30-44; Lucas 9:10-17; Juan 6:1-15.

**“Maka xtekitikan ika on tlakuajli yejuan saniman tlami, yej xtekitikan ika on tlakuajli yejuan kisa itech Dios yejuan kitemaka nemilistli para nochipa. Nejua yejuan oninochiu Tlakatl mechmakas yejua in tlakuajli”
(Juan 6:27).**



84 Jesús onejnen ixko atl

Jesús xsan ueliya kinpajtiaya akin kualouayaj niman kinyolitiaya akin yomijkaj, noijki ueliya kinauatiaya ajakatl niman kiyaujtli. Ijkuak otlán kichiuá teoyotl ipan tepetl, Jesús oontlachix kampa mar de Galilea niman okonitak ika ajakakiyaujtoya. Itlatitlankauan nemiyaj ipan se barco niman nokojtilijtoyaj maka amimikiskej. Jesús otemok niman opeuj nejnemi ixko atl niman oyaj intech. Ijkuak tlatitlankej okitakej ika yakaj nejnemiya ixko atl, melak onomojtijkej. San ika, Jesús okimijli: “Néjua niJesús. Maka xmomojtikan”.

Pedro okijto: “NoTeko, tla melauak tejua, xtlánauati maniuíya motech”. Jesús okijli Pedro: “Xuajla”. Kuakon, maski ajakakiyauíya, Pedro otemok itech barco niman opeuj nejnemi ixko atl niman ijkon ajsis kampa Jesús. San ika, ijkuak ikiniuijtiaya, Pedro okitak ken ajakakiyauíya niman melak onomojti. Yéjua okimat ika iapolakiya. Pedro otsajtsik: “¡NoTeko, xnechmakixti!”. Jesús okajsik ipan ima niman okijli: “¿Tleka opeuj tiometlamati? ¿Kanon onka motlaneltokil?”.


Ijkuak Jesús iuan Pedro otlejkokej ipan barco, nimantsin onotelti ajakakiyaujtli. ¿Kenon tiknemilia onomachilijkej itlatitlankauan Jesús? Yéjuamej okijtokej: “Tejua melauak tiiKoneuj toTajtsin”.

Xsan ijkuakon Jesús okitelti ajakakiyaujtli. Okse tonajli, ijkuak imiuan yaya itlatitlankauan ipan barco niman kipanauiskiaj mar, Jesús okochito tlakuitlapan. Ijkuak yokochka, opeuj temojti ajakakiyauí. Atl chikauak kimapeuaya barco niman opeuj atemi. Itlatitlankauan okitlachialtitoj Jesús niman okitsajtsilijkej: “¡Tlamachtijketl, itimikiskej! ¡Xtechpaleui!”. Jesús onokuíteuj niman okijli mar: “Xmotelti”. Nimantsin onotelti ajakatl niman mar. Jesús okintlajtolti itlatitlankauan: “¿Kanon onka nemotlaneltokil?”. Yéjuamej opeuj noijliaj: “Hasta ajakatl niman mar kitlakamatij”. Tlatitlankej okasikamatkej ika tla yemelak tlaneltokaj itech Jesús, xkiplayaj itlaj kimakasiskej.

Tlajtoltlistin: ¿Tleka Pedro opeuj apolaki?
¿Tlenon okasikamatkej tlatitlankej itech Jesús?

Mateo 8:23-27; 14:23-34; Marcos 4:35-41; 6:45-52; Lucas 8:22-25;
Juan 6:16-21.

**“Tla nenkipiyaj nemotlaneltok maski
ichtetsin on ken on iteyo on mostaza
nochi uelis nenkichiuaskej”
(Mateo 17:20).**



85 Jesús otepajti ipan sábadó

Fariseos kitlaueilitayaj Jesús niman kitejtemouiliayaj kenon kajsiskej. Yejuamej kijtouayaj ika Jesús xkipiya ika tepajtis ipan sábadó pampa ipan yejon tonajli noseuilo. Se sábadó, Jesús okinexti se tlakatl akin xtlachiaya niman tomintlajtlaniya ipan ojtli. Yejua okimijli inomachtijkauan: “Xkitakan kenon ikojtilis toTajtsin kipaleuis yejuin tlakatl”. Jesús okinelo ikualak iuan tlajli niman okichijchiuj sokitl niman okitlalili ipan ixtololojuan. Jesús okijli: “Xuiya niman xmixtenpajpakati ipan pozo itoka Siloam”. Tlakatl ijkon okichij niman aman kema ouel otlachix.

“Nemejuamej nemopolouaj, pampa xnenkimatij tlinon kijtoun Yektlajkuilojli nion nenkimatij ika Dios nochiueli kichia” (Mateo 22:29).

Tlaltikpakchanejkej melak otlamojkaitakej. Yejuamej kijtouayaj: “Yejuin tlakatl akin notlaliaya niman tomintlajtlaniya, ¿xmelak? ¿Noso okse akin noiiki ijkon tlachia?”. Tlakatl okijto: “¡Neljua akin xnitlachiaya ijkuak onitlakatl!”. Yejuamej okitlajtojtijkej: “¿Tleka aman iueli titlachia?”. Ijkuak okimijli tlenon

opanok, yejuamej okuikakej kampa fariseos.

Tlakatl okimijli fariseos: “Jesús onechtlalili sokitl ipan noixtololojuan niman onechijli maninoixtenpajpakati. Onikchiuj niman aman iniueli nitlachia”. Fariseos okijtokej: “Tla Jesús tepajtia ipan sábadó, ikojtilis xuelis ualeuas itech toTajtsin”.

San ika, oksekimej kijtouayaj: “Tla ikojtilis xualeuaskia itech toTajtsin, xueliskia tepajtiskia”.



Fariseos okinnotskej itajuan yejon tlakatl niman okintlajoltijkej: “¿Tleka aman nemokoneuj iueli tlachia?”. Itajuan nomojtiayaj pampa fariseos okijtokaj ika akin tlaneltokaskia ipan Jesús kikixtiskiaj itech sinagoga. Kuakon yejuamej okijtokej: “Xtikmatij tleka. Yejua xtlajoltikan”. Fariseos okseki okitlajoltijkej tlakatl, niman yejua okijto: “Nochi tlen nikmatstika yonimechijli. ¿Tleka ok ninechtlajoltijtokej?”. Fariseos melak okualankej niman okikixtijkej kiyauak.

Sakin Jesús okitato yejon tlakatl niman okitlajolti: “¿Titlaneltoka itech Mesías?”. Tlakatl okijto: “Nikneltokaskia tla nikmatiskia akinon yejua”. Jesús okijli: “Nejua niMesías”. ¿Xmelak ika Jesús okiteititi ika melak yolkuajli katka? Yejua xsan okipajti, noiiki okipaleui matlaneltoka.

Tlajoltilistin: ¿Kenon Jesús okipaleui tlakatl akin xtlachiaya?
¿Tleka fariseos kitlauelitayaj Jesús?

Juan 9:1-41.



86 Jesús okiyoliti Lázaro

Lázaro niman ikniuan, María iuan Marta, chantiyaj Betania. Jesús melak kuajli imiuan nouikaya. Se tonajli ijkuak Jesús nemiya Perea, María iuan Marta otlanauatijkej makijlitij Jesús yejuin tlajtoltin: “Lázaro melak kualo. ¡Timitstlajtlaniliaj nimantsin xuajla!”. Jesús xnimantsin oyaj, onokauj Perea ome tonajli niman sakin okimijli inomachtijkauan: “Matiuiyan Betania. Lázaro kochtika, niman nejua nikontlachialtis”. Itlatitlankauan okijlikej: “Tla Lázaro san kochtika, kuakon pajtis”. Jesús okinmelajkaijli: “Lázaro yomik”.

Ijkuak Jesús oajsik Betania, Lázaro ikipiaya naui tonajli ika yokitokakaj. Melak miyekej okinyolseujto Marta iuan María. Ijkuak Marta okikak ika Jesús yoajsika, nimantsin onotlalo okinamikito. Marta okijli: “NoTeko, tla nikan tinemiskia, nokniuj xmikiskia”. Jesús okijli: “Mokniuj oksejpa yoliuis. ¿Tikneltoka yejuin, Marta?”. Yejua okijto: “Nikneltoka ika nokuiteuas pampa onias se yoliuulistli”. Jesús okijli: “Nejua niyoliuulistli niman nemilistli”.

Kuakon Marta oyaj okijlito María: “Jesús nikan nemi”. María onotlalo kampa Jesús niman oksekimej okitokakej. Yejua ikxitlan onotlakuankets niman xnokajkauaya ika choka. María okijli: “NoTeko, tla nikan tinemiskia, tokniuj ok yoltoskia”. Jesús okitak ika yejua melak noyolkokouaya niman noijki opeuj choka. Ijkuak akin ompa nemiya okitakej yejon, opeuj kijtouaj: “Xkitakan kenon Jesús melak kitlasojtlaya Lázaro”. San ika, sekimej kijtouayaj: “¿Tleka xniman okipajti?”. Aman, ¿tlenon kichiuaskia Jesús?

Jesús oyaj kampa okitokakej Lázaro, katka se teostotl tlen tsauktoya ika se ueyi tetl. Yejua otlanauati: “Xkejkuanian tetl”. Marta okijto: “NoTeko, ¡kanaj yomoloniak pampa ikipiya naui tonajli!”. Maski ijkon, okejkuaniykej tetl niman Jesús okichiuj teoyotl, okijto: “NoTajtsin, tlaxtlaui pampa tinechkaki. Nikmatstok ika nochipa tinechkaki, san ika aman chikauak nitlajtoua niman ijkon nochimej akin nikan nemij makineltokakan ika otinechujtitlan”. Kuakon

chikauak okontsajtsili: “Lázaro, ¡xuajkisa!”. Opanok itlaj tlen melak temojkatlachialti: Lázaro ouajkis niman uajtejuixtiaya ika miyek tlakentin. Jesús okijto: “Xkixtilikan tlakentin niman xkauilikan mauiya”.

Miyekej okitakej yejuin niman otlaneltokakej itech Jesús. San ika, sekimej oyajkej okimijlitoj fariseos. Ompa opeuj ika fariseos kinekij kimiktiskej Lázaro niman Jesús. Semej itech 12 tlatitlankej, Judas Iscariote, oyaj kampa fariseos niman okintlajtolti: “¿Kech ninechtlaxtlauiliskej tla nimechpaleuiya xkajsikan Jesús?”. Yejuamej okijtokej kitlaxtlauiliskiaj 30 platajtomín niman Judas opeuj kitejtemoua kenon kitemaktilis Jesús.

Tlajtoltilistin: Xkijto kenon okiyolitijkej Lázaro.

¿Tlenon kinekijaj kichiuaskej fariseos ijkuak okimatkej tlen ipan onochiuj Lázaro?

Mateo 26:14-16; Juan 11:1-53; 12:10.

“ToTajtsin akin melauak, yejua se toTajtsin akin techmakixtia; Jehová, toTeko akin Ueyixtika, temakixtia itech mikilistli” (Salmo 68:20).





13

Jesús ouajla ipan tlaltikpaktli okitemakako inemilis ipampa tlaltikpakchanejkej tlajtlakolejkej. Maski omik, okitlan tlaltikpaktli. Jehová xokikauj ikoneuj niman oksejpa okiyoliti. Ipan nochi inemilis Jesús ika yolyemanistli okinpaleui oksekimej niman okintlapopolui ijkuak nopopolouayaj. Ijkuak oyoliuj, Jesús ouajnonexti imixpan inomachtijkauan. Yejua okinmachi kenon kichiuaskej tekiti tlen okinnauati makichiuakan. Tla tikinpiya mokoneuan, xkinpaleui makitlasojkamatikan ika tejuamej noijki tikchiuaj yejon tekiti.



TLAMACHTILTIN TLEN NONEKI XMATI

- Xonka nion se tlauejli tlen Jehová xuelis kiyektlalis.
- Matikinpaleuikan oksekimej ijkon ken Jesús okichiuj.
- Akin melauak tikchiuaj ken Cristo techixmatij ipampa tlasojtlalistli tlen toititaj.



87 **Jesús okipanolti sa iyeka Pascua**

Judíos kipanoltiayaj Pascua nochi xiujtin ipan tonajli 14 metstli nisán. Yejuin kimilnamiktiaya kenon Jehová yokinmakixtijka ken tlakeualtin itech Egipto niman okinuikak ipan Tlajli tlen yokijtoka kinmakas. Ipan xiuitl 33, Jesús iuan itlatitlankauan okipanoltijkej Pascua ipan se kajli tlen onkatka Jerusalén. Ijkuak yotlakuajkej, Jesús okijto: “Semej itech nemejuamej nechtemaktilis”. Itlatitlankauan melak otlamojkaitakej niman okitlajtoitijkej Jesús: “¿Akinon ijkon mitschiuilis?”. Jesús okijto: “Yejon tlakatl akin nikmakas yejuin pan”. Kuakon okimakak Judas Iscariote tlajkotsin pan. Judas onokuiteuj niman okis itech cuarto.

Sakin Jesús okichiuaj se teoyotl, okitlajtlapan pan niman okinxelouili itlatitlankauan. Kuakon okimijli: “Xkuakan yejuin pan tlen kixneskayotia notlalnakayo, tlen niktemakas nemopampa”. Noijki okichiuaj teoyotl ipampa vino, okinpanoltili itlatitlankauan niman okimijli: “Xkonikan yejuin vino tlen kixneskayotia noyesyo tlen niktemakas, niman ijkon mechtlapopoluiliskej nemotlajtlakoluan. Kuajli nimechijlia ika nouan nentekiuajtiskej iluikak. Nochi xiujtin xchiuakan yejuin tlen ika xnechilnamikikan”. Nochi xiujtin, akin kichiuaj ken Cristo, ok nosentlaliaj ipan sa noijki tonajli ijkuak itlapoyaujtika.



“Maka xmomajtikan maski xnenmiyekej, pampa nemoTajtsin kipiya paktli para mechkauilis nenkalakiskej kampa yejua tlamandaroua” (Lucas 12:32).

Aman yejuin tlanechikojli noixmati ken iTlakualis toTeko.

Ijkuak yotlakuajkej, itlatitlankauan Jesús onokualanijkej itech akinon ueyixtoya. San ika, Jesús okimijli: “Akin ueyixtos nemotsajlan noneki noitas ken yakaj akin xueyixtika”.

“Nejua nemouan ninouika. Nimechijlia nochi tlen noTajtsin kineki manimechijli. Xuejkaujtipan, ninokuepas kampa noTajtsin. Nemejuamej nikan nemokauaskej, niman nochimej kimatiskej ika nennotemachtijkauan ipampa tlasojtlalistli tlen nimoititiskej. Kipiya nemotlasojtlaskej ijkon ken nejua onimechtlasojtlak”.

Sakin, Jesús okichiuiili teoyotl Jehová. Okitlajtlanili makintlajpiya nochimej inomachtijkauan, makinpaleui san sekan matekitikan ika yolseuilstli niman manochipaua itoka Jehová. Kuakon Jesús niman itlatitlankauan okikuikatlalilijkej Jehová niman okiskej kiyauak. Sa achijtsin poliuiya ijkuak kajsiskiaj Jesús.

Tlajtoltilistin: ¿Tlenon okimijli Jesús ika kiseliskej itlatitlankauan?

Ijkuak yokipanoltijkaj Pascua, ¿tlenon Jesús okinmacthi itlatitlankauan?

Mateo 26:20-30; Lucas 22:14-26; Juan 13:1, 2, 26, 30, 34, 35; 15:12-19; 17:3-26.

88 Okajsikej Jesús

Ijkuak oyajkej ipan tepetl itoka Olivos, Jesús niman itlatitlankauan okipanauijkej valle itoka Cedrón. Yopanoka tlajkoyeuajli niman tentoya metstli. Ijkuak oajsikej kampa noixmati ken Getsemaní, Jesús okimijli: “Nikan xmokauakan niman xtlachixtokan”. Kuakon onoxelo intech inomachtijkauan niman onotlakuankets. Melak najmantoya, Jesús okinots Jehová niman okijli: “Manochiua tlen tikneki”. Kuakon, Jehová okititlan se iiluikaktekitkauj makiyolchikauati. Ijkuak Jesús onokuep kampa nemiyaj yeyimej itlatitlankauan, yejuamej kochtoyaj. Yejua okimijli: “¡Xtlachiakan! ¡Amantsin xkimelaua xkochikan! Yoajsik tonajli ijkuak nechtemakaskej intech akin nechtlauelitaj”.

Judas oajsitiuets. Yejua kinyekanaya akin kitkiyaj espadas niman intlakouan. Kimatstoya kanon kinextis Jesús pampa miyekpa ompa oyajkaj. Judas okimijli soldados ika yejua kimititiskia akinon katka Jesús. Oyaj itech Jesús niman okijli: “Tlamachtijketl”, niman okipitso noso okitenkua ipan ixayak. Jesús okijli: “Judas, ¿ijkin tinechtemaka?”.

Jesús onotelkets imixpan nochimej niman okintlajtolti akin ompa nemiyaj: “¿Akinon nenkitejtemouaj?”. Yejuamej okijtokej: “Jesús akin ualeua Nazaret”. Jesús okinnankili: “Nejua niJesús”. Yejuamej otsinkiskej niman hasta iuetsiyaj. Oksejpa Jesús okintlajtolti: “¿Akinon nenkitejtemouaj?”. Oksejpa okijtokej: “Jesús akin ualeua Nazaret”. Jesús okimijli: “Nimechijlia ika nejua niJesús. Xkinkauilikan yejuin tlakamej mauiyan”.

Ijkuak Pedro okitak tlen nochiujtoya, okikixti iespada niman okinakastek Malco akin itlakeual katka ueyi teopixketl. San ika, Jesús okikitski inakas niman okipajti. Kuakon okijli Pedro: “Xkejyeua moespada. Tla ika espada titlaixnamiki, ika espada




timikis”. Soldados okajsikej Jesús niman okinsalouilijkej imauan, niman itlatitlankauan Jesús ocholojkej. Yejuamej okuikakej Jesús ixpan teopixki Anás, akin opeuj kiyolkuitia niman okuikak ichan ueyi teopixketl Caifás. San ika ¿tlenon inpan onochiuj itlatitlankauan?

Tlajtoltlistin: ¿Tlenon opanok ipan Getsemaní?
¿Tlenon tiuelij itech tlen Jesús okichiuj ipan yejon yeuajli?

Mateo 26:36-57; Marcos 14:32-50;
Lucas 22:39-54; Juan 18:1-14, 19-24.

“Ipan in tlaltikpaktli nentlajyouskej, pero xpiakan yolchikaualistli pampa nejua yoniktlan nochi kech onka niman nemij ipan yejuin tlaltikpaktli” (Juan 16:33).



89 Pedro okijto ika xkixmatiya Jesús

Ijkuak Jesús ok nemiya iuan itlatitlankauan ijtik cuarto, yejua okimijli: “Yejuin yeuajli, nemochimej ninechtalalkauskej”. Pedro okijli: “Maski oksekimej mitstlalkauskej, ¡nejua xkeman nikchluas!”. San ika, Jesús okinankili Pedro: “Ijkuak xitsajtsi se kaxtil, yexpa tikijtos ika xtinechixmati”.

Ijkuak soldados okuikakej Jesús ichan Caifás, miyekej itlatitlankauan yocholojkaj. San ika, ome okitokakej. Pedro teuan oyaj. Yejua okalak ikiyauatenko ichan Caifás niman okinisiui tlitl, ompa onototonito. Se siuatlakeuajli okitak Pedro niman okixmat, kuakon okijli: “¡Nimitsixmati! ¡Tejua tinemiya iuan Jesús!”.

“Ye uajlau on tonajli [...] ijkuak nemejuamej nemoxexeloskej. Cada se yas sa kanika niman noselti nennechkauaskej. Pero xnoselti ninemis pampa noTajtsin nouan nemis” (Juan 16:32).

Pedro okijto: “¡Ka, xiuan ninemiya! ¡Xnikmati tlenon tikijtotika!”. Yejua oyaj kampa puerta. Kuakon okse siuatlakeuajli okitak niman okimijli nochimej akin ompa nemiyaj: “¡Yejuin tlakatl nemiya iuan Jesús!”. Pedro okijto: “Nion xnikixmati Jesús”. Se tlakatl okijto: “¡Tejua semej itech yejuamej! Pampa ken titlajtoua kakisti ika tiualeua Galilea, ijkon ken Jesús”. San ika, Pedro okijto: “¡Yemelak ika xnikixmati!”.

Ijkuakon, se kaxtil otsajtsik. Pedro okitak ika Jesús konitstoya. Yejua okilnamik tlen okijto. Kuakon okis kiyauak niman melak ochokak.

Ipan ichan Caifás onosentlalijkej akin teuan nopouayaj itech Sanedrín. Yejuamej yokijtokaj ika kimiktiskej Jesús niman kitejtemojtoyaj kenon kimiktiskej. San ika, xkinextiyaj kenon kichluaskej. Sakin Caifás okitlajtolti Jesús: “¿TiiKoneuj toTajtsin?”. Jesús okijto: “Kema”. Caifás okijto: “Xnoneki okseki tijkakiskej. ¡Yokiuijuikalti toTajtsin!”. Yejuamej okijtokej: “Yejuin tlakatl kinamiki mamiki”. Yejuamej okixayakauijuitejkej, okixayakachijchakej,

okintlapachouilijkej ixtololojuan, okiuisojkej niman okijlikej:
“Tla melauak titeotlajtokerl, ¡xtechijli akinon omitsuisok!”.

Ijkuak otlanes, okuikakej Jesús kampa nosentlaliaya Sanedrín niman oksejpa okitlajtoitijkej: “¿Tejua tiiKoneuj toTajtsin?”. Jesús okinnankili: “Kema. Ijkon ken nemejuamej nenkijtokej”. Kuakon okitlajtlakoltijkej ika yokiujuikaltijka toTajtsin niman okuikakej kampa tekiuaj romano Poncio Pilato. ¿Tlenon ipan onochiuj? Matikitakan.

Tlajtoltilistin: ¿Tlenon opanok ichan Caifás?

¿Tleka tlayekankej okijtokej ika kinamikiya mamiki Jesús?

Mateo 26:31-35, 57-27:2; Marcos 14:27-31, 53-15:1; Lucas 22:55-71;

Juan 13:36-38; 18:15-18, 25-28.



90 **Jesús omik kampa *Gólgota***

Teopixkej okuikakej Jesús ixpan tekiuaj. Pilato okintlajtolli: “¿Tlenon yokichiu yejua ika nenkiteixpantia yejuin tlakatl?”. Yeuamej okijtokej: “¡Yejua kijtousa ika se tekiuaj!”. Pilato okitlajtolli Jesús: “¿Titekiuaj itech judíos?”. Jesús okinankili: “NoTekiuajyo xonka ipan yejuin tlaltikpaktli”.

Kuakon Pilato okititlan Jesús ixpan Herodes, tekiuaj itech Galilea, niman ijkon makita tla itlaj onka tlen ika kiteixpantiskej. Herodes xtlaj okinextili Jesús tlen xkuajli, kuakon oksejpa okikuep ixpan Pilato. Kuakon Pilato okijli kalpan: “Najua nion Herodes xtlaj otiknextilijkej tlen ika manotlajtlakolmaka. Nikmakauas yejuin tlakatl”. Yeuamej otsajtsikej: “¡Xmikti! ¡Xmikti!”. Soldados okiuijuitejkej Jesús, okixayakachijchakej niman okiuisojkej. Okimaniltijkej se corona tlachichiuajtli ika uitstli niman kipipinaujtiayaj ika yejuin tlajtolli: “Kuajli xnemi, intekiuaj judíos”. Pilato oksejpa okimijli: “Xtlaj niknextilia yejuin tlakatl tlen ika manotlajtlakolmaka”. San ika, yeuamej tsajtsiyaj: “¡Xpilokan ipan kojtl melaktik!”. Kuakon Pilato okitemaktli Jesús makimiktikan.

Soldados okuikakej Jesús kampa itoka katka *Gólgota*, okitetsotsonkej ipan kojtl melaktik niman ompa okipilojkej. Jesús okichiu se teoyotl niman okijto: “NoTajtsin, xkintlapopolui, pampa xkimatij tlen kichiuaj”. Miyekej kipipinaujtiayaj niman kijliayaj: “Tla tiiKoneuj toTajtsin, ¡xuaitemo itech yejon kojtl! Sa no tejuaxmomakixti”.

Se akin pilkatoya inakastlan, okijli: “Xnechilnamiki ijkuak tiTekiuaj yes”. Jesús okijli: “Nouan tinemis Xochitlapan”. Ika teotlak, otlayouatiak yeyi hora ipan nochi tlaltikpaktli. Sekimej inomachtijkauan Jesús niman inan, María, onokaujkej nisiuj kojtl melaktik. Jesús okijli Juan makitlajpiya María ken inan yeskia.

Sakin, Jesús okijto: “¡Yonochiuaj!”. Yejua san ouajnotsonpilo niman omik. Kuakon melak chikauak otlalolin. Ipan teopan, cortina tlen kixelouaya Santo itech Santísimo otlajkotsayan. Se akin kinyekanaya

soldados okijto: “Melauak katka iKoneuj toTajtsin”.

Tlajtoltlistin: ¿Tleka okitekauili Pilato makimiktikan Jesús? ¿Kenon okiteititi Jesús ika melak notekipachouaya ipampa oksekimej?

Mateo 27:11-14, 22-31, 38-56; Marcos 15:2-5, 12-18, 25, 29-33, 37-39; Lucas 23:1-25, 32-49; Juan 18:28-19:30.

“Cristo, tej, okintenxijtj nochi ipromesas Dios. Yejua ika ipampa Cristo tikijtouaj: ‘Ma ijki nochiua’” (2 Corintios 1:20).



91 **Jesús oyoliuj**

Sakin ijkuak Jesús yomik, se tlakatl akin kipiaya miyek tomin, itoka katka José, okitlajtlanili Pilato makikauili kitemoltis itlalnakayo Jesús itech kojtl melaktik. José okitejkuix itlalnakayo Jesús ika tlakentli itoka lino niman okitlalili tlen ajuiyak. Sakin okitlali ipan se teostotl tlen xakaj kikuiya niman otlanauati makitsakuakan ika se ueyi tetl. Teopixkej okijlikej Pilato: “Tikmakasij tla inomachtijkauan konkixtiskej itlalnakayo niman kijtoskej ika yejua yoyoliuj”. Kuakon Pilato okimijli: “Kuajli xtsakuakan itenko teostotl niman xtlajpilikan”.

Sakin ijkuak yopanoka yeyi tonajli, san ika kualkan, sekimej siamej oyajkej kampa teostotl niman okitakej ika tetl tlen ika tsauktoya yokeykuanikaj. Tlajtik nemiya se iluikaktekitketl, akin okimijli: “Maka xmomojtikan. Jesús yoyoliuj, xkimijlitij inomachtijkauan makinamikitij Galilea”.

María Magdalena oyaj nimantsin okintejetemoto Pedro niman Juan. Okimijli: “Yakaj okixixti itlalnakayo Jesús”. Pedro niman Juan onotlalojkej kampa teostotl. Ijkuak okitakej ika xompa onkatka itlalnakayo Jesús, onokuepej inchan.

Ijkuak María onokuep kampa teostotl, ompa okimitak tlajitik omemej iluikaktekitkej niman okimijli: “Xnikmati kanon okikauatoj noTeko”. Kuakon okitak se tlakatl niman okinemili ika katka akin ompa tlajpiaya, yejua okijli: “Nimitstlajtlanilia xnechijli kanon otijkauato”. San ika, ijkuak tlakatl okijli: “¡María!”, yejua okimat ika katka Jesús. Yejua okijto: “¡Tlamachtijket!”, niman okinapalo. Jesús okijli: “Xuiya xkimijliti nokniuan ika yotinechitak”. María nimantsin oyaj okimijlito inomachtijkauan Cristo ika yejua yokitaka Jesús.

Yejon tonajli ika teotlak, omemej inomachtijkauan Cristo oualeujkej Jerusalén niman yayaj Emaús. Se tlakatl opeuj imiuan nejnemi niman okintlajtolti itech tlenon tlajtouayaj. Yejuamej okijlikej: “¿Xtiktekakilia? Ikipiya yeyi tonajli ika teopixkej otlanauatijkej makimiktikan Jesús. Niman aman sekimej siamej kijtotinemij ika

yoyoliuj”. Tlakatl okintlajtolti: “¿Xnenkineltokaj teotlajtokej? Yejuamej okijtokej ika Cristo mikiskia niman sakin yoliuiskia”. Yejua okintomilijtia iTlajtol toTajtsin. Ijkuak oajsikej Emaús, inomachtijkauan Cristo okitlajtlanilijkej tlakatl imiuan manokaua. Ijkuak itlakuaskiaj niman tlakatl okichiuaj teoyotl ipampa tlakuajli, kuakon okitakej ika katka Jesús. Kuakon yejua opopoliuj.

Yejuin omemej inomachtijkauan Cristo onotlalojtikiskej Jerusalén kampa tlatitlankej nosentlaliytoyaj niman okimijlikej tlen inpan onochiuika. Ijkuak nemiyaj kalijtik, Jesús ouajnonexti. Kachtopa tlatitlankej xueliyaj kineltokayaj ika katka Jesús. Yejua okimijli: “Xkimitakan nomauan, xnechkitskikan. Ijkuiliujtika ika Cristo yoliuiskia”.

Tlajtoltilistin: ¿Tlenon opanok ijkuak sekimej siuamej oyajkej teostotl kampa nemiya Jesús? ¿Tlenon opanok ijkuak inomachtijkauan Cristo yayaj Emaús?

Mateo 27:57-28:10; Marcos 15:42-16:8; Lucas 23:50-24:43; Juan 19:38-20:23.

“Nejua niojtli, niman nitlin melauak, niman no ninemilistli. Tej, san nejua notechkopa uelis ajsiskej ne itech on Tajtli” (Juan 14:6).



92 Jesús ouajnonexti imixpan michtlamajkej

Sakin ijkuak Jesús ouajnonexti imixpan itlatitlankauan, Pedro omichtlatlamato ipan mar tlen onka Galilea. Tomás, Santiago, Juan niman oksekimej inomachtijkauan Jesús iuan oyajkej. Nochi yeuajli omichtlatlamajkej, san ika, xtlaj okajsikej.

Uajmostla ika kualkan, yejuamej okitakej se tlakatl akin ijkatoya itenko mar. Yejua okimintlajtolti: “¿Onenkajsijkej michin?”. Yejuamej okijlikej: “¡Ka!”. Tlakatl okimijli: “Xkonchapanikan nemomatlauj iyekmakopa barco”. Ijkuak ijkon okichiujkej, inmatlauj melak oten ika michimej niman xueliyaj kitlejkoltiayaj ipan barco. Juan okimat ika yejon tlakatl katka Jesús niman okijto: “¡Yejua toTeko!”. Pedro nimantsin onatlajkal niman oapanotia hasta kampa nemiya Jesús. Oksekimej okitokakej ipan barco.

Ijkuak oajsikej itenko mar, okitakej michin onkatka ipan tlitl. Ompa noijki onkatka pan. Jesús okimijli makitkikan seki michimej tlen yokajsikaj. Yejua okimijli: “Xuajlakan, xtlakuakij”.





“Jesús okimijlij: ‘Nemejuamej nenkintejetemouaj michimej. Pero aman xuajuiyan nouan niman nenkintejetemoskej tlakamej para nenkinuikaskej itech Dios’. Yejuamej nimantsin okajkej inmatl niman iuan oyajkej” (Mateo 4:19, 20).

Ijkuak yotlakuajkej, Jesús okitlajtolti Pedro: “¿Melak tinechtlasojtla xijkon ken tikintlasojtla yejuin michimej?”. Pedro okinankili: “Kema, noTeko, tejua tikmatstika”. Jesús okijli: “Kuakon, xkintlakualti noborreguitos”. Jesús oksejpa okitlajtolti: “Pedro, ¿tinechtlasojtla?”. Pedro okinankili: “NoTeko, tejua tikmatstika ika kema”. Jesús okijto: “Xkintlajpiya noborreguitos”. Jesús okitlajtolti ika yexpa. Pedro melak onoyolkoko. Yejua okijli: “NoTeko, tejua nochi tikmatstok. Tikmatstika ika nimitstlasojtla”. Jesús okijli: “Xkintlakualti noborreguitos”. Sakin okijli: “Nochipa nouan xnemi”.

Tlajtoltlistin: ¿Katlejua milagro okichiuj Jesús inpampa inomachtijkauan? Jesús okitlajtolti yexpa Pedro tla melak kitlasojtlaya, ¿tleka tiknemilia ika ijkon okichiuj?

Juan 21:1-19, 25; Hechos 1:1-3.

93 **Jesús oksejpa onokuep iluikak**

Jesús iuan inomachtijkauan onosentlaliijkej Galilea. Okinmakak se ueyi tlanauatijli: “Xuiyan niman xkinmachtikan tlaltikpakchanejkej ipan nochi kalpamej. Xkinmachtikan tlen onimechmacthi niman xkinapolaktikan”. Niman okimijli: “Xkilnamikikan, nochipa nemouan ninemis”.

Ipan yejon 40 tonajli, sakín ijkuak Jesús oyoliuj, ouajnonexti imixpan miyekej inomachtijkauan ipan Galilea niman Jerusalén. Okinmacthi tlen melak nonekiya makimatikan, niman okichiuuj miyek milagros. Ipan itlamiyan yejon 40 tonajli, sa iyeka onosentlali imiuan itlatitlankauan ipan tepetl itoka Olivos. Jesús okimijlika: “Xnemikan Jerusalén. Xchiatokan tlen Jehová yokijto mechmakas”.

Itlatitlankauan Cristo, xokasikamatkej tlen kimijlitoya. Yejuamej okitlajtoltijkej: “¿Ititekiuajtis ipan Israel?”. Jesús okijto: “Ok xajsi tonajli ijkuak toTajtsin kijtos niTekiuaj yes. Sa achijtsin poliui ika nenkiseliskej espíritu santo niman nennoteixpantijkauan yeskej. Xtenojnotsatij Jerusalén, Judea, Samaria niman nochiiuyan ipan tlaltikpaktli”.

Kuakon, Jesús oyaj iluikak niman se moxtli okitlapacho. Inomachtijkauan sa ajkotlachixtoyaj, sakín yejua opopoluij.

Inomachtijkauan Jesús onokuepkej Jerusalén. Ipan se kajli, yejuamej nochipa nosentlaliayaj niman kichiuayaj teoyotl. Kichiyaj ika Jesús makimijli okseki tlen kichiuaskiaj.

Tlajtoltlistin: ¿Katlajua tlanauatijli okinmakak Jesús inomachtijkauan?
¿Tlenon opanok ipan tepetl itoka Olivos?

Mateo 28:16-20; Lucas 24:49-53; Juan 20:30, 31; Hechos 1:2-14; 1 Corintios 15:3-6.

**“Yejuin kuajli tlajtoltin itech Tekiuajyotl notenojnotsas ipan nochi tlaltikpaktli niman ijkon nochimej kalpamej makimatikan, niman kuakon tlapopoluiis ipan yejuin tlaltikpaktli”
(Mateo 24:14, *TNM*).**





14


Akin kachtopa kichiuayaj ken Cristo otenojnotskej kuajli tlajtoltin itech Tekiuajyotl ipan nochi tlatlalkaktli. Jesús okimititi kanon tenojnotsaskiaj, niman melak temojkatlachialti kenon okinpaleui matemachtikan ika miyekej tlajtoltin. Jehová okinmakak yolchikaualistli niman kojtilistli, ijkon ueliskiaj kixikoskiaj ijkuak kintlaueltokaskiaj.

Jesús okichiuaj ika Juan, itlatitlankauj, makita ipan se tlatlachalistli iueyilis Jehová. Ipan okse tlatlachalistli, Juan okitak kenon Tekiuajyotl tlen onka iluikak okitlan Satanás niman nochi tlen kiyekana. Juan okitak Jesús ken se Tekiuaj, niman iuan tlayekanayaj 144,000. Noijki okitak ika tlatlalkaktli nokuepa se kualtsin xochitlalpan kampa nochimej kiueyichiuaj Jehová san sekan niman ika yolseuulistli.



TLAMACHTILTIN TLEN NONEKI XMATI

- Ijkuak tikchiuaj tekiti tlen Jehová yotechmakak, tikchiuaj makiseli ueyilistli.
- Matosentemakakan itech Jehová niman matikteititikan ika tiknekij matechyekana iTekiuajyo.
- Kuajli matouikakan iuan Jehová.



94 Inomachtijkauan Cristo okiselijkej espíritu santo

Ijkuak yopanoka majtlaktli tonajli ika Jesús onokuep iluikak, inomachtijkauan okiselijkej espíritu santo. Ipan Pentecostés xiuitl 33, miyekej akin oksekan ualeuayaj onosentlalijkej Jerusalén oiluipanotoj. Ipan se kajli onosentlalijkej kanaj 120 inomachtijkauan Jesús. Kuakon, opanok itlaj tlen melak temojkatlachialti. Itlaj tlen nesiya kentla se tli tl ouajnonexti inkuatipan sesentetl inomachtijkauj Cristo, niman nochimej opeuj tlajtouaj ika miyekej tlajtol tin. Niman ipan kajli, okakistik kentla se chikauak ajakatl.

Akin oksekan ualeuayaj niman oyajkaj Jerusalén, okikakej tlen okakistik niman onotlalojkej okitatoj tlenon opanok ipan kajli. Melak otlamojkaitakej ijkuak okinkakej inomachtijkauan Cristo tlajtojtouaj ika miyek tlajtol tin. Yejuamej kijtouayaj: “¿Kenijki tlajtouaj ika totlajtol ijkuak yejuamej ualeuaj Galilea?”.

Kuakon Pedro niman oksekimej tlatitlankej onotelketskej imixpan nochimej. Pedro okimijli akin ompa nemiyaj kenon okimiktijkej Jesús niman kenon Jehová okiyoliti. Yejua okijto: “Aman Jesús nemi iluikak



iyekmakopa toTajtsin niman yotechmakak espíritu santo tlen otechijli techmakas. Yejua ika yonenkitakej niman yonenkikakej yejuin milagros”.

Itlajtluan Pedro oajsik ipan inyojlo tlaltikpakchanejkej. Yequamej okitlajtoitijkej: “¿Tlenon noneki tikchiaskej?”. Pedro okimijli: “Xmoyolkuepakan itech nemotlajtlakoluan niman xmoapolaktikan ika itokayo Jesús. Noijki nenkiseliskej ken tetlayokolijli espíritu santo”. Ipan yejon tonajli, kanaj 3,000 onoapolaktijkej. Yejon tonajli ika tlayekapan opeujkej miyekiyaj inomachtijkauan Cristo ipan Jerusalén. Pampa kipiayaj espíritu santo, tlatitlankej opeujkej tlapaleuiyaj manochijchiuakan tlanechikoltin. Ijkon yejuamej ueliskiaj kinmachtiskej inomachtijkauan Cristo nochi tlen yejua yokinnauatijka.

Tlajtoltilistin: ¿Tlenon opanok ipan Pentecostés xiuitl 33?
¿Tleka melak miyekej onoapolaktijkej?

Hechos 1:15; 2:1-42; 4:4; Juan 15:26.

“Tla ikan mokamak tikijtos ika Jesús yejua moTeko, niman tla ipan moyojlo tikneltokas ika Dios okiyoliuitij niman oketsteu ipan itlalkon, timakisas” (Romanos 10:9).


95 Xtlaj okintelti

Se tomintlajtlanketl akin xueliya nejnemiya, mojmotla notlaliaya ikalakiayan teopan. Se teotlak, okitak ika Pedro niman Juan kalakiyaj teopan. Yejua okimijili: “Nimechtlajtlanilia, itlaj xnechtlayokolikan”. Pedro okijili: “Nimitsmakas itlaj tlen melak ueyi kijtosneki xijkon ken tomin. Ika itokayo Jesús nimitsijlia, ¡xmotelketsa niman xnejnemi!”. Kuakon Pedro okipaleui manokuiteua, ¡niman tlakatl opeuj nejnemi! Tlaltikpakchanejkej melak opajkej ijkuak okitakej yejuin milagro niman miyekej otlaneltokakej.

San ika, teopixkej niman saduceos melak okualankej. Yejuamej okinmasikej tlatitlankej, okinuikakej Sanedrín kampa kintlajtlakolmakaskiaj niman okintlajtoltijkej: “¿Akinon omechmakak kojtilistli ika xpajtikan yejuin tlakatl?”. Pedro okijto: “Tikseliaj kojtilistli itech Cristo Jesús akin onenkimiktijkej”. Tlayekankej ipan tlaneltokijli otsajtsikej: “Maka sa xtlajtokan itech Jesús”. San ika, tlatitlankej okijtokej: “Kipiya ika titlajtoskej itechkopa. Xuelis toteltiskej”.

Ijkuak Pedro niman Juan okinmakaujkej, nimantsin oyajkej kampa oksekimej inomachtijkauan Cristo niman okimijlitoj tlen opanok. San sekan, okitlajtlanilijkej Jehová ipan teoyotl: “Timitstlajtlaniliaj, xtechpaleui matiyolchikaujkej ijkon xtikajkauaskej motekiyo”. Jehová okinmakak espíritu santo niman ijkon xokikajkaujkej ika tenojnotsaj niman ika tepajtiaj. Melak miyekej opeujkej tlaneltokaj. Saduceos melak kinnexikolitayaj tlatitlankej, ika yejon okinmasikej niman okintsajkej. Ika tlayoua, Jehová okititlan iilukaktekitkauj akin okintlapo puertas kampa tsauktoyaj niman okimijli tlatitlankej: “Xmokuupakan teopan niman ompa xtemachtikan”.

Uajmostla ipan Sanedrín, kampa nemiya akin tlayekanayaj ipan tlaneltokijli, yakaj okimijlito: “Cárcel san ken tsauktika, san ika ¡akin ompa onenkintsaujkaj xok ompa nemij! Nemij teopan, kinmachtijtokej tlaltikpakchanejkej”.



**“Kimelaua tiktlakamatiskej
achtoj Dios xken
nemejuamej yejuan
san nentlakamej”
(Hechos 5:29).**

Kuakon oksejpa okinmasikej niman okinuikakej kampa Sanedrín. Ueyi teopixketl okimijli: “Otimechnauatijkej maka xtlajtokan itech Jesús”.

San ika, Pedro otlanankili: “Kimelaua tiktlakamatiskej kachtopa toTajtsin xken nemejuamej akin san nentlakamej”.

Tlayekankej ipan tlaneltokijli melak kualantoyaj niman kinekiyaj kinmiktiskej. San ika, se fariseo itoka katka Gamaliel onotelkets niman okijto: “¡Xmotlajpiyakan! Kanaj toTajtsin nemi imiuan yejuin tlakamej. ¿Yemelak nenkinekij nenkixnamikiskej toTajtsin?”. Yejuamej okikakej. Sakin ijkuak yokintlakouijkej tlatitlankej, oksejpa okinnauatijkej maka sa matenojnotsakan niman okinmakaujkej. San ika, yejon xokintelti. Yejuamej ok tenojnotstoyaj ipan teopan niman techajchan.

Tlajtoltlistin: ¿Tleka inomachtijkauan Jesús xokikajkaujkej ika tenojnotsaj? ¿Kenon okinpaleui Jehová?

Hechos 3:1-4:31; 5:12-42.



96 **Jesús okitlapejpeni Saulo**

Saulo katka se romano akin otlakat Tarso. Yejua katka se fariseo akin kuajli kixmatiya intlanauatiluan judíos. Pampa kintlauelitaya akin kichiuayaj ken Cristo kinuajkixtiaya inchan, kintechiuilanaya niman komintsakuaya. Yejua teuan ompa konitstoya kenon kimiktiayaj Esteban, inomachtijkauj Cristo, ijkuak okitemojmotlakej.

San ika, Saulo xsan kinekiya kintsakuas akin chantiyaj Jerusalén. Yejua okitlajtlanili ueyi teopixketl makititlani ueyikalpan Damasco niman ompa noijki kintlaueitokas akin kichiuaj ken Cristo. Ijkuak Saulo iajsitoya ueyikalpan, se tlauijli okiyeualo niman yejua ouets ipan tlajli. Kuakon okikak se tlajtojli: “Saulo, ¿tleka tinechtlaueitoka?”. Saulo okitlajtolli: “¿Akinon tejua?”. Tlajtojli okijli: “Neyua niJesús. Xuiya Damasco niman tikmatis tlen noneki tikchiuas”. Nimantsin, Saulo okipolo itlachialis niman sa okimatilantiajkej ijkon okaxiltijkej ueyikalpan.

Ipan Damasco nemiya se tlakatl itoka katka Ananías, yejua katka se kuajli inomachtijkauj Cristo. Jesús okinots ipan se tlatlachalistli: “Xuiya ichan Judas ipan se ojtli itoka Melajki, niman xtejtemo Saulo”. Ananías okijto: “¡NoTeko, melak miyek yoniktekekili itech yejon tlakatl! ¡Yejua akin kintsauktika nochi monomachtijkauan!”. San ika, Jesús okijli: “Xuiya itech. Yoniktapejpeni Saulo ijkon makiteijli kuajli tlajtoltin miyekan ipan tlatikpaktli”.

Ijkuak Ananías okinexti Saulo, okijli: “Saulo, nokniuj, Jesús yonechajtitlan manikinpajti mixtololojuan”. Nimantsin Saulo oksejpa ouel otlachix. Yejua onomachtitl itech Jesús niman onochiuj inomachtijkauj. Ijkuak onoapolakti, Saulo opeuj tenojnotsa ipan sinagogas imiuan



“Cristo Jesús ouajlaj ipan in tlaltikpaktli para okinmakixtiko tlajtlakolejkej. Nejua, tej, más niueyi nitlajtlakolej xken nochimej tlajtlakolejkej” (1 Timoteo 1:15).

oksekimej akin kichiuayaj ken Cristo. ¿Tiknemilia kenon melak otlamojkaitakej judíos ijkuak okitakej ika Saulo tenojnotstinemiya itechkopa Jesús? Judíos kijtougayaj: “¿Xkatka yejuin tlakatl akin kintlaueitokatinemiya inomachtijkauan Jesús?”.

Yeji xiuitl Saulo otenojnots Damasco. Judíos okitlaueilitakej niman okinemilijkej kimiktiskej. San ika, sekimej akin kichiuayaj ken Cristo, okimatkej niman okipaleuijkej macholo. Yejuamej ipan se ueyi chikijtli okontemoltijkej kampa koyonki katka itepan ueyikalpan.

Ijkuak Saulo oyaj Jerusalén, okiyejyeko nosentlalis imiuan akin kichiuayaj ken Cristo. San ika, melak kimakasiyaj. Kuakon Bernabé, se inomachtijkauj Cristo akin yolkuajli katka, okuikak kampa tlatitlankej niman okimijli ika Saulo yemelak yonopatlaka. Saulo opeuj imiuan tenojnotsa ika pakilistli ipan Jerusalén. Sakin yejua okixmatkej ken Pablo.

Tlajtoltlistin: ¿Tleka inomachtijkauan Cristo kimakasiyaj Saulo? ¿Tleka Saulo okipatlak inemilis?

Hechos 7:54-8:3; 9:1-28; 13:9; 21:40-22:15; Romanos 1:1; Gálatas 1:11-18.



97 **Cornelio okiseli espíritu santo**

Ipan ueyikalpan Cesarea, nemiya se tlakatl akin kinyekanaya soldados romanos itoka katka Cornelio. Maski xjudío katka, judíos kitlakaitayaj. Yejua kuelitaya kinpaleuis akin xtlaj kipiayaj. Cornelio tlaneltokaya itech Jehová niman nochipa kichiuliaya teoyotl. Se tonajli, se iluikaktekitketl ixpan ouajnonexti niman okijli: “ToTajtsin yokikak moteoyouan. Aman xkintitlani tlakamej mauian kalpan itoka Jope makijlitij Pedro mauajla motech”. Cornelio nimantsin okomintitlan Jope yeyimej itlakeualuan, maski nokauaya kanaj 50 kilómetros (30 millas) ika uejka.

Pedro, akin nemiya Jope, okipix se tlatlachalistli. Yejua okitak yolcamej tlen judíos xkinkauiliayaj makikuakan. Sakin okikak se tlajtojli tlen okijli makinkua. Pedro xokinek niman okijto: “Najua xkeman nijkua se yolki tlen xchipauak”. Yejon tlajtojli okijli: “Maka xkijto ika yejuin yolcamej xchipaujkej. ToTajtsin yokichiu machipaujkej”. Noijki okijli: “Nemij yeyimej tlakamej mokiyaatenpan. Imiuan xuiya”. Pedro oyaj kampa puerta niman okintlajtolti tleka kitejtemouayaj. Yejuamej okijlikej: “Otechuajtitan Cornelio, se tlakatl



“Kiselia san katlejua tlakatl yejuan kitlakaita niman kuajli kichiuwa maski ualeua san katleua país” (Hechos 10:35).

akin kinyekana soldados romanos. Kineki touan xuiya ichan ipan Cesarea”. Pedro okimijli manokauakan yejon yeuajli. Uajmostla imiuan oyaj Cesarea, noijki sekimej akin kichiuayaj ken Cristo, chanejkej Jope, oyajkej.

Ijkuak Cornelio okitak Pedro, onotlakuankets ixpan. San ika, Pedro okijli: “¡Xmotelketsa! Nejua noijki san nitlakatl ken tejua. ToTajtsin onechijli maniuajla mochan, maski judíos xkalakij inchan akin xjudíos. Aman nimitstlajtlanilia xnechijli tleka otinechtlatitlanili”.

Cornelio okijli Pedro: “Ikpiya naui tonajli, nejua niknotstoya toTajtsin ipan teoyotl niman se iiluikaktekitkauj onechijli manimitstlatitlanili. Timitstlajtlaniliaj xtechmacti itech Jehová”. Pedro okijli: “Aman kuajli yonikmat ika toTajtsin xtechikoita. Yejua kiselia san akinon kineki kiueyichiuas”. Pedro okinmacti miyek tlemach itechkopa Jesús. Kuakon Cornelio niman akin ompa nemiayaj okiselijkej espíritu santo niman onoapolaktijkej.

Tlajtohtilistin: ¿Tleka Pedro xokinek kikuas yolkamej tlen xchipaujkej?
¿Tleka Jehová okijli Pedro mauiya ichan se akin xjudío katka?

Hechos 10:1-48.





98 Nomiyekiliaj akin kichiuaj ken Cristo

Tlatitlankej okitlakamatkej itlanauatil Jesús ika tenojnotsaskiaj kuajli tlajtoltin ipan nochi tlatikpaktli. Ipan xiuitl 47, toknluan chanejkej Antioquía okintitlankej Pablo iuan Bernabé matenojnotsatij ipan okseki kalpamej. Yejuamej otenojnotskej ika miyek chikaualistli. Oyajkej ipan miyek kalpamej tlen nokauaj Asia Menor ken Derbe, Listra niman Iconio.

Pablo iuan Bernabé nochimej kinnojnotsayaj: akin kipiayaj miyek tomin niman akin xtlaj kipiayaj, akin telpokamej niman akin iuejueyimej. Mijekej okiselijkej tlen melauak itech Cristo. Ijkuak Pablo iuan Bernabé kinojnotstoyaj Sergio Paulo, tekiauaj itech Chipre, se akin kichiuaya naualyotl okiyejyeko kinteltis. Pablo okijli tlakatl: “Jehová mitsixnamiki”. Nimantsin, yejua okipolo itlachialis. Ijkuak Sergio Paulo okitak yejuin, opeuj tlaneltoka.

Pablo iuan Bernabé nochuiyan tenojnotsayaj: techajchan, kampa tlanemakalo, ipan ojtli niman ipan sinagogas. Ijkuak nemiyaj Listra, okipajtikej se tlakatl akin xueliya nejnemiya. Akin okitakej yejon milagro, okinemilijkej ika yejuamej katkaj tajtsitsintin niman okiyejyekoijkej kinueyichiuaskej. San ika, Pablo iuan Bernabé okinteltijkej niman okimijlikej: “¡San xkueyichiuakan toTajtsin! Tejuamej san titlakamej”. Kuakon sekimej judíos okichiuajkej ika akin ompa chantij makitlauelitakan Pablo. Kuakon okitemojmotlakej, okitechiuilankej niman okikixtijkej itech ueyikalpan pampa kinemiliayaj ika yomijka. San ika ¡Pablo yoltoya! Nimantsin toknluan oyajkej okipaleuitoj niman oksejpa okuikakej kampa ueyikalpan. Sakin Pablo onokuep Antioquía.

Ipan xiuitl 49, Pablo oksekan oyaj otenojnotsato. Sakin ijkuak onokuep okimitato toknluan itech Asia Menor, oyaj otenojnotsato kuajli

“Xuiyan imanyan nochi on tlaltikpaktli, niman xkinmachtikan nochimej on tlakamej para yejuamej no nonomachtijkauan yeskej” (Mateo 28:19).

tlajtoltin hasta Europa. Yejua oyaj Atenas, Éfeso, Filipos, Tesalónica niman oksekan. Silas, Lucas niman se telpochtli itoka katka Timoteo iuan oyajkej. San sekan otekitkej niman ijkon otlapaleuijkej manochijchiuakan tlanechikoltin niman machikaujtokan ipan intlaneltokil. Pablo onokauj kalpan Corinto se xiuitl uan tlajko, ijkon okinyolchikauj tokniuán. Yejua tenojnotsaya, temachtiaya niman kintlajkuilouliaya tlanechikoltin. Noijki tekitiya: kinchijchiuaya tlen ika nokajkaltiyaj. Sakin, Pablo oksejpa onokuep Antioquía.

Sakin ipan xiuitl 52, Pablo ika yexpa oyaj oksekan otenojnotsato. Yejua opeuj Asia Menor niman oyaj tlakpakopa, oajsik hasta Filipos niman sakin otemok Corinto. Pablo ouejkauj seki xiuitl ipan Éfeso ompa temachtiaya, tepajtiaya niman kipaleuiaya tlanechikojli. Yejua noijki kinmachtia ya miyekej ipan se kaltlamachtijli. Melak miyekej okikakej niman okipatlakej tlen kichiuayaj. Ijkuak Pablo miyekan yotenojnotska kuajli tlajtoltin, oksejpa onokuep Jerusalén.

Tlajtoltilistin: ¿Uelis tikitas ipan mapa tlen kipiya moBiblia kampa Pablo otenojnotsato?
Hechos 13:1-23:35.



99 Se tlajpiketl itech cárcel kimachtiaj tlen melauak

Ipan ueyikalpan Filipos nemiya se ichpochtli siuatlakeuajli akin kipiaya se xkuajli espíritu. Yejuin xkuajli espíritu kichiuaya ika ichpochtli makimati tlen panoskia ika tlayekapan niman itekouan kitlaniyaj melak miyek tomin itechkopa. Ijkuak Pablo niman Silas oajsikej Filipos, ichpochtli kintokatinemiya miyek tonajli. Xkuajli espíritu kichiuaya matsajtsi: “¡Yejuin tlakamej itekipanojkauan toTajtsin Akin ueyixtika!”. Sakin, Pablo okijli xkuajli espíritu: “Ika itokayo Jesús, nimitsnauatia xkisa itech ichpochtli”. Niman xkuajli espíritu okis.

Ijkuak itekouan ichpochtli okitakej ika xok ueliskiaj kitlaniskej tomin itechkopa, melak okualankej. Yejuamej okintechiulantiajkej Pablo niman Silas kampa tekiauajkej niman okimijlikej: “Yejuin tlakamej xkitlakamatstokej tlanauatijli niman kajmantinemij tokalpan”. Tekiauajkej otlanauatijkej makinuijutekikan Pablo niman Silas niman makintsakuakan. Tlajpiketl itech cárcel okinuikak tlaxomolko, kampa melak tlayouatikak. Noijki okintlalili imauan niman imikxiuan ipan cepo.

Pablo niman Silas opeujkej kikuikatlaliliaj Jehová niman akin ompa tsauktoyaj okinkakej. Ijkuak tlajkoyeuajli, melak chikauak otlalolin hasta okiolini cárcel. Puertas otlapoujkej niman cecos iuan cadenas tlen nochimej ika masalijtoyaj opetonkej. Tlajpiketl okalak kampa tlaxomolko niman okitak ika puertas tlapojtoyaj. Pampa kinemiliaya ika nochimej akin tsauktoyaj yocholokaj, kuakon okontilan se espada niman ika nomiktiskia.

Kuakon, Pablo chikauak otsajtsik: “¡Maka itlaj xmochiuili! Tinochimej nikan tinemij”. Tlajpiketl onotlalo kampa Pablo niman Silas niman imixpan onotlakuankets. Yejua okintlajtolti: “¿Tlenon noneki nikchius niman ijkon nimakisas?”. Yejuamej okijlikej: “Tejua niman mochanejkauan noneki nenkineltokaskej Jesús”. Kuakon, Pablo niman Silas opeujkej kinmachtiaj itech Jehová, niman tlajpiketl iuan ichanejkauan onoapolaktijkej.

Tlajtoltilistin: ¿Tleka okintsajkej Pablo niman Silas? ¿Kenon okixmat tlen melauak akin kitlajpiaya cárcel?

Hechos 16:16-34.

“Mechajsiskej, niman mechtlauelitaskej niman tlahtlamach ika mechtlajyouiltiskej niman mechtlajtlakolmakaskej ne impan on tiopantin. Noijki mechtsajtsakuaskej, niman imixpan on reyes niman gobernadores mechuikaskej. Nochi yejua in nochiuas san nopampa. Ijkuak ijkon nemopan nochiuas, uelis noka nentenojnotsaskej” (Lucas 21:12, 13).



100 Pablo niman Timoteo



Timoteo katka se telpochtli akin nemiya ipan tlanechikojli Listra. Itaj griego katka niman inan judía. Eunice, inan Timoteo, niman Loida, iabuela, opeujkej kimachtiaj itech Jehová ijkuak ok konetl katka.

Ijkuak Pablo oyaj Listra ika okpa otenojnotsato, okitak ika Timoteo yemelak kintlasojtlaya toknuijan niman nochipa kinekiya kinpaleuis. Pablo okijli Timoteo iuan mauiya matenojnotsati. Ika yolik Pablo okipaleui Timoteo kuajli matemachti niman matenojnotsa kuajli tlajtoltin.

Espíritu santo kinyekanaya Pablo niman Timoteo nochuiyan kampa yayaj. Se yeuajli, ipan se tlatlachalistli, se tlakatl okijli Pablo mauiya Macedonia makinpaleuiti. Kuakon Pablo, Timoteo, Silas niman Lucas ompa otenojnotsatoj niman okinpeualtijkej tlanechikoltin.

Ipan ueyikalpan Tesalónica tlen onka Macedonia, miyekej tlakamej niman siuamej otlaneltokakej itech Cristo. San ika, sekimej judíos kinexikolitayaj Pablo niman akin iuan nouikayaj. Yejuamej okinsentlalijkej akin xkuakualtin niman okintechiuilantiajkej ixpan tekiuajkej, akin yotlaneltokakaj. Judíos tsajtsiyaj: “¡Yejuin tlakamej kixnamikij Roma!”. Pablo niman Timoteo ueliskiaj kinmiktiskiaj, yejua ika oyajkej Berea ika tlayoua.

Akin chantiyaj Berea melak kinekiyaj kikakiskej kuajli tlajtoltin, niman miyekej griegos niman judíos otlaneltokakej. San ika, ijkuak seki judíos akin oualeujkej Tesalónica okipeualtitoj tlauejli, Pablo oyaj Atenas. Timoteo niman Silas onokaujkej Berea, ijkon kinyolchikauaskiaj toknuijan. Pablo oksejpa okititlan Timoteo mauiya Tesalónica makinyolchikauati toknuijan pampa kintlaueiltokayaj.



“Xnikpia okse yejuan noijki kinemilia ken nejua, yejuan melauak notekimakas de nochi tlen kuajli para nemejuamej. Oksekimej kitejtemouaj nochi tlen kuajli san para yejuamej, niman xejua on yejuan para Cristo Jesús” (Filipenses 2:20, 21).

Sakin, Pablo okititlan Timoteo makinyolchikauati okseki tlanechikoltin.

Pablo okijli Timoteo: “Nochimej akin kinekij kitekichiuiliskej Jehová, kintlaueltokaskej”. Maski Timoteo okitlaueltokakej niman okitsajkej ipampa itlaneltokil, yejua melak pakiya pampa ijkon kiteititiaya ika yolmelaujkanemiya itech Jehová.

Pablo okimijli filipenses: “Nimechtitlanilijtika Timoteo. Yejua mehmachtis kenon noneki nemis se itekipanojkauj Jehová niman mehmachtis ipan nemotenojnotsalis”. Pablo kimatstoya ika ueliskia kineltokas Timoteo. Miyek xiuitl san sekan okitekichiuilijkej toTajtsin niman nochipa kuajli onouikakej.

Tlajtoltlistin: ¿Akinon katka Timoteo? ¿Tleka Pablo niman Timoteo kuajli nouikayaj?
Hechos 16:1-12; 17:1-15; Filipenses 2:19-22; 2 Timoteo 1:1-5; 3:12, 14, 15; Hebreos 13:23.



101 Pablo okuikakej Roma

Pablo oajsik Jerusalén, ompa otlán ika yexpa tenojnotstinemiya. Ompa okajsikej niman okitsajkej. Ika tlayoua okipix se tlatlachalistli, Jesús okijli: “Tejua kipiya ika tias Roma niman ompa titenojnotsas”. Kuakon Pablo okikixtijkej itech Jerusalén niman okuikakej Cesarea, kampa okitsajkej ome xiuitl. Ijkuak Pablo nemiya ixpan tekiuaj Festo, okijto: “Nikneki manechyolkuiti César, ipan Roma”. Festo okijli: “Tiktajtlani tias ixpan César, kuakon itech César tias”. Kuakon okitlejkoltijkej Pablo ipan se barco tlen kuikaskia Roma. Iuan oyajkej omemej tokniuan, Lucas niman Aristarco.

Ijkuak yayaj ipan mar, opeuj chikauak ajakakiyauí niman ouejkauj miyek tonajli. Nochimej okinemilijkej ika mikiskiaj. San ika, Pablo okijto: “Tlakamej, se iluikaktekitketl onechijli ipan notemik: ‘Maka xmomojti, Pablo. Tejua tajsis Roma, niman nochimej akin mouan yauej ipan barco makisaskej’. ¡Maka xmomojtikan! Xtimikiskej”.

Oajakakiyauj 14 tonajli. Sakin okontakej atlajkotian itoka Malta. Barco oxaltlalak niman otepojpostek. San ika, nochimej 276 akin ompa yayaj oajsikej ipan atlajkotian. Sekimej oapanokej, oksekimej onopaleuijkej ika itlajkotsitsinuan barco niman ijkon xoamimijkej. Akin chantiyaj Malta okinpaleuijkej niman otlatlatijkej ijkon yejuamej onototonijkej.

Opanok yeyi metstli, niman soldados okuikakej Pablo ipan okse barco hasta Roma. Ijkuak oajsik, tokniuan okinamikitoj. Ijkuak Pablo okimitak, okitlasojkamachili Jehová niman melak onoyolchikauj. Maski Pablo tsauktoya, okikauilijkej machanti ipan se kajli tlen kitlaxtlauaya. Ompa onen ome xiuitl. Miyekej konitayaj niman yejua kinnojnotsaya itech iTekiuajyo toTajtsin niman kinmacthiaya itech Jesús. Pablo noijki kintlajkuilouiliaya tlanechikoltin tlen onkatkaj Asia Menor niman Judea. Kuajli nesi ika Jehová okitekitilti Pablo makiteijli nochiuiyan kuajli tlajtolin.

Tlajtoltlistin: ¿Tleka Festo okontitlan Pablo ipan Roma?
¿Tlenon ipan onochiuj Pablo ijkuak yaya Roma?

Hechos 21:30; 23:11; 25:8-12; 27:1-28:31; Romanos 15:25, 26.

**“Yej nochi kech tikchiuaj yejua ika,
tikteititiaj ika tiitekitkauan Dios [...]. Ikan
miyek ijyouilistli tikxikouaj on tlajyouilistli,
tlajtlamach techpoloua niman miyek
tepajsoloualistli yeuan otikpixkej”
(2 Corintios 6:4).**



102 Tlatlachalistin tlen okitak Juan

Ijkuak tlatitlanketl Juan tsauktoya ipan se tlajli tlen onka atlajkotian, itoka Patmos, Jesús okititi 16 tlatlachalistin itech tlen panoskia tlayekapan. Yejon tlatlachalistin teititiaj kenon nochipauas itokayo Jehová, kenon iTekiuajyo tlanauatis niman kenon nochiuas tlen yejua kineki ipan yejuin tlaltikpaktli ijkon ken nochiuia ipan iluikak.

Ipan se tlatlachalistli, Juan kita Jehová ipan iueyixtika trono tlen onka iluikak. Iyeualiyán nemiyaj 24 tlayekankej, yejuamej kipiayaj intlaken istak niman coronas tlachijchiujtin ika oro. Itech itrono uajkikistokej tlapetlanaltin niman chikauak tlakomoni. Yejuin 24 tlayekankej notlakuanketsaj ixpan Jehová niman kiueyichiuaj. Ipan okse tlatlachalistli, Juan okitak ika melak miyekej tlaltikpakchanejkej akin miyekan ualeuayaj niman tlajtouayaj nochi tlajtolin, san sekan kiueyichiuajtoyaj Jehová. Borreguito, noso Jesús, kintlajpiya niman kinuika kampa atl tlen kitemaka nemilistli. Ipan okse tlatlachalistli, Jesús nochiuia tekiuaj ipan iluikak niman tlayekana inuan 24 tlayekankej. Sakin, ipan okse tlatlachalistli, Juan kita ika Jesús kimixnamiki Dragón akin yeuejkauí kouatl, noso Satanás, niman





“Nikchias maka xmouikakan tejua iuan yejon siuatl, niman maka manouikakan mokoneuj iuan yejua ikoneuj. Yejua mitspaxouillis motsontekon niman tejua tiktlanpaxouillis ikxi” (Génesis 3:15).

xkuakualtin espíritus. Jesús okinkixti itech iluikak niman okinuajtلاكal ipan tlaltikpaktli.

Sakin Juan kita se kualtsin tlatlachalistli kampa Borreguito niman 144,000 ijkatokej ipan tepetl Sion. Noijki kita se iluikaktekitketl patlantinemi iyeualian tlaltikpaktli niman kimijlia tlaltikpakchanejkej makimojkaitakan niman makiueyichiuakan toTajtsin.

Ipan okse tlatlachalistli, peua guerra itoka Armagedón. Ipan yejuin guerra, Jesús niman akin iuan tlaixnamikij kitlanij Satanás niman tlen kiyekana. Sa ika tlami tlatlachalistli, Juan kita ika onka yolseuilstli ipan iluikak niman tlaltikpaktli. Noijki kita ika kipopolouaj Satanás iuan ikoneuj, noso nochimej akin kinyekana. Ipan iluikak niman tlaltikpaktli nochimej kipatiojkaitaj itokayo Jehová niman san yejua kiueyichiuaj.

Tlajtoltlistin: ¿Kech tlatlachalístin okítak Juan? ¿Tlenon kichias Jesús ipan Armagedón?
Apocalipsis 1:1-3; 4:1-11; 7:4, 9-17; 11:15-18; 12:5-12; 14:6, 7; 16:14, 16; 21:5.

103 “Mauajla moTekiuajyo”

Jehová okijto: “Xok onias chokistli, tekokojkayotl, kualolistli nion mikilistli. Nikinpopouilis inmixayo. Nochi tlen xkuajli opanok, xok noilnamikis”.

Jehová okintlalijka Adán iuan Eva ipan xochitlalpan Edén ijkon chantiskiaj ika inyojlo niman pakiskiaj. Nonekiya makiueyichiuakan toTajtsin iluikakchane niman makitemiltikan tlaltikpaktli ika inkoneuan. Maski Adán iuan Eva xotetlakamatkej, tlen Jehová yokijtoka kichiuas xonopatlak. Ipan yejuin amoxтли yotikitakej ika nochi tlen Jehová kijtous, nochipa nochiu. ToTajtsin iTekiuajyo kuajkuis miyek tlateochialistin ipan tlaltikpaktli ijkon ken okijli Abrahán kichiuas.

Sa achijtsin poliui ika Satanás, xkuakualtin espíritus niman tlaltikpakchanejkej akin xkuakualtin popoliuiskej. Nochimej san Jehová kiueyichiuaskej. Xok tikualoskej nion timikiskej. Mojmostla tikpiyaskej miyek chikaualistli niman tipakiskej pampa tiyoltokej.

“ToTeko Dios, tejua mitsmelaua para tikselis ueyilistli, tetlakaitalistli, niman poder, pampa tejua nochi tlajtlamach otiktalij” (Apocalipsis 4:11).



Tlaltikpaktli nochiuas se xochitlalpan. Nochimej kipiwaskej tlen kikuaskej niman kampa chantiskej. Tlaltikpakchanejkej kipiwaskej kuajli inyojlo, xok tlauelejkej yeskej nion xok tetlajyouiltiskej. Yolkamej xtechmakasiskej niman nion tejuamej xtikinmakasiskej.

Melak kualtsin yes ijkuak Jehová kinyolitis tlaltikpakchanejkej. Kuajli tikinseliskej akin yeuejkau onenkej ken Abel, Noé, Abrahán, Sara, Moisés, Rut, Ester niman David. Yejuamej techpaleuiskejtijkuepaskej tlaltikpaktli se xochitlalpan. Nochipa onias tekittlen melak tikuelitaskej tikchiwaskej.

Jehová kineki ompa xnemi. Tejua kuajli tikixmatis Jehová xijkon ken aman tikixmati. Mojmostla matiknisiuikan Jehová. Ijkon matikchiuakan, ¡aman niman nochipa!

Tlajtoltilistin: ¿Kenon iTekiuajyo toTajtsin kipatlas nochi tlen onka ipan tlaltikpaktli? Itech nochimej akin yotitlajtokej ipan yejuin amoxtli, ¿akinon tikuelitaskia tikixmatis ipan Xochitlalpan?

Apocalipsis 21:3, 4; Job 33:25; Proverbios 2:21, 22; Isaías 11:2-10; 33:24; 65:21; Mateo 6:9, 10; Juan 5:28, 29; 17:3.



Tlamachtiltin tlen mitsmachtia Biblia

TLAMACHTILTIN

Akin teixnamikij nochiuaj itlaueeliknuian toTajtsin _____	7, 17, 26, 27, 28, 88
Akin xkuakualtin popoliuiskej _____	5, 10, 32, 46, 102
Jehová kinkaki toteoyouan tlen kisaj itech toyojlo _____	35, 38, 50, 64, 82
Jehová kinpatiojkaita nochimej tlatikpakchanejkej _____	8, 9, 11, 21, 23, 68, 70, 74, 87, 90
Jehová kintlajpiya akin kitlasojtlaj _____	6, 22, 40, 50, 52, 55, 64, 71, 84
Jehová kintlajpiya akin yolyemankej _____	43, 45, 65, 67, 69
Jehová kintlasojtla nochimej tlatikpakchanejkej _____	30, 33, 48, 54, 77, 94, 97, 98, 99
Jehová kiyekana ikalpan _____	18, 25, 26, 27, 29, 34, 39, 44, 73, 80
Jehová nochipa kilnamikis tlen tikchiuaj ipampa _____	16, 29, 32, 48, 65, 69, 77, 100
Jehová okichijchiuj kampa tichantij, tlatikpaktli _____	1, 2, 102, 103
Jehová xkeman tlakajkayaua _____	3, 10, 16, 63, 68, 70, 102, 103
Jehová yejua akin nochi ueli kichiuaj _____	1, 7, 18, 19, 20, 21, 22, 26, 55, 60
Jesús yejua Tekiuaj itech iTekiuajyo toTajtsin noneki xtlakamati _____	74, 78, 79, 83, 84, 85, 91, 92, 99
Kuajli xmouika iuan Jehová _____	11, 30, 33, 51, 56, 59, 69, 81, 82
Maka xchiua tlen xkuajli _____	14, 27, 49, 53, 58, 88, 89
Maka xmosiaujkaua ijkuak titlajyouis _____	16, 47, 51, 57, 64, 75, 90, 95, 99, 101
Melak teijtlako tikualanis _____	4, 12, 41, 45, 49, 65, 89
Mitsijtlakos niman tikimijtlakos oksekimej tla timoueyimati _____	3, 4, 12, 27, 28, 39, 49, 88
Nexikojli kinxeloua akin kuajli nouikaj _____	4, 14, 41
Nochipa xtlasojkamachili Jehová _____	2, 6, 67, 103
Nochuias tlen toTajtsin kineki ipan tlatikpaktli niman ipan iluikak _____	25, 55, 60, 62, 63, 71, 96, 102
Noneki matitenojnotsakan itech iTekiuajyo toTajtsin _____	73, 76, 94, 95, 96, 97, 98
Onias se yoliuilstli _____	48, 86, 91, 93
Telpokamej niman ichpokamej, xtekichiuilikan Jehová ika nochi nemoyojo _____	37, 51, 59, 61, 72, 100
Tla xtiktlasojtla mokniuj, xuelis tiktlasojtlas toTajtsin _____	4, 13, 15, 41
ToTajtsin iTekiuajyo kichuias ika nochimej melak mapakikan _____	1, 48, 62, 79, 81, 83, 85, 86
ToTajtsin yotechmakak Biblia tlen techpaleuiya matitlamachilisejkej _____	56, 66, 72, 75, 81
Xchiua tlen yotikijto, Jehová ijkon kichiuaj _____	8, 9, 11, 23, 24, 31, 34, 35, 36, 66, 93
Xmelauak tlaneltokijli ualeua itech Diablo _____	19, 20, 22, 38, 46, 49, 52, 58
Xmouika iuan akin kitlasojtlaj Jehová _____	16, 33, 42, 80, 87, 100, 103
Xmoyolchikaua, Jehová nochipa mitspaleuis _____	40, 47, 51, 53, 57, 61, 64, 65, 76, 88, 101
Xtetlapopolui ijkon ken Jehová mitstlapopoluiya _____	13, 15, 31, 43, 92
Xtlajpiya tlen Jehová mitsmaka _____	12, 13, 24, 35, 36, 56, 75, 95, 100
Xtlakaki niman xtetlakamati, ijkon xtikpolos monemilis _____	3, 5, 10, 37, 39, 54, 59, 65, 72
Xuelis tikueyichuias toTajtsin niman tiknekis timotomintis _____	10, 17, 44, 59, 75, 76